

# JNUHUN VAHA NI TEE SAN LUCAS

---

**1** Cuehē tēe ni cajicu de ni catee yúcún de historia Jesús, tācá jniñu jeē ni sāha ya ni cajito yó. <sup>2</sup>Te ni catee de tāca jnúhun jeē ní cacastūhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya. <sup>3</sup>Te máá ná, suni ni nanducú yúcún ná tāca jnúhun ya, nde nuū ní quejéé. Te ni jeni ni na jéé suni íyó váha jeē tée cájí ná tāca jnúhun yáha núu ní, amigo Teófilo. <sup>4</sup>Te súcuan te cuni ni jéé íyó ndáa tāca jnúhun jeē ní cacastūhún i nuū ní.

**Jeē ní cachi ndajéhé jeē cacu Juan tēe scuándute**

<sup>5</sup>Tiempo jeē ní cuu Herodes rey región Judea, te ni íyo iin sutū ñáyuu hebreo, naní de Zacarías, te grupo Abías cúu de. Te ñasihí de naní ña Elisabet, te suni sēhe yucún maá sūtū Aarón cúu ña. <sup>6</sup>Te ndíndúú de cahíyo ndaā de nuū Yaā Dios, te ndaā váha cásquicu de jniñu ndácu ley maá Jítóho yō Yaā Dios, cájito tāca ñáyuu. <sup>7</sup>Te tú sēhe de íyó, chi ñahan númá cúu Elisabet, te je jéhu ndíndúú de.

<sup>8</sup>Te iin quiví te jéjníñu Zacarías nuū jníñu jeē cúu de sutū nuū Yaā Dios, chi ni quee quiví jeē ndívi

grupo de. <sup>9</sup>Te ni casáha de sorteo, nájnūhun íyó costumbre sutū. Te ni sāha tocar Zacarías jeē quívi de ini cuarto i templo Jítóho yō Yaā Dios, te cahmu de sūje cūtú. <sup>10</sup>Te hora jeē cayú sūje cūtú, te tāca ñáyuu cuehē cáhiin i fuera, cájicān tahu i. <sup>11</sup>Te ni cane iin ndajéhé maá Jítóho yō nuū de, iin ya lado váha altar nuū jéhu de sūje cūtú. <sup>12</sup>Te ni cunéé ni Zacarías ni jito de nuū yā, te yōhyo ni yūhú de. <sup>13</sup>Te ni cahān ndajéhé un jíin de:

Zacarías, ma yūhu ró, chi je ni chihi Yaā Dios cuenta jeē ni jíicān tahu rō. Te ñasihí ró Elisabet, scácu ña iin sēhe yíí, te snaní ró i Juan. <sup>14</sup>Te yōhyo cusíi ni rō. Te cuehē ñáyuu cusíi ni jeē cácu i. <sup>15</sup>Chi cujéhu sēhe ró sāha máá Yaā Dios. Te ma cóho i vino ni ndixi cuií. Te cunuú máá Espíritu Santo jíin i, nde ná tu cacu i. <sup>16</sup>Te sāha i jeē cuehē ñáyuu nación rō Israel ndívicoo i nuū Jítóho i Yaā Dios. <sup>17</sup>Te xíhna gā Juan quiji nacani jnúhun Jítóho yō Jesús, te sáa te quiji ya. Te sāha i nájnūhun ni sāha Elías, tēe ni nacani jnúhun Yaā Dios jenahán, te coneváha i poder jeē nácani i jnúhun, nájnūhun ni coneváha Elías. Te sāha i jeē tāca tátá ndumaní

de jíin séhe de. Te suni sáha i jeē ñáyuu nihni ni cuatáhú i nuū Yaā Dios, nduu i ñayuu ndaā. Súcuan sātühva i ñayuu návaha candíje i máá Jítoho yō jeē quíji ya. Achí ndajéhé.

<sup>18</sup>Te Zacarías ni cajnúhún de ya:

¿Ndese cucáhnu ni na núu jendaá cúu? Chi tēe jéhnu cúu ná, te suni jéhnu ñasihí ná, áchí de.

<sup>19</sup>Te ni cahān ndajéhé un jíin de:

Máá rí cúu Gabriel, te íne ri nuū Yaā Dios, jejniñu ri nuū yā. Te ni tají yá ruhū vēji ri cahān rí jíin ró, te nácani ri jnúhun vāha yáha núu rō. <sup>20</sup>Te jeē tu ní cándíje ró jnúhun ni cahān rí, te cuñhín ró, te ma cúu cahān rō, chi nde na cácu séhe ró. Te squícu nahín jnúhun cáhán rí yāhá, na quée quivī, achí ndajéhé.

<sup>21</sup>Te ñayuu cáhiin ichi fuera, cándetu i Zacarías, te cájeni ni i na vé ni cuu jeē cucuée de ini cuarto i templo. <sup>22</sup>Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de iin jeē ni stéén yā nuū de. Te máá seña na ni sáha de nuū i, chi ni cuñhín de.

<sup>23</sup>Te nuū ni jínu quivī ni jejniñu de ini templo, te cuanuhun de vehe de. <sup>24</sup>Te ni cuu jecu quivī, te ñasihí de Elisabet ni jecūhun séhe ña. Te ni íyo ña vehe ña uhūn yoō jeē tuá nde ní jéhén ña. Te jéni ni ña: <sup>25</sup>Súcuan ni sáha máá Jítoho yō jíin rí, te ni tejiyo ya jnúhun jeē cúcanu rí nuū ñáyuu jeē tú séhe ri, jéni ni ña.

**Jeē ní cachi ndajéhé jeē cacu Jesús**

<sup>26</sup>Te nuū inū yoō, te ni tají Yaā Dios ndajéhé yā Gabriel, ni jehēn

yā iin ñuu naní Nazaret, ndañū Galilea. <sup>27</sup>Te ni jehēn yā nuū iin sūchi síhí nání María. Te je ni cundaā jeē quijnáhan ña jíin iin tēe nání José, te séhe yucūn rey David cúu de. <sup>28</sup>Te ni quivī ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítoho yō Yaā Dios iyó yá jíin ró, te ni sáha ya jeē yóhyo ndetū gā cúu ró núu tāca gá ñahan, áchí yá.

<sup>29</sup>Te nuū ni jíto ña nuū yā, te ni cunée ni ña jeē súcuan cáhán yā, te jéni ni ña naun cáhán yā súcuan jíin ña. <sup>30</sup>Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. <sup>31</sup>Te jecūhun séhe ró te scácu ró iin séhe yíí, te snání ró i Jesús. <sup>32</sup>Te kujéhnu i, te conaní i Séhe Yaā kujéhnu téyí. Te máá yá jeē cúu ya Jítoho yō Yaā Dios, sáha ya jeē cuu i rey, nájnúhun jíi i David ni cuu de rey. <sup>33</sup>Te níí cáni ndacu i jniñu nuū ñáyuu nación Israel. Te ma ndíhi cuiti jeē ndácu i jniñu. Achí ndajéhé.

<sup>34</sup>Yūcuán na te ni cajnúhún María:

¿Ndese coo jeē ni cáhán ní? Chi ná tu coo yíí ná, áchí ña.

<sup>35</sup>Te ni cahān ndajéhé un:

Máá Espíritu Santo quiji siquī rō, te poder maá Yaā kujéhnu téyí sáha iin jniñu jéhnu jíin ró. Te jeē yúcuan máá sūchi íi jeē cácu, quíhi cuenta i nuū Yaā Dios, te cahān ñayuu jeē Séhe Yaā Dios cúu i. <sup>36</sup>Te suni cástūhun rí nuū rō jeē jnáhan ró Elisabet, suni scácu ña iin séhe vésú je jéhnu ña. Te vijna íyó íñū yoō jeē tuá cáhān ñayuu jeē cúu

ña ñahan númá. <sup>37</sup>Chi ndihi-ni cuu sáha Yaā Dios, te tu íyó ni ñin jeē ma cúu sáha ya, achí ndajéhé un.

<sup>38</sup>Yūcuán na te ni cahān María:

Cuu núu súcuan, chi sáha ná táca jniñu ndácu Jitoho yō Yaā Dios, te na cóo jíin ná nájnūhun ni cachi ní, achí ña.

Te máá ndajéhé un cuáhān-ni ya.

**Jeē ni jécondēhé María Elisabet**

<sup>39</sup>Te ni cuu jecu quivī, te yachi cuahān María, ni caa ña yucu cuahān ña ñin ñuu región Judea.

<sup>40</sup>Te ni jinū ña vehe Zacarías, te ni cahān ña jíin Elisabet. <sup>41</sup>Te nuū ní jini Elisabet jeē cahán María jíin ña, te sūchi ñūhun chíji ña ni canda-ni i. Te ni cunuú Espíritu Santo ini anuá ña. <sup>42</sup>Te ni cahān jee ña:

Ni sáha Yaā Dios jeē yóhoyo ndetū gā cúu ró núu táca gā ñahan, jíin jēē yóhoyo ndetū sēhe ró. <sup>43</sup>¿Te ndese cúu jeē ní quee naná maá Jítoho rī nuū rī? Chi tu cújéhnu cuiti rī. <sup>44</sup>Chi jeē ní jini-ni ri jnūhun ni cahān rō jíin rí, te sūchi ñūhun chíji ri ni canda i jeē cúsiñ ni i. <sup>45</sup>Te nacā ndetū rō jeē ní candíje ró, chi squícu nahín táca jnúhun ni cahān maá Jítoho yō jíin ró. Achí Elisabet.

<sup>46</sup>Yūcuán na te ni cahān María:

Cáhán rī jeē cújéhnu ndasí máá Jítoho yō Yaā Dios,

<sup>47</sup>te cúsiñ ni rī jíin Yaā Dios, Yaā jnáma ruhū.

<sup>48</sup>Chi ni sáha ya cuenta ruhū, vēsú tu cújéhnu ri.

Te na squícu ri jniñu ndácu ya. Te nde vijna te táca ñáyuu jeē nácacu, cahān i jeē yóhoyo ndetū rī.

<sup>49</sup>Chi Yaā jnā ndihi poder, ni sáha ya jniñu jéhnu jíin rí.

Te Yaā ñi ndoo cúu ya.

<sup>50</sup>Te ní cáni cundáhú ni yā táca ñáyuu ndíso iyo nuū yā.

<sup>51</sup>Ni sáha ya jniñu jéhnu jíin poder yā, chí ni scúnu ya ñayuu casándúxí máá,

<sup>52</sup>te ñayuu cácujuhnu, ni quende ya jeē cújéhnu i. Te ñayuu ndahú chi ni sajéhnu ya i,

<sup>53</sup>te ñayuu cájii sōco ni jēhe ya jeē cáji vāha i.

Te ñayuu cucá ní natajé yá i súcuan-ni.

<sup>54</sup>Te ni chindéé ñáhán yá yohó, ñáyuu nación Israel, jeē cácuu yó mozo yā, te tu náā ni yā jeē cundáhú ni yā yohó.

<sup>55</sup>Chi súcuan ni jejnūhun ya nuū táca jíi yō, nuū Abraham jíin táca yúcūn de jeē cóo ní cáni.

Achí María.

<sup>56</sup>Te ni condee ña jíin Elisabet nájnūhun uní yoō. Yūcuán na te cuanuhun ña vehe ña.

**Jeē ní cacu Juan tēe scuándute**

<sup>57</sup>Te ni jinū quivī jeē scácu Elisabet sēhe ña, te ni scácu ña ñin sēhe yíí. <sup>58</sup>Te táca ñáyuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jnūhun siñ ni jíin ña. <sup>59</sup>Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuan cúu ñin jnūni nuū yiquí cúñu táca sūchi yíí

hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuú. <sup>60</sup>Te ni cahān naná i:

Ma cúu, chi Juan conaní i, áchí ña.

<sup>61</sup>Te ni cacahān i jíin ña:

¿Te naun? Chi tú ni ñin jnāhan ró naní súcuan, áchí i.

<sup>62</sup>Yūcuán na te jíin seña ni cacajnūhún i tátá sūchí un ndese cúní de jeē cónaní i. <sup>63</sup>Te máá de ni jicān ñin tutu, te ni tee de: Juan conaní i. Te tāca ñáyuu un ní canaa ni i cájito i. <sup>64</sup>Te ni nduvāha Zacarías jeē ní cuñhān de, te ni quejéé de cáhān de jeē yóhyo vāha Yaā cúu Yaā Dios. <sup>65</sup>Te tāca ñáyuu ndeé yajni jíin de, yóhyo ni canaa ni i. Te ní yucu región Judea ni jitē núu tāca jnūhun yāha jeē súcuan ni cuu. <sup>66</sup>Te tāca ñáyuu jeē ní cajini jnūhun, ni quejéé i cánacani ni i, te cacajnūhun jnāhan i:

¿Ndeese coo na cuéhnu sūchi yāha? áchí i.

Chi máá Jítoho yō yóhyo ni sāha ya jeē vāha jíin i.

### **Jnūhun luu jeē ní nacani Zacarías**

<sup>67</sup>Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuú de:

<sup>68</sup>Yóhyo vāha Yaā cúu máá Jítoho yō, Yaā Dios yohó ñáyuu Israel, chi ni quiji ya nuū yō jeē cácuu yó ñáyuu yā, te ni jnama ya yohó.

<sup>69</sup>Te ni jeni ya ñin Yaā iyó poder jeē jnāma ya yohó, te Yaā ún cacu yucūn mozo yā rey David.

<sup>70</sup>Chi súcuan ni jejnūhun ya, ni cacahān tāca tée ndoo ánuá jeē ní canacani de jnūhun ya jenahán.

<sup>71</sup>Chi ni cacahān de jeē jnāma ya yohó núu jeē cájito uhū yohó, jíin núu jeē cáquiti ni nuū yō.

<sup>72</sup>Chi ni cundáhú ni yā tāca jíi yō jijnāhan, te tu ní nāá ni yā contrato ii yā.

<sup>73</sup>Chi suu un ní jejnūhun téyí yá nuū jíi yō Abraham,

<sup>74</sup>suu jeē jnāma ya yohó núu ñáyuu cájito uhū yohó, návāha cuajniñu yó núu yā, te ma yūhu yó i.

<sup>75</sup>Te coo ndaā coo ndoo ánuá yō, cuajniñu yó núu yā tāca quívi jeē cótecu yō.

<sup>76</sup>Te róhó súchi lúli, cuu ró tée nacani jnūhun Yaā cujéhnu téyí. Chi cosnúu ró ichi núu maá Jítoho yō, návāha sátūhva ró ñáyuu, te sáá te quiji ya.

<sup>77</sup>Te castūhun ró nuū ñáyuu maá yá jeē jnāma ya i, jíin jéé cóne cáhnu ni yā nuū tāca cuéchi i.

<sup>78</sup>Chi Yaā Dios maá yó, vāha ni yā te cundáhú ni yā yohó. Jeē yúcuan tají yá maá Yaā jeē sāha jeē cundijin ini anuá yō, quiji ya nde andiví,

<sup>79</sup>návāha jecūhun ni yohó jéé cáyūcu nájñūhun nuū nēé nuū je yajni cuu yō.

Te chuhun ya yohó ichi nuū cóo ndeyí coo sīi ni yō.

Áchí Zacarías.

<sup>80</sup>Te sūchi lúli un ní jehnu i te ni ije i jíin jnūhun ya. Te ni condee i nde nuū ñūhun téhé ndé quiví ní quenda ndijin i nuū ñáyuu Israel.

**Jeē ní cacu Jesús***(Mt. 1.18-25)*

**2** Te ni cuu jecu quivī, te Augusto, tēe cúu rey, ni ndacu de jniñu jeē coo censo jeē núcosō sīhvī ndivii ñayuu níí cáhnu nuū ndácu de jniñu. <sup>2</sup>Yāha cúu censo xihna ñúhún jéē ní casáha de ná ni cuu Cirenio gobernador nación Siria. <sup>3</sup>Te ndivii ñayuu cuanungoo i ná ñuu ná ñuu maá i jeē nácuāha i sīhvī i. <sup>4</sup>Te suni José ni quenda de ñuu Nazaret, ndañúú Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de. <sup>5</sup>Te ni jehēn de návāha nacuāha de sīhvī de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo. <sup>6</sup>Te níni cáhiin de yūcuán te ni jinū quivī jeē cácu sēhe ña. <sup>7</sup>Te ni scácu ña sēhe yíí núú ña, te ni chusúcún ña i sahma cuitá, te ni jequin ña i ini iin nundōo núú yéji quitī, chi tuá núne mesón condee ña.

**Jeē ní canecoo ndajéhé yā nuū pastor**

<sup>8</sup>Te yajni ñuu Belén cáhiin tēe cácuu pastor, te cándito de lanchi de níí niñu jecuāā nde yucu ún. <sup>9</sup>Te iin sanaa-ni te ni cane iin ndajéhé maá Jítoho yō nuū de, te nduva maá Jítoho yō ni ndindēe níí núú cáhiin de. Te yōhyo ni cayūhú de. <sup>10</sup>Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsiī ndasí ni tāca ñáyuu: <sup>11</sup>Chi vijna nde ini ñuu David ni cacu iin Yaā jnama róhó, te maá

Jítoho yō Cristo cúu ya. <sup>12</sup>Te súcuu nacuni rō sūchi yíquín un, chi ñúsúcún i sahma cuitá te cátu i ini iin nundōo núú yéji quitī. Achí yá.

<sup>13</sup>Te iin sanaa-ni te ni canecoo cuehē gā ndajéhé andiví, cáhiin ya jíin ndajéhé un, te cácahān yā jeē yóhyo vāha Yaā cúu Yaā Dios. Te áchí yá:

<sup>14</sup>Yōhyo luu cújéhnū Yaā Dios nde nuū sucún.

Te na ndúvāha ni tāca ñáyuu ñayiví, sáha ya jeē cúsiī ni yā jíin i.

Achí tāca ndajéhé.

<sup>15</sup>Yūcuán na te cuanungoo ndajéhé un andiví. Te tēe cácuu pastor ni cacahān de jíjnáhan de:

Na quíhín yō nde ñuu Belén, te cuni yō na vé ni cuu jeē ní castūhun máá Jítoho yō nuū yō, achí de.

<sup>16</sup>Te yachī cuangoo de, te ni nanihīn de María jíin José jíin sūchi yíquín un, cátu i ini nundōo núú yéji quitī. <sup>17</sup>Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquín un. <sup>18</sup>Te ni canaa ni tāca ñáyuu cájini nahín i jnūhun cácahān tēe cácuu pastor. <sup>19</sup>Te María, ni quendōo tāca jnūhun yáha nuū jeē níjnūní ña, te nácani ni ña siquī. <sup>20</sup>Te tēe cácuu pastor cuanungoo de, te ni cacahān de jeē yóhyo vāha Yaā cúu Yaā Dios siquī tāca jéē ní cajini sōho de jíin jéē ní cajito de, chi ni squícu nahín nájnūhun ni cahān ndajéhé yā jíin de.

**Jeē ní castéén de i nuū  
Yaā Dios ini templo**

<sup>21</sup>Te ni cuu unā quivī jeē ní cacu ya, te ni casáha de circuncidar

sūchi yíquín un. Te ni casnání de i Jesús, chi síhví yúcuán ní cachi ndajéhé yā nuū María nde ná tu jecūhun i.

<sup>22</sup>Te ni jīnu quivī jeē casquícu ña costumbre jeē ndúndoo ña nuū Yaā Dios jijnáhan ña, nájnūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítóho yō Yaā Dios. <sup>23</sup>Súcuán ni casáha de, chi yósó núu tútu ley yā: Tāca sūchi yíí núú jéé cácacu, quihí cuenta i nuū Jítóho yō Yaā Dios, achí tutu. <sup>24</sup>Te suni cuasocō de nájnūhun cáhán ley maá Jítóho yō: Socō rō uū livi chí úú paloma, achí tutu.

<sup>25</sup>Te ni iyo ñin tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñūhun ni de jeē quéé maá Yaā jnama ñayuu nación de Israel. Te maá Espíritu Santo íyó yá jíin de. <sup>26</sup>Te je ni castūhun yá nuū de jeē ma cúu cuiti de chi nde coto de nuū Cristo jeē tají maá Jítóho yō Yaā Dios. <sup>27</sup>Te ni steén yā nuū de jeē quihín de templo quivī ún. Te suni tátá naná sūchi yíquín Jesús, ni quívicoo de ini templo jíin i, jeē nácuāha de i nuū Yaā Dios nájnūhun cáhán ley Moisés. <sup>28</sup>Te Simeón ni ñunundee de i, te ni cahān de jeē yóhyo vāha Yaā cúu Yaā Dios, te achí de:

<sup>29</sup>Tátā Yaā Dios, vijna te cuu cuāha ni jnúhun jeē cuu ná, chí je ni cusíi ni ná.

Chi je ni squícu ní jnúhun ni jejnūhun ní núú saña jéé cúu ná mozo ni.

<sup>30</sup>Chi ni jito jínúu na núú Yaā jnáma saña jijnáhan ná.

<sup>31</sup>Chi ni jeni ní yá jeē jnáma ya tāca ñáyuu ñayiví.

<sup>32</sup>Te maá yá sāha jeē cúndijin ini anuá ñayuu tācá nación, návāha jecūhun ni i siquī ní. Te sāha ya jeē cujéhnū ñayuu maá ní Israel.

Achí Simeón.

<sup>33</sup>Te José jíin náná i cánaa ni de cájini nahín de jnúhun ni cahān Simeón siquī i. <sup>34</sup>Te ni jicān tahú Simeón jehē de jijnáhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jijnáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichí ni cuehē ñayuu i. <sup>35</sup>Te súcuán te quenda ndijin ndese cájeni ni tāca ñáyuu. Te maá ró chi jnahuhū ndasí ni rō coto ró jéé ndóho i. Achí Simeón.

<sup>36</sup>Te suni íne ñin ñahan nácani jnúhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lulí ña te ni condee ña jíin yíi ña uxā cuiyā.

<sup>37</sup>Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe íi, chí jéjníñu ña nuū Jítóho yō Yaā Dios nduú ñuú, te ndite ni ña te jicān tahú ña. <sup>38</sup>Te suni hora un ní quee ña, te ni nacuatáhú ña nuū Yaā Dios. Te ni cahān ña jnúhun sūchi yíquín un jíin tāca ñáyuu Jerusalén jeē cáñuhun ni i jeē quéé Yaā jnama i.

**Jeē cuánungoo de ñuu Nazaret**

<sup>39</sup>Te ni jīnu ni casquícu de tācá jniñu ndácu ley maá Jítóho yō Yaā Dios, te cuanungoo de ñuu de

Nazaret, ndañū Galilea. <sup>40</sup>Te sūchi lúli un ní jehnu i, te ni ije i, te ni cundíchi gá i. Te ni sáha Yaā Dios jeē váha ndasí jíin i.

### Jeē ine sūchi lúli Jesús ini templo

<sup>41</sup>Te ndijnahan cuiyā jéngoo tátá i náná i ñuu Jerusalén, jeē cúu vico pascua. <sup>42</sup>Te nuū ní cuu uxī uū cuiyā i, te cuangoo tucu de Jerusalén, nájñuhun sáha sáha de quivī vico ún. <sup>43</sup>Te ni yāha vico, te cuanungoo de. Te sūchi lúli Jesús, ni quendō i Jerusalén, te tu ní cájini José jíin náná i. <sup>44</sup>Te cájini ni de jeē cuahán i mēññu ñáyuu cájica ichi ún. Te ni cajica de iin quivī, te sáá te ni cananducú de i mēññu táca jnáhan de jíin ñáyuu cájini jnáhan de jíin. <sup>45</sup>Te tu ní cánanihīn de i. Te ni canandicó de cuangoo de Jerusalén, cuananducú de i.

<sup>46</sup>Te nuū uní quivī te ni cananihīn de i ini templo, néne i mēññu tée cástéén tutu ley Yaā Dios, te jíni nahín i jeē cácahān de te cájnūhún i de siquī jñuhun ún. <sup>47</sup>Te táca ñáyuu cájini jñuhun cáhán i, cánaa ni cájito jeē váha cájī xīnī i te váha nástió cuíñí i jñuhun. <sup>48</sup>Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rī cánanducú rí rohó, achí ña.

<sup>49</sup>Yūcuán na te ni cahān i:

¿Naun cánanducú ní sāña? ¿A tu cájini ni jēé cánuú cocu ná jíin jniñu Tátá na Yaā Dios? Achí i.

<sup>50</sup>Te tu ní cájecūhun ni tátá i náná i jñuhun ni cahān i.

<sup>51</sup>Yūcuán na te cuanuhun i jíin de jíināhan de ñuu Nazaret, te ni jendije i nuū de. Te náná i, ni quendō táca jñuhun yáha núu jeē níjnūnī ña. <sup>52</sup>Te Jesús ni jehnu ga i, te ni cundíchi gá i, te cúsiñi ni Yaā Dios jíin i, te suni súcuan táca ñáyuu.

### Jñuhun Juan tēe scuándute

(Mt. 3.1-12; Mr. 1.1-8; Jn. 1.19-28)

**3** Te ni cuu xahūn cuiyā jeē ndácu Tiberio jniñu ní naciōn. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisaniás cúu de gobernador Abilinia. <sup>2</sup>Te sutū cujéhu ga cácuu Anás jíin Caifás. Te ni quee jñuhun Yaā Dios nuū Juan sēhe Zacarías, jeē ine de nuū ñúhun téhé. <sup>3</sup>Te ni jica nuu de táca ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i. <sup>4</sup>Te súcuan ni squícu jñuhun Juan jeē yosó nuū tútu ni tee Isaías, tēe ni nacani jñuhun Yaā Dios nde jenahán:

Coo iin tēe cana jee nde nuū ñúhun téhé:

Sátūhva ró máá ró jijnáhan ró, chi quee maá Jítoho yō.

Te sáha ró jniñu ndaā, chi vēji ya.

<sup>5</sup>Te táca xéhvā na ndúndaā, te táca yucu jíin loma na ndúnduhvā,

te na ndúyóhó ichi yácuá, te na ndúlīi ichi ndáyí.

Te ndīhi un cúu jeē ndúvāha ndundaā anuá ñáyuu nuū yā.

<sup>6</sup>Te ndihi i cuni i jeē jnáma Yaā Dios i.

Súcuca cahān Juan, achí tutu.

<sup>7</sup>Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájñuhun coō. ¿A cájeni ni rō jeē cuu cunu ró cácu ró núū castigo xeēn jeē quíji? <sup>8</sup>Núu súcuca te sáha ró jniñu váha, te súcuca stéén rō jeē ní nacani ndije ni rō jeē stóo ró cuéchi ró. Te ma cáni ni rō cahān rō jeē cuu cácu ró síquī jeē cácuu ró yúcūn Abraham. Chi cáhān rī jíin ró jeē cuu sáha Yaā Dios jeē táca yūu yáha nduu sēhe Abraham jeē candíje vāha, te núu cúní yā. <sup>9</sup>Te cácuu ró nájñuhun nundehé jeē tu jéhe ndehé váha. Te vijna je íyó túhva Yaā Dios jeē cuáha ya castigo xeēn, nájñuhun je íyó túhva iin cāa jeē cahnde nde yoho yujnu. Núu súcuca te sáha ya jíin ró nájñuhun jíin táca yujnu jeē tu cúun ndehé váha, jeē tahndé te cayū nuū ñuhún. Achí de.

<sup>10</sup>Te ñayuu un ní cacajñuhún i de: ¿Te ndese sáha ná núu súcuca? Achí i.

<sup>11</sup>Te ni cahān de:

Róhó jéē cánevāha uū sahma, na cuáha ró iin nuū jeē tu névāha. Te róhó jéē cánevāha jeē yéji, suni súcuca na sáha ró, achí de jíin i.

<sup>12</sup>Te suni jecu tēe cástútú xúhun renta, ni quecoo de jeē cuándute de. Te ni cacajñuhún de Juan:

Maestro, te máa ná, ¿ndese sáha ná jíjnáhan ná?

<sup>13</sup>Te ni cahān Juan jíin de:

Ma scaá ró cácan rō xúhún, chi máa cúhva-ni jeē ní ndacu jniñu nuū rō, achí de.

<sup>14</sup>Te suni ni cacajñuhún jecu soldado:

Te máa ná, ¿ndese sáha ná jíjnáhan ná? achí de.

Te ni cahān Juan jíin de:

Ma quénde rō ndajñiñu ni iin jíin jnúhun siúhú ni jíin jnúhun stáú yáhu, te cusíi ni rō jíin yáhu ró, achí de.

<sup>15</sup>Te táca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan.

<sup>16</sup>Te ni cahān Juan jíin i jíjnáhan i:

Ruhū chi jíin ndute scuándute ri rohó. Te vēji iin Yaā jeē nájñuhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñuhun ñuhún. Te cújéhnu ndasí yá, chi tú na vé jéhnu cuítí cúu ri nuū yā, ni jeē cuajñiñu ri nuū yā vēsú iin jniñu lúlí gá nájñuhun jeē ndají rí vēsú correa ndijēn yā.

<sup>17</sup>Te sáha ya nájñuhun sáha tēe scánda trigo, chi sásíin ya ñayuu vāha jíin ñáyuu cunéé, nájñuhun cúndoo trigo jeē quénda síin paja. Te nastútú yá trigo yā ndívi ini yacā yā. Te paja chi jnaa yā nuū ñuhún jeē ma ndahvá cuítí. Achí Juan.

<sup>18</sup>Te súcuca te jíin cuéhē gā jñuhun ni stíhví ni de ñayuu un, ní nacani de jñuhun vāha Yaā Dios nuū i. <sup>19</sup>Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuca ni sáha Herodes. <sup>20</sup>Te sa víhyá gā ni sáha de jeē neé gá, chi ni chune de Juan vecāa.

**Jeē ní jendute Jesús**

(Mt. 3.13-17; Mr. 1.9-11)

<sup>21</sup>Te nde ná tu quívi Juan vecāa, ná ni ine de ni scuándute de



tāca ñáyuu, te suni ni scuándute de Jesús. Te jícán tahú yā, te ni nune-ni andíví. <sup>22</sup>Te ni cuun Espíritu Santo ni quee xiní yā, te cáa nájñuhun iin paloma. Te ichi ándíví ní cahān iin jñuhun:

Máá ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

**Lista ñayuu yucūn ní quiji Jesucristo**

(Mt. 1.1-17)

<sup>23</sup>Te ná ni quejéé Jesús steén yā jñuhun, te íyó yá nájñuhun ocō uxí cuiyā. Te cájeni ni ñayuu jeē séhe José cúu ya. Te José ni cuu séhe Elí, <sup>24</sup>te Elí ni cuu séhe Matat, te Matat ni cuu séhe Leví, te Leví ni cuu séhe Melqui, te Melqui ni cuu séhe Jana, te Jana ni cuu séhe José, <sup>25</sup>te José ni cuu séhe Matatías, te Matatías ni cuu séhe Amós, te Amós ni cuu séhe Nahum, te Nahum ni cuu séhe Esli, te Esli ni cuu séhe Nagai, <sup>26</sup>te Nagai ni cuu séhe Maat, te Maat ni cuu séhe Matatías, te Matatías ni cuu séhe Semei, te Semei ni cuu séhe José te José ni cuu séhe Judá, <sup>27</sup>te Judá ni cuu séhe Joana, te Joana ni cuu séhe Resa, te Resa ni cuu séhe Zorobabel, te Zorobabel ni cuu séhe Salatiel, te Salatiel ni cuu séhe Neri, <sup>28</sup>te Neri ni cuu séhe Melqui, te Melqui ni cuu séhe Adi, te Adi ni cuu séhe Cosam, te Cosam ni cuu séhe Elmodam, te Elmodam ni cuu séhe Er, <sup>29</sup>te Er ni cuu séhe Josué, te Josué ni cuu séhe Eliezer, te Eliezer ni cuu séhe Jorim, te Jorim ni cuu séhe Matat, <sup>30</sup>te Matat ni cuu séhe Leví, te Leví ni cuu séhe Simeón, te Simeón ni cuu séhe

Judá, te Judá ni cuu séhe José, te José ni cuu séhe Jonán, te Jonán ni cuu séhe Eliaquim, <sup>31</sup>te Eliaquim ni cuu séhe Melea, te Melea ni cuu séhe Mainán, te Mainán ni cuu séhe Matata, te Matata ni cuu séhe Natán, <sup>32</sup>te Natán ni cuu séhe David, te David ni cuu séhe Isaí, te Isaí ni cuu séhe Obed, te Obed ni cuu séhe Booz, te Booz ni cuu séhe Salmón, te Salmón ni cuu séhe Naasón, <sup>33</sup>te Naasón ni cuu séhe Aminadab, te Aminadab ni cuu séhe Aram, te Aram ni cuu séhe Esrom, te Esrom ni cuu séhe Fares, te Fares ni cuu séhe Judá, <sup>34</sup>te Judá ni cuu séhe Jacob, te Jacob ni cuu séhe Isaac, te Isaac ni cuu séhe Abraham, te Abraham ni cuu séhe Taré, te Taré ni cuu séhe Nacor, <sup>35</sup>te Nacor ni cuu séhe Serug, te Serug ni cuu séhe Ragau, te Ragau ni cuu séhe Peleg, te Peleg ni cuu séhe Heber, te Heber ni cuu séhe Sala, <sup>36</sup>te Sala ni cuu séhe Cainán, te Cainán ni cuu séhe Arfaxad, te Arfaxad ni cuu séhe Sem, te Sem ni cuu séhe Noé, te Noé ni cuu séhe Lamec, <sup>37</sup>te Lamec ni cuu séhe Matusalén, te Matusalén ni cuu séhe Enoc, te Enoc ni cuu séhe Jared, te Jared ni cuu séhe Mahalaleel, te Mahalaleel ni cuu séhe Cainán, <sup>38</sup>te Cainán ni cuu séhe Enós, te Enós ni cuu séhe Set, te Set ni cuu séhe Adán, te Adán ni cuu séhe Yaā Dios, chi ni sáha ya de.

**Jeē ní jito ndee jexeén Jesús**

(Mt. 4.1-11; Mr. 1.12-13)

**4** Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū

yā nde nuū ñūhun téhé ní sáha Espíritu Santo. <sup>2</sup>Te ni ine ya yūcuan úū xico quivī, te ni jito ndee jexeén yā, chí cúní jeē sáha ya cuēchi. Te tāca quivī ún tu ní yéji cuiti yā, te ná ni yāha quivī ún, te jíí yā sōco. <sup>3</sup>Yūcuán na te ni cahān jexeén un jíín yá:

Núu máá ró cúu Sēhe Yaā Dios, te cahān rō jeē yuū yāha na ndúu staā caji rō, achí.

<sup>4</sup>Te ni cahān Jesús jíín:

Tuú chí yósó núū tútu íi: Nasūu máni máá jíín stāā cátecu ñayuu, chí suni jíín táca jnūhun cáhán Yaā Dios, achí yá.

<sup>5</sup>Yūcuán na te cuahān jexeén un jíín yá nde xinī ñin yucu súcún, te ñin núnúu-ni ni steén nuū yā tācá nación níí cáhnu ñayiví. <sup>6</sup>Te ni cahān jíín yá:

Nuū maá ró cuāha ri jeē cujéhnu ró núū ndivii nación yāha, chí yōhoyo luu cáa. Chí máá rí jnīí ndíhi, te cuu cuāha ri nuū ndé ñin cúní rī.

<sup>7</sup>Núu súcuan te núu cuiñi yítí ró chíñúhún ró ruhū, te cuāha ndíhi ri nuū rō. Achí jexeén.

<sup>8</sup>Te ni cahān Jesús jíín:

Satanás, cujiyo quihīn rō, chí yósó núū tútu jeē chíñúhún ñayuu maá Jítoho i Yaā Dios, te nuū maá-ni ya cuajñīu i. Achí yá.

<sup>9</sup>Yūcuán na te cuahān jexeén un jíín yá nde ñuu Jerusalén. Te ni jeni ya xinī torre templo. Te ni cahān jíín yá:

Te núu Sēhe Yaā Dios cúu ró, te síngava ró máá ró nde nuū ñūhun, chí jnama ya rohó. <sup>10</sup>Chí yósó núū tútu:

Tejnīñu ya ndajéhé yā quijicoo coto rohó.

<sup>11</sup>Te cunundee yā rohó jíínáhan ya, návāha ma cáchihi ró jéhē rō nuū yuú.

Achí tutu. Achí jexeén.

<sup>12</sup>Te ni cahān Jesús:

Tuú chí suni yósó núū tútu jeē ma coto ndee ñayuu Jítoho i Yaā Dios, núu jnama ya i chí tuú, áchí yá.

<sup>13</sup>Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

### Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

<sup>14</sup>Te ni cunuú fuerza Espíritu Santo ini Jesús, te cuanuhun yā Galilea. Te níí región yajni yūcuan ní jítē núu jnūhun ya. <sup>15</sup>Te ni steén yā jnūhun ini tācá vehe íi sinagoga, te ndíhi ñayuu ni cajejnúhún i ya.

### Jeē cuánuhun yā ñuu Nazaret

(Mt. 13.53-58; Mr. 6.1-6)

<sup>16</sup>Te ni najinū yā ñuu Nazaret nuū ní jehnu ya. Te quivī ndétátú ni quivī ya ini vehe íi sinagoga, nájñūhun sáha sáha ya. Te ni ndocuiñi yā jeē cahu ya tutu íi.

<sup>17</sup>Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihīn yā nuū yosó jnūhun ni cahu ya:

<sup>18</sup>Espíritu maá Jítoho yō Yaā Dios iyó yá jíín rí, chí ni tejñīñu ya ruhū jeē nácani ri jnūhun vāha nuū ñáyuu ndahú.

Te ni tají yá ruhū vēji ri jíín jnūhun jeē ndúvāha ni ñayuu cácuuíhyá ní.

Te castūhun rí nuū ñáyuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni, te jnama ri ñayuu jeē cándoho i sáha jnáhan i.

<sup>19</sup>Te nacani ri jnūhun jeē ní quee tiempo jeē sáha Jitoho yō Yaā Dios jeē váha ñayuu.

Achí tutu ni cahu ya.

<sup>20</sup>Te ni nacasi yā tutu ún, te ni nacuāha ya nuū tée jéjníñu ini sinagoga, te ni nucōo ya jeē steén yā jnūhun nuū ñáyuu cáhiin ini sinagoga. Te tācá i cájito vāha i nuū yā. <sup>21</sup>Te ni quejée yá cahán yā jíin i:

Vijna te ni squícu jnūhun cáhán tutu i yāha ní cajini sōho ró, áchí yá.

<sup>22</sup>Te ndivii i ni cacahān jeē váha tēe cúu ya, te cánaa ni i jeē ní cajini i tāca jnūhun luu ni cahān yā. Te ni cacajnūhun jnáhan i:

¿A násūu séhe José cúu tēe yáha?

<sup>23</sup>Te ni cahān yā jíin i:

Jíní vāha ri jeē cájeni ni rō cahān rō jnūhun yátá yáha jíin rí: Tēe tájné, sátájné ró maá ró núu súcuan. Te jnūhun yáha cúní cahān jeē nájnūhun ni nasávāha ri cuehē ñayuu cácuñu ini ñuu Capernaum ni canihīn rō jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

<sup>24</sup>Te ni cahān gā yā:

Jendaá cahán rí jíin ró, ni iin tēe nácani jnūhun Yaā Dios, tu cájetáhu ñayuu ñuu maá de nuū de. <sup>25</sup>Te suni jendaá cahán rí jíin ró jeē ni íyo cuehē ñahan ní ndóo ndáhu ini nación yō Israel, tiempo ni cotecu Elías, tēe ni nacani jnūhun Yaā

Dios. Te tiempo un tu ní cúun cuiti saū uní cuiyā yosáva, te ni íyo iin jnamā xeēn ní cáhnu nación. <sup>26</sup>Te tu ní tájí Yaā Dios Elías quihīn de nuū ni iin ñahan viuda nación yō Israel, chi nuū máá iin-ni ñahan viuda jeē ndeé ñuu Sarepta ndañú Sidón, ni jehēn de ni jito de jeē ní yeji ña. <sup>27</sup>Te ini nación yō Israel suni ni íyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jnūhun Yaā Dios. Te ni iin de tu ní cándíje jeē ndúvāha de sáha Eliseo, chi sa suhva máñúhún-ni Naamán, tēe nación Siria ni nduvāha. Achí yá.

<sup>28</sup>Yūcuán na te tāca ñáyuu cáhiin ini sinagoga, yōhyo ni caquiti ni i jnūhun ní cahān yā. <sup>29</sup>Te ni candocuiñi i, te ni caquenehen i ya yatā ñúu ún, cuahān i jíin yá xini yúcu íne ñuu ún, chi cácuni i chundahá i ya inga ya cava ún. <sup>30</sup>Te tu ní cúu sáha i, chi ni yāha-ni ya mēhñú i cuahān yā.

**Jeē ní quenehen ya tachī ini iin tēe**

(Mr. 1.21-28)

<sup>31</sup>Yūcuán na te cuahān Jesús ñuu Capernaum región Galilea. Te quiví ndétatu ní steén yā jnūhun nuū ñáyuu. <sup>32</sup>Te ni canaa ni i cájini i jnūhun steén yā. Chi ni steén vāha ya nuū i, chi jíin vāha máá yá.

<sup>33</sup>Te ini vehe sinagoga un íne iin tēe jeē ñúhun tachī xeén ini de. Te tēe un ní cana cóho de:

<sup>34</sup>Cujiyo ní. ¿Naun véji ní núu na jíjnáhan ná, Jesús ñuu Nazaret? ¿A véji ní jée snáa ni sáña, chí naún? Je jíin na ndé iin cúu ní, chi Séhe i Yaā Dios cúu ní. Achí de.

<sup>35</sup>Te Jesús ni cahān xeén yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núū tāca ñáyuu, ni sáha tachí ún. Te ni quenda ini de cuahān, te tú na vé ni sáha ga jíin de. <sup>36</sup>Te ndíhi ñayuu un ní cayūhú i, te ni cacahān i jíin jnáhan i:

¿Na jnūhun cúu yáha jéē ní cuu súcuan? Chi cújéhnú tēe yáha jéē ndácu nihin de jniñu nuū tachí, te quéndacoo-ni, áchí i.

<sup>37</sup>Te jnūhun ya ni jitē núu cuahān ní cáhnu región yūcuán.

### Jeē ní nasávāha ya naná chísó Simón Pedro

(Mt. 8.14-15; Mr. 1.29-31)

<sup>38</sup>Yūcuán na te ni quenda Jesús ini vehe iī sinagoga, te cuahān yā te ni jinū yā vehe Simón. Te náná chísó Simón, yíhi xeēn quiji ña, te ni cacahān ndahú de jíin yá jehē ña. <sup>39</sup>Te ni jīta ndeyi ya nuū ña, te ni cahān yā jeē na ndíco quiji ún. Te ni nduvāha-ni ña. Te ni ndocuñiñi-ni ña, te ni sáha ña jeē ní yeji yā jíin de.

### Jeē ní nasávāha ya cuehē ñayuu

(Mt. 8.16-17; Mr. 1.32-34)

<sup>40</sup>Te jeē ni quéé niāndii, te tāca ñáyuu jeē iyó jnáhan i cácuñu ndinuū cuehyī, ni caquindeca i jnáhan i un núū yā. Te ni soó yá ndaha ya siquī iñ iñ i, te súcuan ni nasávāha ya i. <sup>41</sup>Te suni cuehē ñayuu ni quendacoo tachí ini i, te cácana cóhó táchí ún:

Maá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jeē cahán gā súcuan, chi cájini jeē maá yá cúu Cristo, Yaā ní tají Yaā Dios.

### Jeē ní nacani ya jnūhun región Galilea

(Mr. 1.35-39)

<sup>42</sup>Te nuū ní cundijin, te ni quenda ya cuahān sīn ya yatá ñúū nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i.

<sup>43</sup>Te ni cahān yā jíin i:

Suni cánuú jéē nacani ri jnūhun vāha nuū tāca gā ñuu siquī ndese ndácu Yaā Dios jniñu, chi jeē yúcuán ní tají yá ruhū vēji ri. Achí yá.

<sup>44</sup>Te ni jica cuu ya ní región Galilea, nácani ya jnūhun ini tācá vehe iī sinagoga.

### Jeē ní canihin de cuehē chácá ni sáha ya

(Mt. 4.18-22; Mr. 1.16-20)

**5** Te iñ quivī te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chi cáconi i cuni nahín i jnūhun Yaā Dios. <sup>2</sup>Te ni jito ya jeē yúcu uū barco yajni yumar. Te tēe cájniñi chácá, je ni quendacoo de ini barco, te cánacate de ñunu de. <sup>3</sup>Te ni quivī ya ini iñ barco jeē cúu barco Simón. Te ni cahān yā jíin de jeē na scáca yátá de quihín jecu gā nuū ndúte. Te ni cucōo ya, te nde ini barco un ní steén yā jnūhun nuū ñáyuu cuehē jeē yúcu i yundúte un. <sup>4</sup>Te nuū ni jínu ni steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jniñi ró chácá, áchí yá.

<sup>5</sup>Te ni cahān Simón:

Maestro, níñi ni casínga ná ñunu jeē jniñi ná tí, te tu ní níhín

cuiti ná ni iin ti. Te jeē cahán maá ní súcuan, te na sínga tucu ná ñunu, áchí de.

<sup>6</sup>Te ni casínga de, te ni quívicoo cuehē ndasí cháca, nde nducú táhndē ñunu de. <sup>7</sup>Te ni cacaja ndahá de nuū jnáhan de cáhiin ini inga barco, na quíjicoo chindéé ñájnáhan jíin de. Te ni quecoo de, te ni cascútú ndí de ti ndíndúu barco, te nde je yajni quēe barco.

<sup>8</sup>Te ni jito Simón Pedro jeē súcuan ni cuu. Te ni jecuiñi yití de nuū Jesús, te ni cahán de:

Cujiyo ní nuū ná, chi tēe íyó cuéchi cúu ná, áchí de.

<sup>9</sup>Chi máa de jíin táca tēe cáhiin jíin de, ni cayūhú de jeē ní canihin de cuehē chācá un ní sáha ya. <sup>10</sup>Te suni ni cayūhú Jacobo jíin Juan, ndíndúu séhe Zebedeo, chi tēe chindéé ñájnáhan jíin Simón cácuu de. Te ni cahán Jesús jíin Simón:

Ma yūhu ró, chi nde vijna te sáha ri jeē nihin rō cuehē ñayuu candíje ruhū, nájnūhun ni nihin rō cuehē chācá. Achí ya.

<sup>11</sup>Yūcuán na te nuū ni jínūcoo de jíin barco nuū ñūhun íchi, te ni castóo de ndíhi ndajniñu de, te ni candiquin de ya cuango de.

**Jeē ní nasávāha ya iin tēe ndóho cuehyī stehyú**

(Mt. 8.1-4; Mr. 1.40-45)

<sup>12</sup>Yūcuán na te íne Jesús ini iin ñuu, te ni quee iin tēe ndóho cuehyī stehyú. Te ni jito de nuū Jesús, te ni jecuiñi yití de ni jequin de nuū de nde nuū ñūhun, te ni cahán ndahú de jíin ya:

Jíní na jēe cuu sáha ní jēe nduvāha ná, te núu cúní ni, áchí de.

<sup>13</sup>Yūcuán na te ni soó yá ndaha ya siquī de, te ni cahán yā:

Cúní rī. Te na ndúvāha ró, áchí ya.

Te ná ni cahán yā súcuan, te ni nduvāha-ni tēe ndóho cuehyī stehyú un. <sup>14</sup>Te ni ndacu ya jniñu nuū de jeē ma cáchi cuiti de nuū ní iin. Te áchí ya:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí ya.

<sup>15</sup>Te víhyá gā ni jitē núu jnūhun ya cuahán. Te ni cataca cuehē ñayuu jeē cúní nahín i jnūhun stéén yā, jíin jēe nasávāha ya i nuū tāca cuéhyī cándoho i. <sup>16</sup>Te máa yá cuahán síin ya nuū tú ñayuu, te ni jicān tahú yā.

**Jeē ní nasávāha ya iin tēe ndóho cuehyī ni íjin**

(Mt. 9.1-8; Mr. 2.1-12)

<sup>17</sup>Te iin quivī te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyucú de yūcuán. Te tēe un ní quecoo de nuū yā jeē véjicoo de táca ndañúu Galilea, jíin ndañúu Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuu. <sup>18</sup>Yūcuán na te ni quecoo jecu tēe, cándiso de iin tēe ndóho cuehyī ni íjin, cátu de nuū iin camilla. Te cánducú de squíví de tēe ún ini vehe, te caquin de nuū íne ya. <sup>19</sup>Te tu ní cánihin de modo quívicoo de jíin tēe un, chi cáyucú chitú ñáyuu. Te ni cacao de siquī véhe, te ni canune de teja. Te ni cascúun de tēe cúhu un jíin camilla de nde nuū íne Jesús mēhñu ñayuu.

<sup>20</sup>Te ni jini Jesús jeē cácandíje de jeē cúu nasávaha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rī nuū tāca cuéchi ró, áchí yá.

<sup>21</sup>Yūcuán na te tēe cástéén tutu ley Yaā Dios jíin tēe grupo fariseo, ni quejéé de cájeni ni de siquī yā: ¿Ndé iin cúu tēe yáha jéé cahán de jnūhun ndevāha jeē quití ni Yaā Dios? Chi nasūo Yāā Dios cúu de jeē cóne cáhnu ni de nuū cuéchi.

<sup>22</sup>Te ni jini Jesús jeē súcuan cájeni ni de, te ni cahān yā jíin de: ¿Naun cájeni ni rō jeē cahán ndevāha ri? <sup>23</sup>Jeē uú jnūhun yáha, ¿ndé iin yíí gá cáa? ¿A jéé cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yíí gá jeē cahān rī: Ndocuiñī te caca ró, chí je ni nduvāha ró, áchí rī?

<sup>24</sup>Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni jíin ún:

Cáhán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

<sup>25</sup>Te ni ndocuiñī-ni tēe ún, jíto jínū ñayuu. Te ni naquihin de camilla nuū ni cátu de, te cuanhun de vehe de. Te nácuatáhú de nuū Yaā Dios. <sup>26</sup>Te yōhyo ni canaa ni tāca ñayuu cájito i, te ni cacahān i jeē yóhyo vāha Yaā cúu Yaā Dios. Te suni yōhyo cáyuhú i, te cacahān i:

Vijna te ni cajito yó jniñu jéhnu téyí, áchí i.

#### **Jeē ní cana ya Leví**

(Mt. 9.9-13; Mr. 2.13-17)

<sup>27</sup>Yūcuán na te ni quenda ya cuahān yā, te ni jito ya nuū iin tēe

stútú xúhun renta, naní de Leví, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

<sup>28</sup>Te ni ndocuiñī de, te ni stóo de ndíhi ndajniñu de, te cuahān de jíin yá.

<sup>29</sup>Yūcuán na te ni sáha Leví iin vico cáhnu vehe de, jeē cúsi ni de jíin Jesús. Te cuehē tēe cástútú xúhun renta jíin sava ga tēe, cáyucú de mesa cáyeji de staā jíin yá. <sup>30</sup>Te tēe grupo fariseo jíin tēe cástéén tutu ley Yaā Dios, ni quejéé de cacahān de siquī tēe cáscuáha jíin yá, te ni cacajñuhún de:

¿Najehē cáyeji rō cájihu ró jíin tēe cástútú xúhun renta jíin tēe cása ha cuéchi? áchí de.

<sup>31</sup>Te ni cahān Jesús:

Ñayuu cáhiyo vāha, tu jíni ñuhún i tēe tájné, chí ñayuu cácu hū cúu jeē jíni ñuhún. <sup>32</sup>Te ruhū nasūo jéé véji ri cana ri ñayuu tú cuéchi, jeē cúu i nájnūhun ñayuu cáhiyo vāha. Chi sa suhva véji ri cana ri ñayuu cáhiyo cuéchi, jeē na nácani ni i te stóo i cuéchi i. Achí yá.

#### **Jeē ní cacajñuhún de ya siquī jeē cóndite ni**

(Mt. 9.14-17; Mr. 2.18-22)

<sup>33</sup>Yūcuán na te ni cacahān de jíin yá:

Tēe cáscuáha jíin Juan, jíin tēe cáscuáha jíin grupo fariseo, cuehē jínu cáhiyo ndite ni de te cájicān tahu de. Te tēe cáscuáha jíin máá ní, ¿naun tu cása ha de súcuan? Chi cáyeji de cájihu de.

<sup>34</sup>Te ni cahān yā jíin de:

¿A cuu condite ni de níni jéé iyó rí jíin de? ¿A cuu sáha ró

jeē condite ni ñayuu cáhiin vico nándāha, te núu níní néne tēe nándāha? <sup>35</sup>Te quee quivī jeē cújiyo tēe ni nandāha, te quivī ún chi condite ni i. Achí yá.

<sup>36</sup>Te suni ni cahān yā uū jñūhun yátá síquī jeē tu quíjnáhan jñūhun jeé jēe steén yā jíin táca jñūhun jenahán. Achí yá:

Ni iin ñayuu tu jéhnde i iin pedazo sahma jéé i, te nachuhun i nuū iin sahma túhú i. Chi núu súcuan te stívi i sahma jéé i, te suni tu quíjnáhan jeē jeé un jíin jēe tuhú. <sup>37</sup>Te tú ni iin chūhun vino jeé ini ñii túhú. Chi núu súcuan, te vino jeé un ndatá ñii, te naa vino jíin ñii. <sup>38</sup>Chi cánuú jéé cūhun vino jeé ini ñii jéé, te súcuan te quéndōo vāha ndíndúú. <sup>39</sup>Te ñayuu cájilhi vino áva, tu cúní i coho i jeé jeé, chi jeé áva cúu jeé vāha ga, achí i. Achí yá.

### Jeē ní cataxín de yoco trigo quivī ndétátú

(Mt. 12.1-8; Mr. 2.23-28)

**6** Te iin quivī ndétātu ní yāha Jesús cuahān yā mēhñū nuū cáa trigo. Te tēe cáscuáha jíin yá ni cataxín de yoco trigo, te ni caquiin de ini ndaha de, te ni cayeji de. <sup>2</sup>Te sava tēe grupo fariseo ni cacajñuhún de:

¿Najehē casáha ró jniñu jeē tu íyó vāha sáha ró quivī ndétátú?

<sup>3</sup>Te ni cahān Jesús jíin de:

¿A tu ní cácahu cuíti rō tutu ndese ni sáha David, iin quivī jeē ni jíi de sōco jíin tēe cáhiin jíin de?

<sup>4</sup>Te ni quivī de ini vehe Yaā Dios, te ni quihín de pan iī jeē yosó ndijin nuū Yaā Dios. Te ni yeji de, te suni ni jēhe de ni cayeji tēe cáhiin jíin

de. Te tú na ley jeē cáji ni iin tēe, chi máá-ni sutū cuu caji. Te vēsú súcuan te tú na cuēchi ní íyo síquī de. Achí yá.

<sup>5</sup>Te ni cahān gā yā jíin de:

Ruhū, Yaā ní nduu tēe, máá rí cúu jeē ndácu jniñu síquī ndese sáha ñayuu quivī ndétátú, áchí yá.

### Jeē ní nduvāha tēe ni ichi ndaha

(Mt. 12.9-14; Mr. 3.1-6)

<sup>6</sup>Te inga quivī ndétátú, suni ni quivī ya ini vehe iī sinagoga, te ni steén yā jñūhun. Te yūcuan íne iin tēe ni ichi ndaha vāha de. <sup>7</sup>Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quivī ndétátú, návāha nihín de cuēchi síquī yā. <sup>8</sup>Te máá yá je jíin yā ndese cájeni ni de. Te ni cahān yā jíin tēe ni ichi ndaha ún:

Ndocuiñī, te condichi rō mēhñu yāha, áchí yá.

Te ni ndocuiñī de, te ni jecondichi de mēhñú. <sup>9</sup>Yūcuán na te ni cahān yā jíin de jíjnáhan de:

Na cájnūhun rí rohó iin jñūhun: ¿Ndese cáhán ley síquī quivī ndétátú? ¿A jéé sáha vāha yó, chí sáha néé yó? ¿A jéé nasávāha yó ñáyuu je yajni cuu, chí sáha yó jéé cúu i? Achí yá.

<sup>10</sup>Te ndéhé yá nuū de jeē cáyūcú de ní xiin ya. Te ni cahān yā jíin tēe cúhú un:

Scáá ndaha ró.

Te ni scaá de, te ni nduvāha-ni ndaha de. <sup>11</sup>Te yōhyo ni caquitī ni tāca tēe un, te ni quejéé de cándajñuhún de síquī Jesús, ndese cahni de ya.

### Jeē ní nacāji ya uxī uū tēe apóstol

(Mt. 10.1-4; Mr. 3.13-19)

<sup>12</sup>Te ni cuu jecu quivī, te ni quenda ya cuacacān tahú yā nde

yucu. Te ní niñu ni jicān tahu yā nuū Yaā Dios. <sup>13</sup>Te nuū ní cundijin, te ni cana ya tāca tée cascuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jñuhun ya. <sup>14</sup>Te yāha cúu síhví de jíjnāhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, <sup>15</sup>Mateo, Tomás, Jacobo sēhe Alfeo, Simón tēe grupo cananista, <sup>16</sup>Judas ñani Jacobo, jíin Judas Iscariote, tēe jeē ní nastúu de ya.

**Jeē ni stéén yā nuū ñáyuu cuehē**

(Mt. 4.23-25)

<sup>17</sup>Te ni nanuu ya yucu jíin táca tée un jéé cascuáha jíin yá, te ni jecuiñī yā ñin nduhvā jíin de. Te cuehē ñayuu ní región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jñuhun stéén yā, jíin jéé ndúvāha i cuehyī cándoho i. <sup>18</sup>Te ñayuu jeē ñuhun tachī ini i, suni ni canduvāha i ni sáha ya. <sup>19</sup>Te ndívii ñayuu cācuni i quehé i ya, chi súcuan ndúvāha i sáha ya jíin poder yā.

**Jñuhun ñayuu yōhoyo ndetū jíin ñáyuu jeē xeēn ndoho**

(Mt. 5.1-12)

<sup>20</sup>Te ni ndacoto ya nuū tée cascuáha jíin yá un, te ni cahān yā: Yōhoyo ndetū rohó jéé cándoho ndáhú, chi quīvī ró ñuu nuū ndácu Yaā Dios jniñu.

<sup>21</sup>Yōhoyo ndetū rohó jéé cájii sōco vijna, chi quiji quivī jeē ndutú chiji ró.

<sup>22</sup>Yōhoyo ndetū rohó jéé cándahyū rō vijna, chi quiji quivī jeē cuecú rō.

<sup>22</sup>Yōhoyo ndetū rō te núu cáquitī ni ñayuu nuū rō jeē síquī ruhū, Yaā ní nduu tēe, te casquéhichī i rōhó, te cácahān neé i nuū rō, te cácahān i jeē ñáyuu casáha jniñu neé cácuu ró. <sup>23</sup>Te na cóo síñ ni rō quivī sáha i súcuan, te víhyá gā na cúsiñ ni rō, chi cáhnu téyí coo tahu rō nde andíví. Chi suni súcuan ni casáha uhū tāca jíi i jíin tēe ni canacani jñuhun Yaā Dios nde jenahán.

<sup>24</sup>Te nacā jeē xeēn ndoho rōhó ñáyuu cucá, chi vijna-ni cúu jeē cáhīyo síñ ni rō.

<sup>25</sup>Nacā jeē xeēn ndoho rōhó ñáyuu jeē víjna cáhīyo vetū chíji ró, chi quiji quivī jeē cuu rō sōco.

<sup>25</sup>Nacā jeē xeēn ndoho rōhó ñáyuu jeē víjna cájēcū rō, chi quiji quivī jeē nducuíhyá ni rō te ndahyū rō.

<sup>26</sup>Nacā jeē xeēn ndoho tāca ró núu cájecnúhún ñáyuu rohó, chi suni súcuan ni cajejcnúhún jíi i tāca tēe ni canacani jñuhun stáhú ndé jenahán.

**Jñuhun jeē cundáhú ni yō ñayuu cájito uhū yohó**

(Mt. 5.38-48; 7.12)

<sup>27</sup>Te cáhán rī jíin rōhó jeē cájini sōho: Cundáhú ni rō ñayuu cájito uhū rohó. Te sáha vāha ró jíin ñáyuu cáquitī ni nuū rō. <sup>28</sup>Te cacān rō jeē váha coo ñayuu cácahān ndevāha síquī rō. Te cacān tahu rō jehē ñáyuu cácahān neé núu rō. <sup>29</sup>Te núu ndé tēe caní de ñin lado yiquí núu rō, te vāha ga suni cuāha ró ñga lado caní de, vēsū jeē nácuāha ró jéé ndútahū de. Te núu ndé tēe cúní de quende de ticāchi



ró, suni cuāha ró jnúhun jeē na quíhín de jíin ndé camisa rō. <sup>30</sup>Te na-ni ñayuu jicán nuū rō, te cuāha ró núu i. Te ñayuu quíhin ndajníñu ró, ma nándacān rō. <sup>31</sup>Te nájnūhun cácuuni rō jeē sáha vāha ñayuu jíin ró, suni súcuan na sáha vāha ró jíin i.

<sup>32</sup>Chi núu íyó mánī rō jíin máa-ni ñayuu jeē maní jíin ró, ¿te na vé jeē váha ga sáha ró núu súcuan? Chi nde tēe cásáha cuēchi, suni maní de jíin tēe maní jíin máa de. <sup>33</sup>Te núu sáha vāha ró jíin máa-ni ñayuu jeē casáha vāha jíin ró, ¿te na vé jeē váha ga sáha ró núu súcuan? Chi nde tēe cásáha cuēchi, suni súcuan cásáha de. <sup>34</sup>Te núu cuāha núu ró núu maá-ni ñayuu jeē ñúhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihīn tucu de. <sup>35</sup>Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núu i. Te ma cuāha ró máa síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā cujéhnu téyí. Chi máa yá vāha ni yā jíin ñáyuu tu nácuatáhú núu yā jíin ñáyuu casáha néé. <sup>36</sup>Núu súcuan te cundáhú ni rō ñayuu, nájnūhun máa Tátá ró cundáhú ni yā i.

**Ma cahán yō síquī cuēchi jnáhan yó**

(Mt. 7.1-5)

<sup>37</sup>Ma cahán rō síquī cuēchi ñayuu ndese sáha i, návāha suni ma cahán Yaā Dios cuēchi síquī rō jeē casáha ró súcuan. Ma cahán

xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. <sup>38</sup>Cuāha ró núu ñáyuu, te suni súcuan cuāha Yaā Dios nuū rō. Chi vāha ndasí cuāha ya nuū rō, nájnūhun jeē chícuāha váha ya, quisi ya, sáníhin ya, te nde scáa ya cuāha ya nuū rō. Chi cūhva jeē cájēhe ró núu ñáyuu, suni cūhva un cuāha ya nuū rō. Achí yá.

<sup>39</sup>Te ni cahán yā iin jnúhun yátá jíin i:

Tēe cástéén jnúhun tú ndaā, cácuu de nájnūhun tēe cuáá. Te iin tēe cuáá, ¿á cuu stéén de ichi nuū inga tēe cuáá? ¿A tú ñingava ndíndúú de ini xehvā? <sup>40</sup>Iin tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

<sup>41</sup>Te cuēchi jnáhan ró cúu nájnūhun jeē íne iin yāca lúlí tinūú i. ¿Te naun cásáha ró cuenta jeē súcuan, te tu cásáha ró cuenta cuēchi máa ró jeē cúu nájnūhun jeē íne iin nduhu tinūu máa ró? <sup>42</sup>¿Te naun cácahán rō jíin jnáhan ró: Condetu, na táva rī yāca íne tinūu ró, te tu cánacani ni rō jeē íne iin nduhu tinūu máa ró? Tēe stáhú-ni cácuu ró núu súcuan. Xihna gā tinūu máa ró tava rō nduhu, te yūcuán na te cuu condēhe váha ró jéé táva rō yāca tinūu jnáhan ró.

**Jíin jniñu cásáha ñayuu te nácuuni yō ndese ñayuu cácuu i**

(Mt. 7.17-20; 12.34-35)

<sup>43</sup>Tu íyó yujnu váha jeē jéhe ndehē néé, te ni tu íyó yujnu néé

jéē jéhe ndehē váha. <sup>44</sup>Chi jíin ndéhē jeē jéhe iin iin yujnu, te jíiní yō núu yujnu váha cúu. Chi tu scóyo yó ndehē higo xiní íñu, ni tu scóyo yó ndehē uva xiní yucú zarza. <sup>45</sup>Te suni súcuan tēe vāha, cáhán de jñūhun vāha, chi vāha ánuá de. Te tēe sáha néé cáhán de jñūhun néé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

### Siquī uú vehe

(Mt. 7.24-27)

<sup>46</sup>¿Najehē cácahān yinñuhún ró jíin rí: Jitoho ná, áchí ró, te tu cásquicu ró jniñu ndácu ri? <sup>47</sup>Tāca ñáyuu vēji nuū rí te jíiní sōho jñūhun cáhán rí te squicu, na stéén rí nuū rō ndese cúu i. <sup>48</sup>Cúu i nájnūhun iin tēe jeē ní jeni de vehe de, te ni jete cúnú de nde ni nihin de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiti sáha, chi siquī toto iin. <sup>49</sup>Te tāca ñáyuu jíiní sōho jñūhun cáhán rí, te tu squicu i, cúu i nájnūhun iin tēe ni jeni de vehe de nuū ñūhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa ií-ni. Achí yá jíin i jíināhan i.

### Jeē ní nasávāha ya mozo capitán

(Mt. 8.5-13)

**7** Te nuū ni jíinu ni cahān yā ni cajini nahín ñáyuu ún, te cuahān yā ñuu Capernaum. <sup>2</sup>Te iin tēe nación Roma jeē cúu capitán, íyó iin mozo de jeē maní ndasí de jíin. Te mozo un cúhú i te je yajni cuu i. <sup>3</sup>Te ni jini capitán jñūhun Jesús. Te ni tají de jecu tēe jéhu

cándacu jniñu nuū ñáyuu hebreo, cuango de nuū yā jeē cahán ndahú de jíin yá jeē na quíji ya sávāha ya mozo de. <sup>4</sup>Te ni jinūcoo tēe un núu Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chi tēe vāha cúu de. <sup>5</sup>Chi maní de jíin nación yō, te máá de ni ndacu jniñu ni cuvāha iin vehe sinagoga cuu yó. Achí de.

<sup>6</sup>Yūcuán na te cuahān Jesús jíin de jíināhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájnéñu de níhín, chi tu cújéhu de jeē quihín ni quívi ní vehe de. <sup>7</sup>Jeē yúcuan tu ní sájéhu de máá de jeē quíji de nuū ní, áchí de. Te máá jéē cahán-ni ní, te na ndúvāha-ni mozo de, áchí de. <sup>8</sup>Chi máá de suni ndíso jniñu de ni casáha tēe cácujehu ga. Te cújéhu de nuū tācá soldado de, áchí de. Te núu cáhán de jíin iin tēe jeē na quihín de, te cuahān de. Te núu cáhán de jíin inga tēe jeē na quíji de, te quíji de. Te núu ndácu de iin jniñu nuū mozo de, te sáha i, áchí de. Achí táca tēe un jíin yá.

<sup>9</sup>Te jeē ní jini Jesús jñūhun yāha, te ni naa ni yā. Te ni ndió cóto ya ni cahān yā jíin ñáyuu cuehē cándiquin yatā yā:

Jendaá cahán rí jíin ró jeē ni nación yō Israel tu ní níhín rí ni iin ñayuu candíje nihin súcuan, nájnūhun cándíje tēe ún, vēsú tēe nación tu jíin jñūhun Yā Dios cúu de. Achí yá.

<sup>10</sup>Te tēe ni tají capitán nuū yā, ni najinūcoo de vehe, te ni cajito de jeé jeé ni nduvāha mozo un.

**Jeē ní nastécu yā sēhe  
yíí ñahan viuda**

<sup>11</sup>Yūcuán na te cuahān yā iin ñuu naní Naín. Te tēe cáscuáha jíin yá, jíin ñáyuu cuehē, suni cuangoo i jíin yá. <sup>12</sup>Te ná ni cuyajni ya yuñúú ún, te yūcuan ní quendacoo ñayuu jeē quíchindūji i iin tēe suchí jée ni jíihī. Te máñuhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. <sup>13</sup>Te ná ni jito máá Jítóho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

<sup>14</sup>Yūcuán na te ni jinū yā nde nuū ndíyí ún, te ni jnií ya yejnū, te ni cajecuiñī tēe cándiso ún. Te ni cahān yā jíin súchi ní jihī:

Cáhán rī jíin ró, ndocuiñī, achí yá.

<sup>15</sup>Yūcuán na te ni nucōo sūchi ní jihī ún, te ni quejée i nácahān i. Te ni nacuāha ya i nuū naná i. <sup>16</sup>Te ndívii ñayuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cácahān i:

Mēhñu yó ni quee iin tēe cújéhnu nácani jñuhun Yaā Dios.

Te suni cácahān i:

Máá Yaā Dios ni quejée yá chindée ñáhán yá ñayuu yā. Achí i.

<sup>17</sup>Te ni jitē núu jñuhun ya ní cáhnu región Judea jíin táca región yajni yūcuán.

**Jeē ní tají Juan uū tēe nuū yā**

(Mt. 11.2-19)

<sup>18</sup>Te íne Juan vecāa, te tēe cáscuáha jíin de ni cacastūhun núu de jeē súcuan ni cuu táca jniñu yáha. <sup>19</sup>Te ni cana Juan uū

tēe ún, te ni tají de cuangoo nuū Jesús, návāha cajñuhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. <sup>20</sup>Te ni jinūcoo tēe un núu yā, te ni cacahān de:

Juan tēe scuándute ni tají de sãña véjicoo ná cajñuhun ná nihín núu máá ní cúu Cristo jeē achí tutu jeē quíji, chí condetu yó inga tēe quiji. Achí de.

<sup>21</sup>Te máá hora un ní nasávāha ya cuehē ñayuu cácuñū, jíin ñáyuu cándoho cuehyī xeēn, jíin ñáyuu ñuhun tachī ini. Te suni cuehē ñayuu cuaá ní ndundijin tinūú i ni sáha ya. <sup>22</sup>Te ni cahān yā jíin de:

Cuángoo te castūhun ró nuū Juan tãcá jniñu ni cajito ró jíin jñuhun ni cajini ró. Te cachi rō nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jñuhun nuū ñáyuu ndahú jée jnama Yaā Dios i. <sup>23</sup>Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

<sup>24</sup>Te ná cuanuhun ndindúú tēe ún, te ni quejée Jesús cahān yā jñuhun Juan jíin ñayuu:

¿Na vé ni jécondēhe ró jijnáhan ró ndé nuū ñuhun téhé? ¿A iin tēe jéni iin jéni uū ni, nájnūhun ite jeē cánda sáha tachī? <sup>25</sup>Te núu tuú, ¿te na vé ni jécondēhe ró núu súcuan? ¿A iin tēe cúní cújéhnu jeē ñuhun sahma lúu? Tuú chí cájini rō jeē tēe cáñuhun sahma lúu te cánducú táca jée cúsiñi ni, máni ini vehe rey

cáyūcú de. <sup>26</sup>¿Te na vé ni jécondēhe ró núu súcuan? ¿A ìin tēe nácani jnūhun Yaā Dios? Cáhán rī jíin ró jeē suu ni jecondēhe ró. Te cújēhnu ga Juan yáha vēsú tāca gá tēe ni canacani jnūhun Yaā Dios. <sup>27</sup>Chi jnūhun Juan cúu jeē ni cáhān Yaā Dios jeē yosó núu tútu ii:

Tají rí tēe nacani jnūhun rī  
cosnūu de ichi núu Cristo,  
návāha coo tūhva ñayuu jeē  
jinú yā.

Achí Yaā Dios, achí tutu. <sup>28</sup>Te cáhán rī jíin ró jeē ini ñayīvi yáha cújēhnu ga Juan tēe scuándute vēsú tāca gá tēe jeē ni ìyo ini ñayīví. Te vēsú súcuan te tāca tēe núu ga ini ñuu nuū ndácu Yaā Dios jniñu, cújēhnu ga de vēsú Juan. Achí yá.

<sup>29</sup>Te tāca ñáyuu jíin tāca tēe cástútú xūhun renta, ni cajini i jnūhun cáhān yā, te ni cajetáhú i jeē Yaā ndaa cúu Yaā Dios, chi je ni cajendute i nuū Juan. <sup>30</sup>Te tēe grupo fariseo jíin tēe cástéén tutu ley, ni casquéhichī de jnūhun jeē cuní Yaā Dios sáha ya jeē váha de, chi tu ní cājendute de nuū Juan.

<sup>31</sup>Te ni cahān gā maá Jítóho yō:

Yáhá cachi rī ìin jnūhun yátá návāha na cúní rō ndese cúu ñayuu tiempo vijna. <sup>32</sup>Cúu i nájñūhun sūchí lúlí cáhiin nuū yáhu cácasíquf i. Te cácana ndee i xiní jnáhan i: Ni cativi rī scuilí, te tu ní cájita jéhe ró. Te ni cajita rī yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúlí un jéē tu ní núnjahan ni i ni ìin, suni súcuan cándāa ró. <sup>33</sup>Chi ni quiji Juan tēe scuándute, te cuehē jínu ni ìyo ndite ni de, tu ní yéji de staā ni tu ní jíhi de vino. Te tu ní

cánujnahan ni rō, chi ni cacahān rō jeē ñūhun tachī ini de. <sup>34</sup>Yūcuán na te ni quee maá rí, Yaā ní nduu tēe, te yéji rī jíhi rī, te tu cánujnahan ni rō, te chísóó jnūhun ró cácahān rō jeē máni maá jéē yéji rī jíhi rī vino. Te quíjnáhan rī jíin tēe cástútú xūhun renta jíin tāca gá tēe cásáha cuēchi, áchí ró. <sup>35</sup>Te núu cúndichí ìin tēe jíin jnūhun Yaā Dios, te jíin jniñu sáha de te cājini tāca gá tēe ndíchí jeē ndichí de. Achí yá.

**Jeē ìne Jesús vehe Simón tēe fariseo**

<sup>36</sup>Te ìin tēe fariseo ni cana de Jesús jeē cájí yā staā jíin de. Te ni jinū yā vehe de, te ni cucōo ya mesa jeē cájí yā staā. <sup>37</sup>Yūcuán na te ìin ñahan sáha cuēchi, ndéé ña ñuu yúcuán, te ni jini ña jeē ni jíin Jesús vehe tēe fariseo un, yéji yā staā. Te ni quee ña jíin ìin frasco yuū luu jeē ñūhun chitú aceite perfume. <sup>38</sup>Te íin yítí ña nuū jehé yā, te ndáhyú ña. Te ni quejéé ña stáji ña jehé yā jíin ndute t́núú ña, te ni nasíchí ña jíin ixi xíní ña. Te ni techūhú ña jehé yā, te ni chuhun ña perfume un. <sup>39</sup>Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jéni ni de. <sup>40</sup>Yūcuán na te ni cahān Jesús jíin de:

Simón, cúní rī cahān rī jíin ró ìin jnūhun.

Te ni cahān maá de:

Cahān ní, Maestro.

<sup>41</sup>Te ni cahān Jesús:

Ìin tēe jéhe núu xūhún, ni ìyo uū tēe táu nuū de. Ìin de ni cotaū uhūn

ciento denario, te inga de ni cotaū uū xico uxī denario. <sup>42</sup>Te tú na vé cánevāha tēe un jēē náchunaa de. Te tēe jēhe núu xūhun ní ine cáhnu ni de nuū ndíndúú tēe ún. Núu súcuan te cachi rō: Jeē ndíndúú tēe ún, ¿ndé iin de coo maní gā jíin de? Achí yá.

<sup>43</sup>Te ni cahān Simón:

Jéni ni na jēē tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

<sup>44</sup>Te jító ya nuū ñahan ún, te ni cahān gā yā jíin Simón:

¿A jító ró na vé sáha ñahan yáha? Jeē ní quee rī vehe ró, te tu ní jēhe ró ndute jeē ndúndoo jehē rī nájñuhun íyó costumbre. Te ñahan yáha ní stáji ña jehē rī jíin ndute tñnúú ña, te ni nasíhí ña jíin ixi xíní ña. <sup>45</sup>Te tu ní téchūhu ró ruhū nájñuhun íyó costumbre. Te ñahan yáha, nde jeē ni quívi ri vehe ró, tu jécuiñī ña jeē téchūhú ña jehē rī.

<sup>46</sup>Te tu ní chūhun ró aceite xiní rī nájñuhun íyó costumbre. Te ñahan yáha ní chuhun ña aceite perfume jehē rī. <sup>47</sup>Núu súcuan te cáhán rī jíin ró jeē ni stéén ña jeē yóhyo maní ña jíin rí siquī jeē íne cáhnu ni rī nuū tāca cuéchi ña, vēsú cuehē cúu. Te núu cone cáhnu ni rī nuū iin ñayuu iyó jecu-ni cuéchi, te jecu-ni stéén i jeē maní i jíin rí, achí yá.

<sup>48</sup>Te ni cahān yā jíin ña:

Je íne cáhnu ni rī nuū tāca cuéchi ró, achí yá.

<sup>49</sup>Yūcuán na te ñayuu cáyeji staā jíin yá, ni quejéé i cácahān maá i:

¿Nde iin ga cúu tēe yáha jéé cahán jeē íne cáhnu ni nuū cuéchi? achí i.

<sup>50</sup>Te Jesús ni cahān gā yā jíin ñahan ún:

Ni candíje ró rúhū, te jeē yúcuán ní jnama ri rohó. Cuáhán te na ndúsiñ ni rō. Achí yá.

**Jñuhun ñahan ní cajejníñu nuū yā**

**8** Yūcuán na te ni cuu jecu quivī, te ni jica cuu Jesús tācá ñuu náhnu jíin ñuu lulí. Te nácani ya jñuhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíin yá. <sup>2</sup>Te suni íyó jecu ñahan cájica jíin yá, jeē ní quenehen ya tachí ini sava ña, te ni nasávāha ya sava ña jeē cándoho cuehyī. Te iin ña cúu María ñuu Magdala, te ini ñahan un ní quenehen ya uxā tachí. <sup>3</sup>Te inga ña cúu Juana, ñasihí Chuza, tēe ndíso jníñu ini vehe Herodes. Te inga ña cúu Susana, jíin cuéhē gā ñahan jeē cáchindéé ñáhán ña, jēhe ña tāca jéé jíni ñúhún yá jíin de jíjnáhan de.

**Jñuhun yátá síquī tēe jéte trigo**

(Mt. 13.1-9; Mr. 4.1-9)

<sup>4</sup>Te cuehē ñayuu tācá ñuu yūcuán ní jinūcoo i nuū Jesús. Te ni cacutútú cuéhē ndasí ñáyuu, te ni cahān yā iin jñuhun yátá jíin i:

<sup>5</sup>Iin tēe cate trigo, ni quenda de jeē cáte de. Te ná ni quejéé de jéte de, te jecu trigo ni jité yuhíchi. Te ni cajeñū ñayuu siquī, te ni cayejí saa. <sup>6</sup>Te jecu gā ni jité nuū ñuhun yuū. Te ni cane, te ni ichī-ni, chí tú cuehē cajin. <sup>7</sup>Te jecu gā ni jité nuū náne iñu. Te inuú-ni ni canecoo iñu jíin, te ni jesí nuū. <sup>8</sup>Te jecu ni jité nuū ñuhun váha. Te nuū ní jehnu, te ni jēhe cuehē nuní, chí jeē iin iin ni jēhe nde ciento. Achí yá.

Yūcuán na te ni cahān jee ya:  
Tāca rōhó jēē jíni sōho, na  
chūsóhó ró, achí yá.

**Najehē cahán yā máni jnūhun yátá**

(Mt. 13.10-17; Mr. 10-12)

<sup>9</sup>Te tēe cáscuáha jíin yá ni  
cacajnúhún de ya na vé cuní cahān  
jnūhun yátá yáha. <sup>10</sup>Te ni cahān yā:

Róhó jíjnáhan ró, chí sáha Yāā  
Dios jeē cájēcūhun ni rō jnūhun ni  
yisáhi yáha, ndese quívicoo ñayuu  
ndaha Yāā Dios jeē ndacu ya jniñu  
nuū i. Te máni jíin jnúhun yátá  
cáhán rī jíin sava ga i, návāha vēsú  
cájito i, te quéndōo i nájnúhun jeē  
tú na vé ni cájito i. Te vēsú cájini  
sōho i, te ma jécūhun ni i.

**Jeē ní castūhun cájí yá jnūhun yátá  
téé jéte trigo**

(Mt. 13.18-23; Mr. 4.13-20)

<sup>11</sup>Jnūhun yátá yáha cúní cahān:  
Trigo un cúu jnūhun Yāā Dios.  
<sup>12</sup>Te trigo jeē ní jítē yuhíchi cúu  
nájnúhun ñayuu cájini sōho jnūhun,  
te quíji-ni jexeén te quénde-ni  
jnūhun ini anuá i, návāha ma  
candíje i te ma jnáma rī i. <sup>13</sup>Te  
trigo jeē ní jítē nuū ñūhun yuū cúu  
nájnúhun ñayuu cájini jnūhun, te  
cájetáhú i te cácusī ni i jíin. Te tu  
cúcutú jnúhun ún ini anuá i. Te  
jecu-ni quívī cácandíje i, te núu  
ni quejéé jnúndóho, te cájica yátá  
i. <sup>14</sup>Te trigo jeē ní jítē nuū nāne  
iñu cúu nájnúhun ñayuu cájini  
jnūhun, te cuango i te cácujnēñu  
i jíin jniñu i jíin jēē cuní i cucúca  
i te coo sī ni i. Te tu íje i jíin  
jnūhun ya. <sup>15</sup>Te trigo jeē ní jítē nuū  
ñūhun váha cúu nájnúhun ñayuu  
cájini nahín jnúhun ya, te cájni

vāha i, chí íyó váha íyó ndāā anuá  
i. Te cáhije i jíin jnúhun ya, chí  
cácandíje vāha i.

**Jnūhun yátá síquī lámpara**

(Mr. 4.21-25)

<sup>16</sup>Núu nástíin ñayuu iin lámpara,  
te tu jési i ni iin síquī, ni tu jéni i  
chíji jíto. Chí sa suhva jéni i nuū  
sucún, návāha cundíjin nuū ñáyuu  
quívicoo vehe. <sup>17</sup>Te suni súcuan  
tu íyó ni iin jnūhun sáhi jēē ma  
cúni ñayuu, chí ndíhi tāca jnúhun  
cácahān i nane ndíjin te cuni ñayuu.

<sup>18</sup>Núu súcuan te na cúni sōho  
vāha ró, chí ñayuu je jécūhun  
ni, stéén gā yā nuū i. Te ñayuu tu  
cándíje, máá jecu jeē jéni ni i jeē  
jini i, sa suhva naa. Achí yá.

**Náná yā jíin ñani yā**

(Mt. 12.46-50; Mr. 3.31-35)

<sup>19</sup>Yūcuán na te ni quee naná yā  
jíin táca ñani yā nuū íne ya. Te  
tu ní cúu quívicoo ña nuū yā síquī  
jeē chítú ñayuu. <sup>20</sup>Te iin ñayuu ni  
castūhun núu yā:

Náná ni jíin táca ñani ni cáhiin  
nuū quéhe, te cácuni cahān jíin ní,  
áchí i.

<sup>21</sup>Te ni cahān maá yá:

Suni náná rī jíin ñani rī cácuu  
ñayuu cájini sōho jnūhun Yāā Dios  
te cáscuicu i, achí yá jíin i.

**Jeē ní jecuñī tachī níhin jíin mar ni  
sáha ya**

(Mt. 8.23-27; Mr. 4.35-41)

<sup>22</sup>Te iin quívī ni quívī ya iin  
barco jíin téé cáscuáha jíin yá, te ni  
cahān yā jíin de:

Na yáha yó quíhīn yō inga lado  
mar.

Te ni cascáca de barco cuangoo de. <sup>23</sup>Te níní cascáca de barco, te ni quixí yā. Te ni jequĩhi ñin tachí níhin nuū mar, te je yajni chitú ndute ini barco, te ndúcú quee barco. <sup>24</sup>Te ni castóna de ya, te ni cacahān de:

Maestro, Maestro, vijna te quee yó chíji ndute te naa yō, achí de.

Te ni ndocuĩñi-ni ya, te ni cahān yā nuū tachí níhin jíin núū mar. Te ni cajecuiñi-ni, te ni cuu nayúú íi-ni. <sup>25</sup>Te ni cahān yā jíin tée cáscuáha jíin yá:

¿Naun tu cácaandíje ró?

Te máá de yōhyo ni cayūhú de, te cánaa ni de, te cácahān de jíin jnáhan de:

¿Ndé ñin ga cúu tēe yáha jéē nde nuū tachí níhin jíin núū ndúte ndácu de jniñu te cájetáhu jéē cahān de? Achí de.

### Tēe Gadara jeē ndóho tachí

(Mt. 8.28-34; Mr. 5.1-20)

<sup>26</sup>Yūcuán na te ni cane ya jíin de región Galilea, te cuahān yā región Gadara jeē ñne inga lado mar Galilea. <sup>27</sup>Te nuū ní nanuu ya nuū ññhun íchi, te ñin tēe ñuu un ní quee de nuū yā. Te je ni cuu cuehē cuiyā ññhun cuehē tachí ini de. Te tu ññhun cuiti de sahma, ni tu ndéé de vehe, chi sa suhva nuū cáyindūji ndīyi ndéé de. <sup>28</sup>Te ná ni jito de nuū Jesús, te ni jecuiñi yití de nuū yā, te ni cana cóhó de:

¿Naun vēji ní núū ná, Jesús Sēhe Yaā cujéhnu téyí? Cáhān ndahú ná jíin ní jeē ma stóho ní sáña, achí de.

<sup>29</sup>Súcuan ni cahān de, chi je ni ndacu ya jniñu nuū tachí un jéē na quéndacoo ini de. Te ni cuu cuehē

jínu sáha xeēn tachí jíin de. Te cájihni ñayuu ndaha de jehē de jíin cadena, návāha tú na vé sáha de. Te ndihí-ni jéhnde de, te jínu de jéhén de nde nuū ññhun téhé sáha tachí ún. <sup>30</sup>Te Jesús ni cajñuhun yá de:

¿Na vé naní ró?

Te ni cahān de:

Legión naní ná.

Súcuan ni cahān de jeē naní de, chi ññhun cuehē tachí ini de. <sup>31</sup>Te ni cacahān ndahú táchi un jíin yá jeē ma tají yá quihín ini tñhñchi cúnú. <sup>32</sup>Te yucu yúcuan cáhiin cuehē quĩnī cájitu ti. Te tachí jeē cáñuhun ini tēe un ní cacahān ndahú jíin yá jeē na cuáha ya jññhun quĩvicoo ini quĩnī ún. Te ni jēhe ya jññhun. <sup>33</sup>Te ni quendacoo tachí ún ini tēe ún, te ni quĩvicoo ini quĩnī. Te quĩnī un ní cajinu ti ni ñingoo ti ñin yucáva, ni quĩvicoo ti nuū mar, te ni ndaquĩhi ti ndute, ni cajihí tī.

<sup>34</sup>Te tēe cándito ti ni cajito de jeē súcuan ni cuu, te ni cayūhú de. Te ni cajinu de cuacastūhún de nuū ñáyuu ñuu un jíin ñáyuu tāca rancho. <sup>35</sup>Te cuangoo ñayuu un cuácondéhé i na vé ni cuu. Te ni jinūcoo i nuū ñne Jesús. Te ni cajito i nuū tēe ní quendacoo tachí ini, néne de nuū jehé Jesús, te ññhun de sahma, te je ni nducájí xíní de. Te ni cayūhu ñáyuu ún. <sup>36</sup>Te tēe ní cajito ni canacani de jññhun nuū ñáyuu, ndese ni nduvāha tēe ni ññhun tachí ini.

<sup>37</sup>Yūcuán na te tāca ñáyuu ní región Gadara, ni caquejéé i cácahān ndahú i jíin yá jeē na cújiyo ya quihín yā, chi yōhyo cáyūhú i. Te ni ndīvi ya ini barco

jeē quínuhun yā. <sup>38</sup>Te tēe jeē ní quendacoo tachī ini, ni cahān ndahú de jíin yá jeē na cuáha ya jnūhun quihīn de jíin yá. Te Jesús ni cahān yā jeē na quéndōo de, te áchí yá:

<sup>39</sup>Cuánuhun vehe ró, te nacani ró jnūhun ndese yōhyo jéhnū jniñū ni sáha Yaā Dios jíin ró, achí yá jíin de.

Te cuahān de, te ni nacani de jnūhun níñū ūn, ndese yōhyo jéhnū jniñū ni sáha Jesús jíin de.

**Jnūhun sēhe síhí Jairo jíin ñahan ní quehé yusáhma ya**

(Mt. 9.18-26; Mr. 5.21-43)

<sup>40</sup>Te nuū ní najinū Jesús inga lado mar, te ñayuu un ní cacusiñi ni i jeē ní najinū yā, chi ndihī i cándetu i ya. <sup>41</sup>Te ni quee ñin tēe cújéhnū ini vehe i sinagoga, naní de Jairo. Te ni jecuiñi yití de nuū jehé yā, te ni cahān ndahú de jíin yá jeē na quihín yā jíin de vehe de. <sup>42</sup>Chi íyó ñin sēhe síhí de jeē mañúhún-ni i nuū de, te íyó i nájnūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquin i ya, te ni chitú níhin i xiin ya cuangoo i.

<sup>43</sup>Te mēhñū ñayuu un cuahān ñin ñahan cúhú jeē ní cuu uxī uū cuiyā ndóho ña cuehyī niñi. Te ni jexin ña tāca jēe névāha ña jíin tēe tájna, te tu ní ndúvāha ña sáha ni ñin de. <sup>44</sup>Te ni quee ña ichi yátá yā, te ni quehé ña yusáhma ya. Te ni jecuiñi-ni niñi ña.

<sup>45</sup>Yūcuán na te ni cahān Jesús: ¿Ndé ñin ni quehé sahma ri? achí yá.

Te ndivii i ni cacahān jeē tu ní quehé i. Te Pedro jíin tēe cáhiin jíin de, ni cacahān de:

Maestro, jíto ní jēe ñayuu cuehē yāha ní chitú níhin i xiin ní, te cáquihī i níhin, te cájnūhun ní ndé ñin ni quehé sahma ní.

<sup>46</sup>Te ni cahān Jesús:

Tuú chi ñin ñayuu ni quehé sahma ri, chi ni jini ri jeē jíin fuerza ri ni nduvāha ñin ñayuu, achí yá.

<sup>47</sup>Te ni jini ñahan un jēe tu ní cúu coo yuhu jeē ni sáha ña. Te quísi i ña ni quee ña, te ni jecuiñi yití ña nuū jehé yā. Te jíto jínúū tāca ñayuu, te ni cachi cají ña najehē ni quehé ña yusáhma ya, jíin jēe ní nduvāha-ni ña. <sup>48</sup>Te ni cahān yā jíin ña:

Séhē, ni candíje ró jēe cuu nasávāha ri rohó, te jeē yúcuan ní nduvāha ró. Cuahán te na ndusiñi ni rō, achí yá.

<sup>49</sup>Te níni cáhán gā yā súcuan, te ni quee ñin tēe vēji vehe Jairo, tēe cújéhnū ini sinagoga, te ni cachi nuū de:

Je ni jihī sēhe síhí ní. Te ma sájnēñū ga ní Maestro, achí de.

<sup>50</sup>Te ni jini Jesús jnūhun yāha, te ni cahān yā jíin Jairo:

Ma yūhu ró, chi candíje-ni ró, te nastēcu rī sēhe ró, achí yá.

<sup>51</sup>Te ni jinū yā vehe, te tu ní jēhe ya jnūhun quivi ñayuu jíin yá, chi máa-ni Pedro jíin Juan jíin Jacobo jíin tátá naná sūchi síhí un. <sup>52</sup>Te cácuuíhyá ni ndihī ñayuu cáyūcú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan ró. Tu ní jíhí i, chi quixí-ni i, achí yá.

<sup>53</sup>Te ni cajecū catá i jeē ni cáhán yā, chi cájini i jeē ni jihī sūchi síhí un. <sup>54</sup>Yūcuán na te ni jniñi ya ndaha i, te ni cahān jee ya jíin i:



Síhī, ndocuiñī, achí yá.

<sup>55</sup>Te ni natecu i, te ni ndocuiñī-ni i. Te ni ndacu ya jniñu jeē na cuáha ña jeē cáji i. <sup>56</sup>Te tátá i náná i yōhyo ni canaa ni de cájito de. Te ni ndacu nihin ya jniñu nuū de jeē ma cáchi de nuū ni ñin jeē súcuan ni cuu.

**Jeē ní tají yá ndihúxí uū de cuanacani de jñūhun**

(Mt. 10.5-15; Mr. 6.7-13)

**9** Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachī ini ñayuu, jíin jēe nasávāha de ñayuu cácuñu. <sup>2</sup>Te ni tají yá de quingoo de jeē nácani de jñūhun ndese ndácu Yaā Dios jniñu, jíin jēe nasávāha de ñayuu cácuñu. <sup>3</sup>Te ni cahān yā jíin de:

Ma cóndiso ró jēe cuajniñu ró ichi, ni vara, ni ñunu, ni staā, ni xūhún. Te quihīn rō jíin ñin-ni camisa, te ma cóndiso ró inga. <sup>4</sup>Te na-ni vehe núu ni quivicoo ró, te yūcuán coyūcu ró nde quenda tucu ró quihīn rō inga ñuu. <sup>5</sup>Te núu ñin ñuu tu cájetáhú i róhó, na quéndacoo ró yúcuan, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

<sup>6</sup>Te ni quendacoo de cuahān de, ni cajica nuu de tēcá ñuu, ni canacani de jñūhun jnáma Yaā Dios ñayuu. Te tēcá lado ni canasávāha de ñayuu cácuñu.

**Jeē ni jíhi Juan tēe scuándute**

(Mt. 14.1-12; Mr. 6.14-29)

<sup>7</sup>Te Herodes, tēe cúu gobernador, ni jini jñūhun de tēcá jniñu sáha

Jesús. Te ni cunéé ni de, chi cájeni ni sava ñayuu cácahān i jeē Juan ni natecu de. <sup>8</sup>Te sava ga i cácahān jeē ní nane Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun ya nde jenahán, ní natecu de. <sup>9</sup>Te ni cahān Herodes:

Juan chi ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jíin jñūhun ri jeē sáha de jniñu jéñu? Achí de.

Te ni nducú Herodes modo coto de nuū Jesús.

**Jeē ni scáji yā uhūn mil tēe**

(Mt. 14.13-21; Mr. 6.30-44; Jn. 6.1-14)

<sup>10</sup>Te ni ndecoo tēe cácuu apóstol jeē ní tají yá ni canacani jñūhun. Te ni cacachi de nuū yā tēcá jniñu ni casáha de. Te ni jeca ya de cuahān síin ya jíin de ñin lugar nuū tú ñayuu, yajni ñuu Betsaida. <sup>11</sup>Te ni cajini ñayuu, te suni cuangoo i. Te ni jetáhú yá i, te ni nacani ya jñūhun ndese ndácu Yaā Dios jniñu, te ni nasávāha ya ñayuu cácuñu.

<sup>12</sup>Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quingoo i tēcá ñuu jíin tēcá rancho yajni yāhá, te nducú i nuū ndóo i te cuaan i jeē cáji i, chi tú na vé iyó yáha, achí de.

<sup>13</sup>Te ni cahān yā jíin de:

Cuáha máá ró jeē cáji i, achí yá.

Te ni cacahān de:

Tú na vé cánevāha ná, chi uhūn-ni staā jíin úū-ni chácá. Te vēsú núu quicuaan ná stāá caji ndihī ñayuu cuehē yáha, te ni ma cúu, achí de.

<sup>14</sup>Chi íyó nájñuhun uhūn mil tēe. Te ni cahān yā jíin tēe cáscuáha ún:

Cahān jíin ñáyuu na cúcoo sñin cincuenta cincuenta i, áchí yá.

<sup>15</sup>Te súcuan ni casáha de, te ni cacucōo ndíhi ñáyuu. <sup>16</sup>Te ni quihin ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahu cuéché yá staā ún, te ni jēhe ya nuū tēe cáscuáha jíin yá, te ni casaja de nuū ñáyuu cuehē. <sup>17</sup>Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jīca.

**Jeē ní cahān Pedro jeē Jesús cúu Cristo**

(Mt. 16.13-19; Mr. 8.27-29)

<sup>18</sup>Te ñin quiví ni cusñin Jesús, jíicán tahu yā, te máa-ni tēe cáscuáha un cáhiin de jíin yá. Te ni cajñuhun yá de:

Ruhū, ¿ndé ñin cúu ri cácahān ñáyuu? achí yá.

<sup>19</sup>Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñuhun Yaā Dios nde jenahán. Te sava ga i cácahān jeē inga tēe ni nacani jñuhun ya ni natecu de.

<sup>20</sup>Yūcuán na te ni cajñuhun yá de:

Te máa ró, ¿ndé ñin cúu ri cácahān rō?

Te ni cahān Pedro:

Máa ní cúu Cristo, Yaā ní tají Yaā Dios, achí de.

**Jeē ní castühún Jesús jeē cúu yā**

(Mt. 16.20-28; Mr. 8.30-9.1)

<sup>21</sup>Yūcuán na te ni ndacu ñihin ya jñiñu nuū de jeē ma cáchi de

jñuhun yáha núu ní ñin ñáyuu. <sup>22</sup>Te ni cahān yā:

Máa rí, Yaā ní nduu tēe, cánuú ndoho xeēn rī. Te tāca tēe jéhnú jíin sūtú cácujehnú jíin tēe cástéén tutu ley, squéhichí de ruhū. Te cahni de ruhū, te nuū uní quiví te natecu rī, achí yá.

<sup>23</sup>Yūcuán na te ni cahān yā jíin ndíhi de:

Na-ni ñáyuu núu cúní i condiquin i ruhū, na cási i jeē cuní máa i, te na cóndiquin i ruhū tāca quiví, te cuāha i jñuhun ndoho i jñundóho jeē siquí rī, vēsú na cúu i. <sup>24</sup>Chi núu ndé ñáyuu cuní i cācu i nuū jñundóho quiji nuū i jeē siquí ruhū, núu súcuan te jnahñu ndetū i ñí cáni. Te núu ndé ñáyuu, vēsú na cúu i jeē siquí ruhū, te cotecu i ñí cáni. <sup>25</sup>¿Chi ndé cuajñiñu vēsú na cúndeyí ñáyuu ñihin i ñí ñáyiví, te núu squiví i máa i nuū jnahñu ndetū i ñí cáni? <sup>26</sup>Chi núu na-ni ñáyuu cúcanu i jeē siquí ruhū, Yaā ní nduu tēe, jíin síquí jñuhun cáhán rī, suni súcuan cucanu rī jeē siquí máa i, quiví ndíji ri. Te quiví ún chi yōhyo luu cujéhnú ri, nájñuhun cújéhnú Tátá rī, te suni cácujehnú ndajéhé ndoo ya sáha ya. <sup>27</sup>Te jendaá cahán rī jíin ró jeē sava tēe cáhiin yáhá, ma cúu de chi nde cuni de jeē ndácu Yaā Dios jñiñu jíin poder yā. Achí yá.

**Jeē tucu ni nduu ya**

(Mt. 17.1-8; Mr. 9.2-8)

<sup>28</sup>Yūcuán na te nájñuhun nuū uná quiví jeē ni cáhān yā jñuhun yáha, te ni caa ya ñin yucu, cuacacān tahu yā. Te Pedro jíin Jacobo jíin Juan cuango de jíin yá. <sup>29</sup>Te níni

jícán tahú yā, te tucu ni nduu nuū yā, te sahma ya ni nducujín quiyi, te ndíndēé. <sup>30</sup>Yūcuán na te ni canecoo uū tēe, cándajnuhún de jíin yá. Te cúu de Moisés jíin Elías, tēe ni cahīyo jenahán. <sup>31</sup>Te luu ndíndēé de cáhiin de, te ni cacahān de jíin yá siquī jeē ní cuyajni cuu yā ñuu Jerusalén. <sup>32</sup>Te Pedro jíin tēe cáyūcu jíin de, yōhyo cájii de máhna, te vēsú súcuan te tu ní cáquixi de. Te ni cajito de jeē lúu ndíndēe yá jíin ndíndúu tēe cáhiin jíin yá. <sup>33</sup>Te nuū ní cacujio tēe un nuū yā, te ni cahān Pedro jíin yá:

Maestro, nacā jeē váha jeē cáhiin ná yáha. Te na sáha ná únī vehe ramada, ñin cuu máá ní, ñnga cuu Moisés, te ñnga cuu Elías, achí de.

Te tu sáha de cuenta na vé cúu jeē cahán de. <sup>34</sup>Te níni cáhán de súcuan, te ni quee vicō nūhun ní jesi nuū de jíināhan de. Te ni cayūhú de jeē cáhiin de chiji vicō ún. <sup>35</sup>Te nuū vicó un ní cahān ñin jnūhun:

Yāha cúu Sēhe ri jeē maní ndasí rí jíin. Te na cúni nahín ró jnūhun cáhán yā, achí.

<sup>36</sup>Te nuū ni jínu ni cahān jnūhun ún, te máá ñin na Jesús ín ya nuū de. Te máá de tu ní cacahān cuiti de, te tāca quívī ún tu ní cacachi de nuū ni ñin jeē súcuan ni cajito de.

**Jeē ní nasávāha ya ñin sūchi ñūhun tachī ini**

(Mt. 17.14-21; Mr. 9.14-29)

<sup>37</sup>Te ñnga quívī un ní nanuu ya yucu jíin de. Te cuehē ñayuu ní jijnahan i ya. <sup>38</sup>Te mēhñu ñayuu cuehē un ní cana jee ñin tēe:

Maestro, jícán tahú na nuū ni jéē condēhe ní sēhe yíí ná, chi máñúhún i nuū ná. <sup>39</sup>Te máni jeē sáha xeēn tachī jíin i, te cána cóhó i sáha, te jéhni yīhí i, te jée tiñū yuhu i. Te yōhyo stóho i, te yōhyo uhū siaá i. <sup>40</sup>Te ni cahān ndahú ná jíin tēe cáscuáha jíin ní jeē na quénehen te tachī ún, te tu ní cúu sáha de, achí de.

<sup>41</sup>Te ni cahān yā jíin de jíināhan de:

Ñayuu yōhyo ñihni ni cácuu ró, chi tu cácandíje ró jéē cuu nduvāha i. ¿Nasaa ga quívī condee rí jíin ró jeē cuándeyí ní rí jíin ró? Cuáquihin sēhe ró na quíji i, achí yá.

<sup>42</sup>Te níni véji i nuū yā, te ni cotúu i ni sáha tachī, te ni jehni yīhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i. <sup>43</sup>Te ndívii ñayuu nahán ní canaa ni i cájito i jeē yóhyo jéhnu jniñu sáha Yāā Dios.

**Jeē ni cáhān tucu ya jeē cúu yā**

(Mt. 17.22-23; Mr. 9.30-32)

Te níni canaa ni i cájito i tāca jniñu ni sáha Jesús, te ni cahān yā jíin tēe cáscuáha jíin yá:

<sup>44</sup>Chuhun vāha ni rō jnūhun cáhán rí yāhá, te ma náā ni rō, chi ruhū, Yāā ní nduu tēe, nastúu i ruhū quívī ri ndaha tāca tēe xeēn, achí yá.

<sup>45</sup>Te tu ní cájēcūhun ni de jnūhun cáhán yā, chi tu ní cúu cuiti jecūhun ni de. Te ni cayūhú de cajnuhún de ya siquī jnúhun ni cahān yā.

**Ndé ñáyuu cúu jeē cújéhnua ga***(Mt. 18.1-5; Mr. 9.33-37)*

<sup>46</sup>Yūcuán na te tēe cáscuáha jíin yá ni caquejéé de cácahān de siquī núu ndé iin de cújéhnua ga. <sup>47</sup>Te Jesús ni jini yā jeē súcuan cájeni ni de. Te ni jni ya ndaha iin sūchi lúli, te ni jeni ya i xiin ya. <sup>48</sup>Te ni cahān yā jíin de:

Na-ni ñayuu núu jeē siquí ruhū jetáhú i sūchi lúli yáha, te ruhū jetáhú i. Te ñayuu jetáhú rúhū, suni jetáhú i Yaā ní tají rúhū vēji ri. Te ñayuu núu ga mēhñu ró, máa i cújéhnua ga, achí yá.

**Ñayuu tu cáhān siquī yā, iin i jíin yá***(Mr. 9.38-40)*

<sup>49</sup>Yūcuán na te ni cahān Juan:

Maestro, ni cajito ná iin tēe jeē jíin síhví ní quénehen de tachí ini ñayuu. Te ni cajesi na jēe sáha de, chí tu jíca de jíin yó, achí de.

<sup>50</sup>Te ni cahān Jesús jíin de:

Ma cási rō jeē sáha de, chí tēe tu cáhān siquī yō, iin de jíin yó, achí yá.

**Jeē ni cáhān yā nuū Jacobo jíin Juan**

<sup>51</sup>Te ni cuyajni quiví jeē quínuhun yā andíví, te ni tee téyí ni yā jeē quihín yā ñuu Jerusalén. <sup>52</sup>Te ni tají yá sava tēe yósnúu de jíin jnúhun jeē jinú yā. Te cuango de iin ñuu Samaria návāha nducú de nuū ndóo ya. <sup>53</sup>Te ñayuu Samaria un tu ní cájehe i vehe ndóo ya, chí ni cajini i jeē ndé Jerusalén quihín yā. <sup>54</sup>Te Jacobo jíin Juan, tēe cáscuáha jíin yá, ni cajini de jeē súcuan cúu, te ni cacahān de jíin yá:

¿A cúní ni jéé ndácu yó jniñu quiiji ñuhūn nde andíví, nájnūhun ni

sáha Elías, návāha naa ñayuu yáha? Achí de.

<sup>55</sup>Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnúhun cácahān rō. <sup>56</sup>Chi ruhū, Yaā ní nduu tēe, tú vēji ri jeē snáa rī ñayuu, chí sa suhva jeē jnáma ri ñayuu, achí yá.

Yūcuán na te cuahān yā jíin de inga ñuu.

**Siquí ñáyuu jeē cáconi i condiquin i ya***(Mt. 8.19-22)*

<sup>57</sup>Te níin jíca ya ichi jíin de, te ni cahān iin tēe jíin yá:

Condiquin na níhín quihín yō ndé-ni cúu-ni nuū quihín ni, achí de.

<sup>58</sup>Te ni cahān Jesús jíin de:

Tāca núcuui, íyó yāu cava cáñuhun ti. Te suni saa, iyó táca tī. Te ruhū, Yaā ní nduu tēe, tú nuū cusú rī, achí yá.

<sup>59</sup>Te ni cahān yā jíin inga de:

Condiquin ruhū na quihín yō.

Te máa tēe un ní cahān de:

Condetu ní ndé na quíchindūji ná tátá na xíhna gā. Yūcuán na te condiquin na níhín, achí de.

<sup>60</sup>Te ni cahān Jesús jíin de:

Stóo tāca ndíyí na chindūji jnáhan ndíyí, chí ndíyí cácuu ñayuu tu cácadíje. Te róhó, cuahān te nacani ró jnúhun ndese ndácu Yaā Dios jniñu, achí yá.

<sup>61</sup>Yūcuán na te suni ni cahān inga de:

Cúní na condiquin na níhín, te cuāha ní jnúhun jeē xíhna gā quicahān na jíin ñáyuu cáyucú vehe ná, achí de.

<sup>62</sup>Te ni cahān Jesús jíin de:

Núu na-ni tēe quéjéé de conquiñ de ruhū, te núu máni jeē nácani cuíhyá ni de siquī tāca jéé ni stóo de, núu súcuan te cúu de nájñuhun iin tēe jítu jíin yátá, te jíco coto de ichi vehe de. Te ma cuajniñu de conquiñ de ruhū siquī jniñu ndácu Yaā Dios, achí yá.

Jeē ní tají yá uní xico uxí de

**10** Te ná ni cuu tācá jniñu yáha, te máá Jítóho yō ni nacāji ya uní xico uxí gā de. Te ni tají yá ndihuū ndihuū de jeē cósnūú de nuū yā, quingoo de tācá ñuu jíin tāca lugar nuū jé yajni quihīn maá yá. <sup>2</sup>Te ni cahān yā jíin de:

Ñayuu yáha cácuu i nájñuhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahu rō nuū maá Jítóho rō Yaā Dios jeē na tají yá cuehē tēe na quíngoo de cahnde de trigo, cúu jeē nacani de jñuhun ya nuū ñáyuu. <sup>3</sup>Te cuángoo jíjnáhan rō, te na cástuhun rí nuū rō jeē tají rí rohó quíngoo rō nájñuhun londe mēhñu yíhī. <sup>4</sup>Te ma cóndiso rō ñunu, ni yijni xūhún, ni ndijēn. Te ichi ma cucuéé rō ndajñuhun rō jíin ni iin. <sup>5</sup>Te na-ni vehe núu ni quívi rō, te xihna gā cahān rō: Na quíji jñuhun ndeyí jñuhun sī ni nuū rohó, ñáyuu vehe yáha, achi rō. <sup>6</sup>Te núu vehe yúcuan íyo ñáyuu vāha, te jñuhun ndeyí ní cahān rō jinū siquī i. Te núu tuú, te jñuhun ndeyí ní cahān rō ma jinú siquī i. <sup>7</sup>Te suni vehe yúcuan coyūcu rō, te caji rō coho rō jéé cuáha ñáyuu nuū rō. Chi siquī jniñu jeē nácani rō jnúhun nuū ñáyuu,

te cánuú coto i rōhó. Ma quéndōo rō tijni vehe, chi iin-ni vehe. <sup>8</sup>Te na-ni ñuu núu ni quívicoo rō, te núu cuatáhú i rōhó, te caji rō tāca jéé cuáha i nuū rō. <sup>9</sup>Te nasávaha rō ñáyuu cácuhū ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō. <sup>10</sup>Te na-ni ñuu núu ni quívicoo rō, te núu tu ní cájetáhú i rōhó, te quendacoo rō ini calle yūcuán, te cahān rō: <sup>11</sup>Nde ticachā ñuu rō yāha jéé ni jníi jehē rī, na náscóyo ri jeē cúu seña jeē iyó cuéchi rō jéé tu ní cájetáhú rō. Te na cónahán rō jeē Yaā Dios je ni cuyajni ya jeē ndacu ya jniñu nuū rō nuú. <sup>12</sup>Te cáhán rī jíin rō jeē quívi juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyuu cuéchi.

Jeē ní cuxeēn yā nuū sava ñuu nihni ni

(Mt. 11.20-24)

<sup>13</sup>Nacā jeē xeēn ndoho rō, ñáyuu ñuu Corazín. Te nacā jeē xeēn ndoho rō, ñáyuu ñuu Betsaida. Chi núu ini ñuu Tiro jíin ñuu Sidón ni sáha ri jniñu jéhnu jeē ni sáha ri ini ñuu maá rō, te yachí nacani ni ñáyuu ñuu un jéé stóo i cuéchi i núú. Te sáha i seña jeē steēn jeē nácani ni i siquī cuéchi i, chí cuhun i sahma jnúú te chuhun i yaā xini i núú. <sup>14</sup>Núu súcuan te quívi coo juicio te xeēn gā coo castigo siquī rō jíjnáhan rō vēsú jeē ni íyo siquī ñuu Tiro jíin ñuu Sidón. <sup>15</sup>Te rōhó ñáyuu ñuu Capernaum, ía cájeni ni rō jeē cujéhnu rō nájñuhun iin jeē cáa cuahān ichi ándiví? Tuú chi

sa nanuu ró ndé lugar nuū cáyūcu ánuá ndīyī. Achí yá.

<sup>16</sup>Te ni cahān gā yā jíin tée jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají rúhū vēji ri. Achí yá.

#### Jeē ní ndecoo tēe ni tají yá

<sup>17</sup>Te ni ndecoo unī xico uxī tēe un, cácusī ni de te cácahān de jíin Jesús:

Nde tachī cájetáhú núu na jéē jíin sǎhví ní, chí quéndacoo ini ñayuu, achí de.

<sup>18</sup>Te ni cahān yā jíin de:

Súcuan cúu, chí ni jito ri jeē nájnūhun iin taja ni ñingava Satanás ichi ándiví, chí ni quende rī ndīhi poder un. <sup>19</sup>Te vijna te je ni jēhe ri fuerza nuū rō jeē cueñū rō nájnūhun siquī tāca cóō jíin tísuhma, te cundeyí ró siquī tāca fuerza maá jéē jito uhū yohó, te tú na vé sáha ga jíin ró. <sup>20</sup>Te ma cúsi ni rō maá-ni jeē cájetáhú táchī nuū rō, chí sa cusī gā ni rō jeē yosó sǎhví ró nde andiví. Achí yá.

#### Jeē ní cusī ni Jesús

(Mt. 11.25-27; 13.16-17)

<sup>21</sup>Te suni hora un ní cusī ni Jesús, ni sáha Espíritu Santo, te ni cahān yā:

Na cútahū na núu ni Tátā, Jitoho andiví jíin ñáyiví. Chí ni jesi ni táca jnúhun ndíchí ní, jeē ma cúni ñayuu ndichí jíin ñayuu tūhva cuenta ñayiví yáha. Te ni steén ni núu ñayuu cácuu nájnūhun sūchi

lúlí. Chí súcuan ni nujnahan ni ni Tátā, achí yá.

<sup>22</sup>Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé iin cúu ruhū, Sēhe Yaā Dios, chí máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chí máá-ni Sēhe cúu jeē jiní. Te iyó ñayuu jeē cuni máá Sēhe stéén yā nuū i ndese Yaā cúu Tátá yā, te máá i suni cuni i. Achí yá.

<sup>23</sup>Yūcuán na te jito ya nuū tée cáscuáha ún, te ni cahān yā jíin máá-ni de:

Yōhoyo ndetū ñayuu cájito jniñu jéhu jeē cájito máá ró. <sup>24</sup>Chí cáhán rī jíin ró jeē cuehē tēe ni canacani jnúhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

#### Jnúhun iin tēe vāha ni nación Samaria

<sup>25</sup>Yūcuán na te iin tēe stéén tutu ley Yaā Dios, ni ndocuiñī de ni jecahān de jíin Jesús, chí cúni de coto ndee de ya. Te ni cajnúhún de:

Maestro, ¿na vé sáha ná te nihin tahu na cotecu na ní cáni andiví? áchí de.

<sup>26</sup>Te ni cahān yā jíin de:

¿Ndesse yósó núu tútu ley? ¿Ndesse cáhán cáhu ró? Achí yá.

<sup>27</sup>Te máá tée un ní cahān de jeē cahān nuū tútu:

Coo manī ndasí ró jíin máá Jitoho rō Yaā Dios, nde jnáa ndasí ró sáha ró ndīhi jeē cúsi ni yā, nde jíin ini jíin ánuá rō, jíin ní fuerza rō, jíin ní jéē níjnūní rō. Te cundáhú ni rō

jnáhan ró nájñuhun cúndáhú ni rō maá ró, achí. Achí de.

<sup>28</sup>Te ni cahān yā jíin de:

Vāha ni cahān rō. Te núu cuu sáha ró súcuan te nihin tahú rō cotecu rō níí cáni, achí yá.

<sup>29</sup>Te máá téé un cúní de jeē quéndōo ndaā de nuū yā jíin jnúhun ni cajñuhún de, te ni cahān de:

¿Te ndé ñáyuu cácuu jnáhan ná? achí de.

<sup>30</sup>Te ni cahān Jesús:

Īin tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuīhna núū de, te ni caquende ndīhi ndajñíñu de, te nde sahma ñúhun de. Te ni cacani ndevāha ún de jeē jé yajni cuu de núú. Te ni castóo ún de, te cuango. <sup>31</sup>Te ni cuu jeē íchi un yáha ĩin sutū quihín de, te ni jito de nuū téé ún, te ni síyo-ni de cuahān de. <sup>32</sup>Te suni súcuan ĩin tēe grupo levita jeē cájejníñu ini templo, vēji de ichi ún, te ni jito de nuū téé ún, te ni yāha jícá-ni de cuahān de. <sup>33</sup>Te ĩin tēe nación Samaria, suni vēji de ichi ún, te nuū ní jito de, te ni cundáhú ni de tēe ún. <sup>34</sup>Te ni quee de nde nuū catú téé ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quití de, te cuahān de jíin téé un ndé ĩin mesón, te ni condito de. <sup>35</sup>Te inga quivī ún, hora jeē quihín de, te ni tava de uū xūhun cáa, ni jēhe de nuū tēe chíí mesón. Te ni cahān de: Coto ní téé yáha, te núu caxin gā ni xúhun ní jíin de, te nuū nándicó ná te nachunaa ná núú ní, achí de. <sup>36</sup>Núu súcuan ¿te ndese jéni ni rō? Jeē ndinúní téé ún, ¿ndé

ĩin de ni chihí cuenta jeē jnáhan de cúu tēe ni canecoo ñacuīhna núū?

Achí yá jíin téé stéén tutu ley.

<sup>37</sup>Te ni cahān de:

Tēe jeē ní cundáhú ni tēe ni tuji, vēsú tēe ñuu jicá cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

**Jeē ni íne ya vehe Marta jíin María**

<sup>38</sup>Yūcuán na te ni quihín tucu ya ichi cuahān yā, te ni jinū yā ĩin ñuu lulí. Te ĩin ñahan nání Marta, ni cana ña ya ni jehēn yā vehe ña.

<sup>39</sup>Te Marta, íyó ĩin cuhū ña nání María. Te María ni cucōo ña nuū jehé Jesús, jíni nahín ña jnúhun cáhán yā. <sup>40</sup>Te Marta chi cúnéé máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñuhún ña sāña núú jniñu? Te cahān ni jíin ña na chindéé ñáhán ña sāñá, achí ña.

<sup>41</sup>Te ni cahān Jesús jíin ña:

Marta, yōhyo ndíhví ni rō jíin cuéhē jniñu, te yōhyo stóho ró máá ró jíin. <sup>42</sup>Te íyó ĩin-ni jniñu cánuú. Te María chi ni nacāji ña jniñu cánuú, suu jeē ndíhví ni ña síquī jnúhun Yā Dios, te ma quēnehen yó ña nuū ún. Achí yá.

**Jeē ni stéén yā ndese cacān tahú yō**

(Mt. 6.9-15; 7.7-11)

**11** Te ĩin quivī íne Jesús ĩin lugar jicán tahú yā. Te nuū ní ndíhi ní jicān tahú yā, te ĩin tēe scuáha jíin yá, ni cahān de:

Stéén ni núú ná ndese cacān tahú na jíjnáhan ná, nájñuhun ni steén

Juan nuū tée ni cascuáha jíin de, áchí de.

<sup>2</sup>Te ni cahān yā jíin de:

Jeē cacān tahuū rō, te suhva cahān rō:

Tátá maá ná jijnáhan ná jéē ndeé ní andiví,

níní na cóo yíñuhún ná nuū ní, chí Yaā iī cúu ní.

Te ñuhun ni na jéē yachī quiji quiví ndacu ní jniñu níf ñáyiví yáha.

Te na cóo tācá jniñu nújnahan ni ní,

nájñuhun íyó ini andiví, súcuan na cóo ini ñayiví.

<sup>3</sup>Staa jeē cátecu na táca quíví, cuáha ní núū ná vijna.

<sup>4</sup>Te cone cáhnu ni ni núū tāca cuéchi cásáha ná núū ní, nájñuhun cáhine cáhnu ni na núū ñáyuu casáha cuéchi nuū ná.

Te ma cuáha ní jñuhun jeē coto ndee jexeén sãñá,

chí sa suhva jnama ní sãña nuū tāca jéē neé.

Achi rō jijnáhan rō. Achí yá.

<sup>5</sup>Te ni cahān gā yā:

Núu ndé ñin róhó íyó ñin amigo rō, te núu quihín rō vehe de sava ñuú te cahān rō jíin de: Amigo, cuáha núu unī staa nuū rī. <sup>6</sup>Chí ñin amigo rī jeē jica de viaje, ni quee de vehe rī, te tú na vé névāha rī jeē cuáha rī caji de. Achi rō. <sup>7</sup>Te núu cahān tēe íne ini vehe: Ma stáhān rō ruhū, chí ndíhyú yehyí rí, te ma cúu ndonda rī jeē cuáha rī nuū rō, achi de. <sup>8</sup>Te cáhān rī jíin rō, vēsú ma ndóna de cuáha de nuū rō siquí jeē cúu de amigo rō, te jeē yóhoyo stáhān rō de, jeē

yúcuan ndonda de cuáha de ndihi jeē jíni ñuhún rō. <sup>9</sup>Núu súcuan te cáhān rī jíin rō jijnáhan rō jeē suni súcuan cacān tahuū rō nuū Yaā Dios, te cuáha ya nuū rō. Te nducú rō tāca jéē váha íyó núu yā, te nihín rō sáha ya. Te cacān tahuū rō nde nihín rō, nájñuhun sáha ñayuu cahán yehyí ndé nune quíví i. <sup>10</sup>Chí tāca ñayuu jicán, cuáha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cuní i.

<sup>11</sup>¿Te ndé ñin rō cúu tátá, te núu sēhe rō jicán i staā nuū rō, te á cuáha rō ñin yuū nuū i? Te núu jicán i chācá, ¿te á cuáha rō ñin coō nuū i? <sup>12</sup>Chí núu jicán i ñin ndiví, ¿te á cuáha rō ñin tisuhma nuū i? Tú cuítí súcuan. <sup>13</sup>Núu súcuan te máá rō jijnáhan rō, vēsú ñáyuu íyó cuéchi cácuu rō, te cájini rō cuáha rō jéē váha nuū sēhe rō. Te nagā ni cuu máá Tátá rō andiví jéē ma cuáha ya Espíritu Santo nuū ñáyuu jicán nuū yā. Achí yá.

#### Jeē ní cacahān de jeē jejniñu ya fuerza Satanás

(Mt. 12.22-30; Mr. 3.19-27)

<sup>14</sup>Te quénehen ya ñin tachí ini ñin tēe, jeē ní cuñíhín de ni sáha. Te nuū ní quenda tachí, te ni nacahān tēe ni cuñíhín un. Te ni canaa ni ñayuu cájito i. <sup>15</sup>Te sava ñayuu ún chí ni cacahān i:

Jíin fuerza Satanás jeē cujéhnu nuū tachí, quénehen tēe yáha táca táchí ini ñayuu, achí i.

<sup>16</sup>Te sava ga i cúní i coto ndee i ya, te ni cajicān i jeē sáha ya jeē coo ñin seña ichi ándiví. <sup>17</sup>Te máá yá jiní yā jeē súcuan cájeni ni i, te ni cahān yā:



Tācá nación jeē sasín máá te cuajnáhan máá, núu súcuan te snáá jeē iyó váha máá. Te núu ñayuu iin vehe sásín máá te cuajnáhan máá, núu súcuan te ma cúu ga coyūcu cáhnu. <sup>18</sup>Te suni súcuan Satanás, núu sásín máá jíin jnáhan tachī, ¿te ndese cuiñi nihin jeē ndácu jniñu núu súcuan? Chi cácahān rō jeē jíin fuerza Satanás quénehen ri tachī ini ñayuu. <sup>19</sup>Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jíináhan i cachi jeē ní castívi ndasí ró ni cacahān rō jeē cáquenehen ri tachī jíin fuerza Satanás. <sup>20</sup>Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jéé ndácu ya jniñu.

<sup>21</sup>Te núu iin tēe ndacuī, ndíto de vehe de jíin nujíi de, núu súcuan te tú ni iin ndajniñu de ndoñúhún. <sup>22</sup>Te núu quiji inga tēe ndacuī gā, te cundeyí jíin tēe ún, núu súcuan te quende nujíi de jeē ndíto de vehe de, te sáha de ndese cúní maá de jíin ndajniñu jeē quēnde de. Te nájnūhun tēe ndacuī gā ún, súcuan cúu máá rí nuū Satanás.

<sup>23</sup>Te ñayuu tu iyó mání jíin rí, núu súcuan te jító uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rí.

**Tachī jeē nastútú jnáhan ndívi ini ñayuu**

(Mt. 12.43-45)

<sup>24</sup>Núu ni quenda iin tachī ini iin tēe tu cándíje, te jíca cuu nuū ñúhun téhé, ndúcú nuū ndétátú, te

tu níhín, yūcuán na te jéni ni maá: Na quínuhun rí vehe nuū ní quenda ri. <sup>25</sup>Te núu ni ndee tucu, te jító jeē tēe tu cándíje un cúu de nájnūhun iin vehe jeē ní ndundo. <sup>26</sup>Yūcuán na te jéquihiñ uxā gā tachī xeén gā vēsú maá. Te quívicoo ini tēe un jéé cóyūcu yúcuán. Núu súcuan te xeén gā ndoho tēe un jéé sándíhí vēsú jeē xíhna ñúhún. Achí yá.

**Yōhyo ndetū ñayuu cájini nahín jnúhun ya**

<sup>27</sup>Te níni cáhán yā jnúhun yáha, te iin ñahan íne mēhñu ñayuu cuehē un, ní cahān jee ña jíin yá: Yōhyo ndetū ñahan ní scácu níhín te ni scáxin ña níhín, áchí ña.

<sup>28</sup>Te ni cahān yā:

Sa suhva yōhyo ga ndetū ñayuu cájini nahín jnúhun Yaā Dios te cásquicu i, áchí yá.

**Jeē ní cajicān ñayuu tu cácañdíje iin jniñu jéhnu**

(Mt. 12.38-42; Mr. 8.12)

<sup>29</sup>Te ni cataca cuehē gā ñayuu nuū Jesús, te ni quejéé yá cahán yā: Ñayuu iyó vijna mání cásáha néé i. Te cájicān i iin jniñu jéhnu jeē steén núu Yaā ní tají Yaā Dios cúu ri. Te tú na inga jniñu jéhnu stéén rí nuū i, chi máá-ni jniñu jéhnu nájnūhun ni cuu jíin Jonás, tēe ni nacani jnúhun Yaā Dios nde jenahán. <sup>30</sup>Chi nájnūhun ni cajini ñayuu ñuu Nínive jeē ní cuu iin jniñu jéhnu jíin Jonás, suni súcuan cuni ñayuu tiempo yáha jeē coo iin jniñu jéhnu jíin rúhū, Yaā ní nduu tēe, jeē quijnáhan jíin modo ni ndoho Jonás. <sup>31</sup>Te reina jeē ní cujéhnu nación ichi sur, natecu ña jíin ñayuu tiempo

yáha, quivī juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhnū ga ruhū, Yaā íne yáhá vésú Salomón, te tu cá candíje ró rúhū. <sup>32</sup>Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quivī juicio jeē sándaā yā cuēchi, te cahān i cuēchi siquī ñáyuu yáha. Chi máa i ni canacani ni i ni castóo i cuēchi i quivī ní nacani Jonás jnūhun nuū i. Te vijna chi cújéhnū ga ruhū, Yaā íne yáhá vésú Jonás, te tu cá candíje ró rúhū.

### **Jnūhun yátá síquī lámpara**

(Mt. 5.15; 6.22-23)

<sup>33</sup>Núu nástfín ñayuu ñin lámpara, tu chísāhí i, ni tu chúne i chíji ñin cajón. Chi sa suhva jéni i nuū sucún, návāha cundijin nuū ñáyuu quívicoo vehe. <sup>34</sup>Te tinūu ró cúu nájñūhun lámpara nuū yiqui cúñu rō. Núu súcuan te núu tinūu ró íyó ndijin, te níí-ni yiqui cúñu rō cúndijin. Te núu tinūu ró tu íyó ndijin, te níí-ni yiqui cúñu rō iyó nee. <sup>35</sup>Te suni súcuan cúu ánuá rō, te coto ró jéē ma cáni néé ni rō, návāha tú coo nee ini anuá rō. <sup>36</sup>Chi núu máni jniñu váha cásáha ró, te tú na jniñu néé cásáha ró, núu súcuan te luz yā cúndijin váha ini anuá rō, nájñūhun ñin lámpara jeē sáha jeē cúndijin váha. Achí yá.

### **Jeē ni cáhān yā jeē iyó cuēchi de jíjnāhan de**

(Mt. 23.1-36; Mr. 12.38-40; Lc. 20.45-47)

<sup>37</sup>Te nuū ní cuu ni cahān yā, te ñin tēe grupo fariseo ni cana de ya

jeē caji yā staā vehe de. Te ni quivī ya, te ni cucōo ya mesa jeē caji yā staā. <sup>38</sup>Te tēe fariseo un náa ni de jíto de jeē tu squícu ya costumbre jeē nandahá yá te caji yā staā. <sup>39</sup>Te ni cahān maá Jítóho yō jíin de:

Róhó tēe fariseo jíjnāhan ró, chi nájñūhun jeē cánacate ró yátā vaso jíin yátā cohó cúu jeē nándahá ró. Te ichi íni rō chi ñūhun máni máa jnūhun cuíhná jíin jnūhun néé. <sup>40</sup>Tēe cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō? <sup>41</sup>Te jeē cájēhe ró caridad nuū ñáyuu ndahú, na sáha ró síquī jeē cundáhú ndije ni rō i. Te súcuan te coo ndaā anuá rō.

<sup>42</sup>Nacā xeēn ndoho róhó tēe fariseo, chi cásquícu ró tācā jniñu lúlí, te tu cásquícu ró jniñu cánuú. Chi cásáha ró úxí uxí nuhni tamínu jíin ruda jíin táca yucū, te cásocō rō ñin ñin siquī tāca úxí un núu Yaā Dios. Te tu cásáha cuiti rō jniñu ndaā, ni tu cáhiyo maní rō jíin Yaā Dios. Tāca jéē yáha cánuú sáha ró núu, te suni ma stóo ró jéē socō rō tāca yucū ún.

<sup>43</sup>Nacā xeēn ndoho róhó tēe fariseo, chi máni cánujnahan ni rō cucōo ró núu silla yiñúhún gá ini vehe ñi sinagoga. Te cánujnahan ni rō jeē cahán yiñúhún ñáyuu jíin ró nuū calle.

<sup>44</sup>Te nacā xeēn ndoho róhó tēe cástéén tutu ley Yaā Dios, jíin róhó tēe fariseo, chi tēe stáhú-ni cácuu ró. Chi cándāa ró nájñūhun yaū ndíyí jeē tú ndijin, chi cásnāa rō anuá ñayuu, te tu jíin i jeē súcuan cásáha ró jíin i. Achí yá jíin de.

<sup>45</sup>Yúcuán na te ni cahān ñin tēe stéén tutu ley:

Maestro, jeē ni cāhān ni táca jnūhun yáha, suni nde siquī maá ná jíjnāhan ná ní cahān ní, áchí de jíin yá.

<sup>46</sup>Te ni cahān yā:

Suni nacā xeēn ndoho rōhó tée castéén tutu ley. Chi suni castéén rō táca ley ni catava maá ró jeē yíí sáha, te tu cácuendeyí ñáyuu squícu i. Te máá ró, chi ni iin xinī ndáha ró tu cáscánda ró jéē squícu ró.

<sup>47</sup>Nacā xeēn ndoho ró jíjnāhan ró. Chi casáha ró vehe siquī nuū yíndūji ndīyi jíí rō, tēe ni canacani jnūhun Yaā Dios nde jenahán. Te suni tāca jíí rō ni cajehni de tēe ún.

<sup>48</sup>Te jeē casáha ró súcuán cúu jeē cáquiijnāhan ró jíin de siquī níñū ní casáha de. Chi máá de ni cajehni tēe ún, te máá ró casáha ró vehe ndīyi ún.

<sup>49</sup>Jeē yúcuán nde jenahán ní cahān Yaā Dios iin jnūhun ndíchí: Tají rí tāca tēe nacani jnūhun ri jíin táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. <sup>50</sup>Te súcuán te siquī ñáyuu tiempo yáha na cóndee cuēchi jeē ní cajehni jíí i tēe ni canacani jnūhun Yaā Dios, nde quivī ni jécōo ñayīví te nde vijna, <sup>51</sup>nde Abel xihna gā te nde Zacarías, tēe ni cajehni de ini templo sava mēhñu cuarto ii jíin altar. Núu súcuán te cāhán ri jíin ró jeē siquī ñáyuu tiempo yáha condee tāca cuēchi ún.

<sup>52</sup>Nacā xeēn ndoho rōhó jéē castéén tutu ley, chi cájesi rō ichi jeē jécūhun ni ñayuu jnūhun ya. Chi ni máá ró tu cácuani rō jecūhun ni rō, ni tu cájēhe ró jnūhun jeē jecūhun ni ñayuu cácuani. Achí yá.

<sup>53</sup>Te jeē ni cāhān yā jnūhun yáha, te tēe castéén tutu ley Yaā Dios jíin tēe fariseo, yōhoyo ni caquitī ni de nuū yā. Te ni caquejéé de castíchi de ya siquī cuehē gā jnūhun. <sup>54</sup>Chi yuhu-ni cánducú de núu sanaa te stívi yá jnūhun cahān yā, návāha nihin de cuēchi siquī yā.

### Siquī jnūhun stáhú cácahān tēe fariseo

**12** Te níni súcuán cúu, te ni cacutútú cuéhē mil ñayuu, chi nde cájeñū i siquī jehé jnāhan i. Te xihna gā ni quejéé yá cāhán yā jíin tēe cáscuáha jíin yá:

Coto má candíje ró levadura tēe grupo fariseo, chi suu cúu jnūhun stáhú cácahān de. Chi jíité núu nuū ñáyuu, nájnūhun ndécava levadura nuū ñújen pan. <sup>2</sup>Chi jnūhun stáhú un má quéndōo sāhí cuiti, chi ndíhi natūu ndijin, te cuni ñayuu. <sup>3</sup>Núu súcuán te suni máá ró, tāca jnūhun ni cacahān rō jeē tu ní jíiní ñayuu, iin quivī te cuni vāha i. Te tāca jnūhun ni cacahān sāhi ró jeē ndihyú yehyí, iin quivī te cahān jee ñayuu yatā tācá vehe.

### Jeē ní cachi yā ndé iin cúu jeē yūhu yó

(Mt. 10.28-31)

<sup>4</sup>Cāhán ri jíin ró jijnāhan ró, amigo: Ma yūhu ró coto ró ñáyuu cahni yiquí cúñu rō, chi núu ni cajehni i rōhó, te tuá na vé cúu sáha ga i. <sup>5</sup>Te na cáchi ri nuū rō ndé iin yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

<sup>6</sup>Te tǎcǎ saa chi tú yahu ndéé tǎ, chi nde uhūn tǎ jeē uú centavo lulí. Te ni iin ti tu náa ni Yaā Dios jeē tu ndító ya. <sup>7</sup>Te nagā ni cuu rǎhó jǎjnáhan ró, chi nde ndihí ixi xíní rǎ je ni cahu ya. Núu súcuán te ma yūhu ró jǎjnáhan ró, chi cánuú ndasí gá rǎ nuū yā vēsú cuehē tǎcǎ saa.

**Ñayuu jejnúhún Jesucristo nuū inga ñayuu**

(Mt. 10.32-33; 12.32; 10.19-20)

<sup>8</sup>Te cáhán rǎ jǎjn ró, tǎca ñáyuu jeē cuajnúhún rúhū nuū inga ñayuu, suni súcuán ruhū, Yaā ní nduu tēe, cuajnúhún rǎ i nuū tǎcǎ ndajéhé Yaā Dios. <sup>9</sup>Te tǎca ñáyuu jeē ma cuajnúhún rúhū nuū inga ñayuu, suni súcuán ma cuajnúhún rǎ i nuū tǎcǎ ndajéhé Yaā Dios.

<sup>10</sup>Te núu ndé ñáyuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñáyuu cahān ndevāha i siquī Espiritu Santo, ma cóne cáhnu ni Yaā Dios nuū i.

<sup>11</sup>Te núu cuandeca i rǎhó tǎca vehe ii sinagoga nuū tēe cásandaā cuēchi, jǎjn núu tēe cácuu tohō, te ma nácani ndasí ni rǎ ndese stíó cuíñí rǎ jñuhun nuū de. <sup>12</sup>Chi máa hora un te Espiritu Santo steén yā nuū rǎ ndese cahān rǎ. Achí yá.

**Siquī jeē ma ténuū yō ndajniñu cúcǎ**

<sup>13</sup>Yūcuán na te iin tēe íne nuū ñáyuu cuehē un ní cahān de jǎjn Jesús:

Maestro, cahān ni jǎjn ñani na jēe na táhú sáva de tahū na jǎjn de, áchí de.

<sup>14</sup>Te ni cahān yā jǎjn de:

¿Ndeé iin ni jeni ruhū jeē ndacu ri jniñu tahū sáva tahū rǎ? Achí yá.

<sup>15</sup>Te ni cahān gā yā:

Condito ró máa ró jǎjnáhan ró jēe ma ndíyo ni rǎ xūhun jǎjn tǎca gá. Chi vēsú cuehē ndasí ndajniñu névāha iin tēe, te nasūu jēe yúcuán sáha jeē quéndōo ndetū de, áchí yá.

<sup>16</sup>Yūcuán na te ni cahān yā iin jñuhun yátá jǎjn i:

Ni iyo iin tēe cúcǎ jeē névāha ñuhun jeē cúu vāha ndasí itu. <sup>17</sup>Te tēe cúcǎ un ní nacani ni de: ¿Ndese sáha ri? Chi tuá ndé cuhun niñi ri. Achí de. <sup>18</sup>Te ni jeni ni de: Suhva na sáha ri. Na cánu rǎ tǎca yácā rǎ, te nasáha ri jeē náhnu ga. Te yūcuán chuvāha ndihí ri niñi ri jǎjn tǎca ndajniñu ri. <sup>19</sup>Yūcuán na te cahān rǎ jǎjn ánuá rǎ: Vijna te cuehē teyí névāha yó jēe canda cuehē cuiyā. Na ndétātu yó te caji yō coho yó, te na cúsiñi ni yō, ni jeni ni de. <sup>20</sup>Te ni cahān Yaā Dios jǎjn de: Tēe cánéé cúu ró. Chi jecuāā vijna cuu rǎ, te tǎca jēe ní chuvāha ró, ¿ndeé tēe cuu? Achí Yaā Dios jǎjn de. <sup>21</sup>Te súcuán ndoho tǎca tēe jeē sacúcǎ de máa de, te tu ndúcú de jeē quendōo ndetū de sáha Yaā Dios. Achí yá.

**Yaā Dios ndító ya yohó**

(Mt. 6.25-34)

<sup>22</sup>Te ni cahān yā jǎjn tēe cáscuáha jǎjn yá:

Núu súcuán te cáhán rǎ jǎjn ró: Ma nácani ndasí ni rǎ siquī jeē cótecu rǎ, núu ndese caji rǎ, ni siquī sahma, núu ndese cuhun ró. <sup>23</sup>Chi Yaā Dios ni sáha ya jeē técu rǎ jǎjn yiqui cúñu rǎ, te nagā ni cuu jeē ma cuáha ya jeē caji rǎ jǎjn jēe cúhun ró. <sup>24</sup>Condēhe ró ndese cátecu quití cácuu nájnūhun cálu, chi tu cátaji tí, ni tu cánastútú tí jeē chūvāha

ti, ni tú yacā tī. Te vēsú súcuan te máá Yaā Dios scáji yā tī. Te cánuú ndasí gá rō jijnáhan rō vēsú tācá quiti ún. <sup>25</sup>¿Te ndé iin ró, á cuu scuéhnú rō máá ró sava metro gā, vēsú na nácani ndasí ni rō? <sup>26</sup>Te núu ma cúu sáha rō vēsú iin jniñu lúli súcuan, ¿te najehē cánacani ndasí ni rō siquī jeē cáji rō jíin jée cuhun rō?

<sup>27</sup>Condēhe jíjnáhan rō ndese jée ita tāca yúcū. Chi tu sájniñu, ni tu táú. Te cáhán rī jíin ró jeē ni rey Salomón, quivī ní ñuhun de sahma váha ndasí, tu ní ñuhun de sahma lúu súcuan nájnūhun ita ún. <sup>28</sup>Te núu súcuan jéhe Yaā Dios sahma lúu ita un jée jée vijna te sajnē cayū nuū ñuhún, te nagā ni cuu róhó jíjnáhan rō jée ma sáha ya jeē nihín rō sahma. ¿Te naun tu cácandíje nihin ró jée ndíto ya rohó? <sup>29</sup>Núu súcuan te ma nácani cuíhyá ni rō ndese caji rō ndese coho ró. <sup>30</sup>Chi tāca ñáyuu ñayivī jée tu cácandíje cúu jeē máni siquī jeē yáha cándihvī ni i. Te máá ró jíjnáhan rō, chi íyó Tátá rō andiví, te jíni yā jeē cájini ñuhún ró tāca jée yáha. <sup>31</sup>Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jée yáha.

**Ndese coo cúcá yó nde andiví**

(Mt. 6.19-21)

<sup>32</sup>Ma yūhu ró jíjnáhan rō chi cácuu ró nájnūhun lanchi ri. Chi vēsú jecu-ni cácuu ró, te máá Tátá rō cúsiñi ni yā jeē quívicoo ró ñuu nuū ndácu ya jniñu. <sup>33</sup>Xico ró jeē cánevāha ró, te cuāha ró xúhun un núu ñáyuu ndahú. Te súcuan

caya rō tahū rō nde andiví núu ma cútúhú, nájnūhun jeē chívāha ró xúhun ini yijni. Chi nde andiví te ma náā jeē váha coneváha ró. Chi yūcuan má quívi ñacuihná, ni ma cúu stívi tiquíxin. <sup>34</sup>Chi nde nuū nihín rō tahū váha ró, yūcuan cúu nuū cóndihvī ni rō siquī.

**Jeē na cóo tūhva yó jée ndéē yā**

<sup>35</sup>Coo tūhva ró jíjnáhan rō jée ndéē Jitoho rō, te coo ró nájnūhun mozo jeē nastíin i lámpara i. <sup>36</sup>Chi íyó tūhva i te cándetu i jeē ndéē patrón i jeē cuahán de vico nándāha. Chi núu ni ndee de te cahán de, te nune-ni i yéhyí jíjnáhan i. <sup>37</sup>Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē maá patrón sātūhva de máá de, te scúcōo de i mesa te caní de cohō i. <sup>38</sup>Te vēsú cucuée de ndee de nde sava ñuú, chí jée néē gā, te núu cuni de jeē súcuan cándito mozo de, te yōhyo ndetū i jíjnáhan i núu súcuan. <sup>39</sup>Te na jécūhun ni rō jeē cahán jnūhun yátá yáha: Tēe chíí vehe, núu ni jini de na hora quiji ñacuihná, te condito de, te ma cuāha de jnūhun jeē sacuíhná vehe de núu. <sup>40</sup>Te suni súcuan coo tūhva ró jíjnáhan ró, chí núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

**Jnūhun mozo váha jíin mozo tu squícu**

(Mt. 24.45-51)

<sup>41</sup>Yūcuán na te Pedro ni cajnūhún de ya:

¿A jíin máá-ni ná jíjnáhan ná cáhán ni jnūhun yátá yáha, chí suni

cáhán ni jíin ndihi ga ñayuu? achí de.

<sup>42</sup>Te ni cahān maá Jítóho yō:

Cáhán rī jíin ndé-ni ñayuu cúu nájnūhun mozo jeē ndito xinī te squícu vāha. Te maá patrón sáha de jeē condiso jniñu i coto i ñayuu vehe de, návāha scáji i máá hora.

<sup>43</sup>Te yōhyo ndetū mozo un jéé núu ni ndee patrón, te cuni de jeē súcuan squícu vāha i. <sup>44</sup>Jendaá cahán rī jíin ró jeē cani de mozo un jéé cóto i ndihi ndajniñu de. <sup>45</sup>Te núu jéni ni i jeē ma ndíji yachī patrón i, te quejéé i cani i tēe jíin ñahan cácuu jnāhan mozo i, te caji i coho i te najniñi i, <sup>46</sup>núu súcuan te ndee-ni patrón quivī jeē tu ndétu i jíin hora jeē tú na vé jéni ni i. Te stóho xeēn de i, te squívi de i ndoho i jíin ñayuu tu cásquícu.

<sup>47</sup>Te mozo jeē jiní i ndese nújnahan ni patrón i, te núu tu sātūhva i ni tu squícu i jeē cuní de, ndoho xeēn i jíin yujnu xí. <sup>48</sup>Te mozo jeē tu jíin i ndese nújnahan ni patrón i, te núu sáha i jniñu jeē cani de i, núu súcuan te cūhva-ni cani de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjniñu ya i, suni cuehē gā nandacān yā nuū i.

**Jeē siquí Jesús te cusñin ini ñayuu**

(Mt. 10.34-36)

<sup>49</sup>Ni quee rī jeē nájnūhun jeē scuíquín rī ñuhūn ini ñayiví, te suu cúu jeē cusñin ini ñayuu jeē siquí ruhū. Te cúní rī jeē yachī coo súcuan, návāha quivicoo ñayuu ndaha Yaā Dios. <sup>50</sup>Te íyó ñin jñundóho cánuú ndoho rī, te

cúcuíhyá ndasí ni rī chi nde jīnu ndoho rī, te ndusiñ ni rī. <sup>51</sup>¿A cájeni ni rō jeē véji rī jeē cóyūcu mání ñayuu ñayiví? Cáhán rī jíin ró jeē tuú, chi sa suhva jeē cusñin ini ñayuu jeē siquí ruhū. <sup>52</sup>Chi nde vijna te quejéé jéé uhūn ñayuu ñin vehe, sásñin maá jíjnāhan, uni siquí uú, te uú siquí uní. <sup>53</sup>Chi tátá cusñin ini jíin séhe yíí, te séhe yíí jíin tátá, te náná jíin séhe síhí, te séhe síhí jíin náná, te náná chíso jíin séhe jēnú, te séhe jēnu jíin náná chíso. Achí yá.

**Jeē ni cahān yā siquí seña andiví**

(Mt. 16.1-4; Mr. 8.11-13)

<sup>54</sup>Te suni ni cahān yā jíin ñayuu cuehē ún:

Núu cájito ró jeē náne vicō ichi núu cáne niāndii, te cácahān rō jeē cuun saū, te súcuan cúu. <sup>55</sup>Te núu quee tachī véji ichi sur te cácahān rō jeē nandii, te súcuan cúu. <sup>56</sup>Tēe stáhū-ni cácuu ró. Chi cájecūhun ni rō ndese stéén seña andiví jíin ini ñayiví, ¿te naun tu cájecūhun ni rō ndé ñin cúu ruhū jeē sáha rī tācá jniñu jéhnu tiempo yáha?

**Jeē cóndihvī ni yō jeē ma cóndee cuēchi siquí yō**

(Mt. 5.25-26)

<sup>57</sup>¿Te najehē tu cánacani ni maá ró ndé ñin cúu jniñu ndaá sáha ró? <sup>58</sup>Te núu ñin ñayuu quihñin i jíin ró nuū tohó jeē cacán i cuēchi siquí rō, núu súcuan te níni cuáhān rō jíin i ichi te cóndihvī ni rō sándaā rō jíin i. Chi núu tuú, te squívi i róhó núu juez, te juez síaha de róhó núu policía, te policía chune de róhó vecā. <sup>59</sup>Te jendaá cahán rī jíin ró

jeē ma quénda cuíti rō yūcuán chi nde chunaa rō ndíhi cuíti xūhun cájicān de. Te suni súcuan condihvī ni rō cahān ndahú ró jíin Yaā Dios, návaha ma ndácunehen ya cuēchi siquī rō. Achí yá jíin de.

**Jeē cánuú nacani ni yō  
jeē stóo yó cuēchi yó**

**13** Te iin quivī yúcuán ní quecoo jecu tēe, ni canacani de jnūhun nuū yā ndese ni candoho jecu tēe Galilea. Chi ná cájehni de quiti jeē socó de, te ni quecoo mozo Pilato ni cajehni tēe ún. <sup>2</sup>Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni iyo cuēchi de vēsú tāca gá ñayuu Galilea? <sup>3</sup>Cáhán rī jíin ró jeē tuú. Te róhó jíjnahan ró suni jnahnū ndetū rō núu tú nacani ni rō jeē stóo ró cuēchi ró. <sup>4</sup>Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gá ñayuu ñuu Jerusalén? <sup>5</sup>Cáhán rī jíin ró jeē tuú. Te máá ró jíjnahan ró, suni jnahnū ndetū rō núu tú nacani ni rō jeē stóo ró cuēchi ró.

**Jnūhun yátá núndēhe higo**

<sup>6</sup>Yūcuán na te ni cahān yā jnūhun yátá yáha jéē steén yā ndese cácuu ñayuu tu squícu jnūhun Yaā Dios:

Cácuu i nájñūhun iin nundēhe higo jeē ín nuū ñúhun iin tēe. Te ni jecondēhé de núu ín ndehē xinī, te tú na vé ín. <sup>7</sup>Te ni cahān de jíin mozo sájniñu nuū ñúhun de: Vijna te je íyó únī cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan

te cahnde rō, chi máá jéē sajnēñu nuū ñúhun, áchí de. <sup>8</sup>Te ni cahān mozo un jíin de: Stóo ní na cuñi iin na cuiyā, te na nástáyā ná jéhē te chuhun ná jéhen. <sup>9</sup>Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

**Jeē ní nasávaha ya iin  
ñahan quivī ndétátú**

<sup>10</sup>Te iin quivī ndétátú te stéén Jesús jnūhun ini vehe iī sinagoga. <sup>11</sup>Te íyó iin ñahan jeē ní cuu xahūn unī cuiyā kuhú ña. Chi iin tachī ni sáha jeē jíca tǎhí ña, te tuá cúu cuíti caca jnuu ña. <sup>12</sup>Te ni jito Jesús nuū ña, te ni cana ya ña, te ni cahān yā jíin ña:

Vijna te nduvāha ní jéē kuhú ni.

<sup>13</sup>Te ni soó yá ndaha ya siquī ña, te ni nucuiñī jnuu-ni ña, te ni nacuatáhú ña nuū Yaā Dios. <sup>14</sup>Te tēe cújéhnu ini vehe iī sinagoga, ni quitī ni de nuū Jesús jeē ní nasávaha ya ñahan un quivī ndétátú. Te ni cahān de jíin ñayuu:

Iñū quivī iyó jéē sájniñu yó, te tāca quivī ún quijicoo ró nduvāha ró. Te quivī ndétátú chi ma cúu, áchí de.

<sup>15</sup>Yūcuán na te ni cahān maá Jítoho yō jíin de:

Tēe stáhú-ni cácuu ró. Quivī ndétátu ¿á tu cándají ró stiquī rō burro ró jéē quíscóho ró tí ndute?

<sup>16</sup>Te ñahan yáha jéē cúu ña iin sēhe yucūn Abraham, chi nájñūhun ni conuhni ña xahūn unī cuiyā ni sáha Satanás. ¿Te á tu íyó váha jeē nájñūhun nandají rí ña nuū cuehyī ndóho ña quivī ndétátú? Achí yá.

<sup>17</sup>Te jeē ni cahān yā súcuan, te tāca tēe cájito uhū de ya, ni

cacucanu de. Te ndihí ñayuu ún chi ni cacusií ni i jíto i tãcá jniñu jéhnú sáha ya.

**Jnūhun yátá síquī ndiquin mostaza**

(Mt. 13.31-32; Mr. 4.30-32)

**18**Te ni cahān yā:

Na cáhān rī iin jnūhun yátá návāha cuni rō ndese ndúcuehē ñayuu ndácu Yaā Dios jniñu nuū. **19**Ndúcuehē i nájñūhun jéhnú iin ndiquin mostaza jeē jéquin iin tēe nuū ñūhun de, te ndúu nájñūhun iin yujnu. Te cúu cáhnu, te tãcá saa chí cásáha tí tacā tí chíji ndaha ún. Achí yá.

**Jnūhun yátá síquī levadura**

(Mt. 13.33)

**20**Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū:

**21**Cúu nájñūhun levadura jeē ní quihín iin ñahan, te ni saca ña jíín úní kilo harina, te ni ndaa ndihí ñujen ni sáha. Achí yá.

**Siquī jeē quívī yó yéhyí túū**

(Mt. 7.13-14, 21-23)

**22**Te jíca Jesús jeē cuahán yā ichi ñūū Jerusalén, te yáha ya tãcá ñuu náhnú jíín ñuu lulí, te stéén yā jnūhun. **23**Te iin ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí í.

Te ni cahān yā jíín í:

**24**Condihvī ni rō quívicoo rō ndaha Yaā Dios. Chí cúu nájñūhun iin yéhyí túū. Te cáhān rī jíín ró jeē iin quívī te cuehē ñayuu nducú i quívicoo í, te ma cúu ga. **25**Te quívī ún te sáha rí nájñūhun iin

tēe chíí vehe jeē ndocuiñí de te nacasi de yéhyí. Te ichi yátá véhe cuiñí ró jíínáhan ró, te scáján ró yehyí, te cahān rō: Nune ní yéhyí na quívicoo ná. Te cahān de jíín ró: ¿Ndé nuū véjicoo ró? Chí tu jíín rī rohó, achi de. **26**Yūcuán na te quejéé ró cahān rō jíín de: Ni cayeji ná ni cajihí ná jíín ní, te ini calle ñuu na ní steén ni jnūhun, achi rō. **27**Te cahān maá de: Cáhān rī jíín ró jeē tu jíín rī rohó ndé chí véjicoo ró. Cuiyo quingoo ró, chí ñayuu casáha jniñu néé cácuu ró. Achi de. **28**Te quívicoo ró núū ndahyú rō, te nacayihí yuhu ró jéé ndoho xeén rō. Te coto ró núū Abraham jíín Isaac jíín Jacob jíín ndihí tēe ni canacani jnūhun Yaā Dios, cáyūcú de ñuu nuū ndácu ya jniñu. Te rōhó, vēsú cácuu ró yúcūn de, te quívicoo ró núū ndoho ró. **29**Te cuehē ñayuu, vēsú tu cácuu i yucūn de, te quijicoo i ichi núū cáne niāndii jíín ichi núū quée niāndii, ichi norte jíín ichi sur. Te cucōo i mesa caji i staā ñuu nuū ndácu Yaā Dios jniñu. **30**Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

**Jeē ní cucuíhyá ni yā siquī ñáyuu ñuu Jerusalén**

(Mt. 23.37-39)

**31**Te máá quívī un ní quecoo jecu tēe fariseo, te ni cacahān de jíín yá: Cuiyo ní quihín ní inga lado, chí cúní Herodes cahni de níhín, áchí de.

**32**Te ni cahān yā:

Cuángoo te castūhun ró nuū tēe mañoso un jéé ná tu jinū quívī cuu



rī, chi vijna jíin sájnē quenehen ri tachī ini ñayuu, te nasávāha ri ñayuu cácuḥū. Te isá te jíinu jniñu sáha ri, achi rō. <sup>33</sup>Chi cánuú jéē cáca ri quihín rī vijna jíin sájnē jíin isá, te jíin rī Jerusalén. Chi tēe cánacani jnūhun Yaā Dios, tu cájihī de inga lado, chi máá-ni ini ñuu Jerusalén cájehni i de. Achí yá.

<sup>34</sup>Róhó ñuu Jerusalén, jéehni rō tēe cánacani jnūhun Yaā Dios, te jéhe ró yúū xinī tēe tájī Yaā Dios vējicoo nuū rō. Te cuehē jíinu ni cuni rī nastútú rí sēhe ró, nájnūhun ndují jéē nastútú tí sēhe tí chíjī ndijēn tī, te tu ní cúní rō. <sup>35</sup>Núu súcuan te vijna te stóo uun na ri rohó jíin sēhe ró. Te cáhán rī jíin ró jéē ndé vijna te ma cóto cuiti gā rō nuū rī, chi nde quiji quivī jeē cahán sēhe ró: Yōhyo vāha Yaā cúu Yaā vëndijí jíin jniñu máá Jítóho yō Yaā Dios, achi i. Achí yá.

Jeē ní nasávāha ya iin tēe  
cúhú cuehyī cuiñī

**14** Te iin quivī ndétātu ní jehēn yā vehe iin tēe fariseo cujéhnu, ni jecaji yā staā jíin de. Te tāca gá tēe fariseo cájito yuhu de ya núu stívi yá. <sup>2</sup>Te yūcuan íne iin tēe cúhú de cuehyī cuiñī, índichi de nuū yā. <sup>3</sup>Te ni cajnūhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuḥū quivī ndétātu, chí tuú? áchí yá.

<sup>4</sup>Te máá de tu ní cácahān cuiti de. Te ni jniñ ya tēe cúhú un, te ni nasávāha ya de, te ni cahān yā jeē na núhun de vehe de. <sup>5</sup>Te ni cahān yā jíin de jínáhan de:

¿Nde iin róhó núu burro ró chí stíquī rō ñingava tí ini pozo, te á tu yachī natava rō tí vēsú quivī ndétātu cúu, chí naún? Achí yá.

<sup>6</sup>Te tu ní cúu stío cuiñī de ni iin jnūhun nuū yā jeē súcuan ni cahān yā.

Jnūhun siquī ñayuu jéngoo vico

<sup>7</sup>Te ni jito Jesús jeē tēe ni cataca ún, cánacāji de silla yíñúhún gá nuū mesa cucōo de. Te ni cahān yā jnūhun yáha jíin de:

<sup>8</sup>Núu iin tēe cana de jeē quihín rō iin vico nándāha, te ma cúcōo ró lugar nuū yíñúhún gá. Chi núu súcuan te sanaa te je ni cana de iin tēe cújéhnu ga vēsú rohó. <sup>9</sup>Te quee tēe ni cana róhó, te cahān de jíin ró: Ndonga, te na cúcōo tēe yáha jíñā. Yūcuán na te cucanu rō jeē quihín rō cucōo ró ndé sandíhí na.

<sup>10</sup>Chi sa suhva núu ni cana iin tēe róhó, te cucōo ró ndé lugar sandíhí na. Te núu quee tēe ni cana róhó, te cahān de jíin ró: Amigo, nehen cucōo ró iin lugar nuū yíñúhún gá, achi de. Yūcuán na te ñayuu cáyūcu mesa jíin ró coto i jeē sajhénu de róhó. <sup>11</sup>Súcuan ni cahān rī jnūhun yáha návāha cuni rō jeē tāca ñayuu jeē sajhénu i máá i, nuu i sáha Yaā Dios. Te ñayuu jeē snūū i máá i, ndujéhnu i sáha ya. Achí yá.

<sup>12</sup>Te suni ni cahān yā jíin tēe ni cana ya yéji yā staā:

Núu sáha ró iin vico cúsámá chí jéē cuxíni, te ma cána ró ñayuu cácuu amigo rō, jíin ñani rō, jíin jnáhan ró, jíin ñayuu cucá. Chi núu súcuan te suni máá i nacana i róhó, te súcuan nanihín rō jeē ni jéhe ró. <sup>13</sup>Chi sa suhva núu sáha ró vico,

te cana ró ñáyuu ndahú, ñayuu cuhndú, ñayuu chacua, jíin ñáyuu cuaá. <sup>14</sup>Te súcuan te quendōo ndetū rō, chi ma cúu nacuaḥa i nuū rō. Te nihin rō tahū rō quivī nátecu ñayuu ndaā, achí yá.

**Jnūhun yátá síquī vico cúxíni**

<sup>15</sup>Te iin tēe yéji staā jíin yá, ni jini de jnūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, achí de.

<sup>16</sup>Yūcuán na te ni cahān Jesús iin jnūhun yátá jéē steen yā jeē cána Yaā Dios ñayuu quívicoo i ñuu nuū ndácu ya jniñu:

Iin tēe ni sáha de iin vico cáhnu cúxíni, te ni tají de mozo ni cana cuehē ñayuu. <sup>17</sup>Te máá quívī cúxíni, te ni tají de mozo de cuacana ñayuu jeē quíjicoo caji staā: Nehen ní jíjnáhan ní, chi je íyó túhva ndihí, achí mozo. <sup>18</sup>Te ndihí i ni cacahān i jeē na cóne cáhnu ni de chi ma quíngoo i. Iin tēe ni cahān de: Sáá ní jeen ri iin ñuhun te cánuú quícondēhe rí, te na cóne cáhnu ni de chi ma jeé rī. Achí de. <sup>19</sup>Te inga de ni cahān: Ni jeen ri uhūn yunta stiquī, te quihīn rī coto ndee rī tī, te na cóne cáhnu ni de nuū rī chi ma jeé rī, achí de. <sup>20</sup>Te inga de ni cahān de: Sáá ní quijnáhan ri, te jeē yúcuan ma cúu jeé rī, achí de. <sup>21</sup>Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quitī ni patrón, te ni cahān de jíin mozo de: Yachī quihīn rō tāca calle náhnu jíin calle lulí, te cana ró ñáyuu ndahú, ñayuu cuhndú, ñayuu

chacua, jíin ñáyuu cuaá, na quíjicoo i vico, achí de. <sup>22</sup>Te ni jehēn mozo, te ni ndee de, te ni cahān de jíin patrón de: Je ni sáha ná jéē ni cáhān ní, te cúmani gā ñayuu te chitú vehe ní, achí de. <sup>23</sup>Te ni cahān tucu patrón: Quihīn tucu ró táca calle jíin ichi, te cana fuerza rō ñayuu na quíjicoo i, návaha chitú vehe ri. <sup>24</sup>Chi cáhān ri jíin ró jeē ní iin tēe ni cana ri xihna ñuhún, ma cuáha cuiti rī jnūhun jeē cúxíni de vehe ri, achí de. Achí yá.

**Jnūhun jeē cánuú nacani vāha ni yō te condiquin yō Cristo**

<sup>25</sup>Te cuehē ndasí ñáyuu cándiquin i Jesús cuangoo i jíin yá, te ni ndió cóto ya nuū i, te ni cahān yā jíin i:

<sup>26</sup>Núu na-ni ñayuu cuní condiquin ruhū, te núu manī gā i jíin tátá i, náná i, ñasihí i, sēhe i, ñani i, cuāha i, vēsú jíin rúhū, ma cúu cuu i ñayuu scuáha jíin rí. Te núu ndíhví gā ni i siquī jeē cóo vāha máá i vēsú jeē cóndiquin i ruhū, te suni ma cúu tucu. <sup>27</sup>Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquin i ruhū, te ma cúu cuu i ñayuu scuáha jíin rí. <sup>28</sup>Chi núu ndé iin ró cúní rō sáha ró iin vehe cáhnu, zá tu cánuú jéē xihna gā cucōo ró te tava rō cuenta núu canda xūhun jéē sínu ró? <sup>29</sup>Chi núu tuú, te núu je ni jequin rō cimientō, te tu canda xūhun ró sínu ró, yūcuán na te tāca ñáyuu sácatā i coto i róhó. <sup>30</sup>Te cahān i: Tēe yáha ní quejéé de sáha de vehe, te tu ní canda de sínu de, achi i. <sup>31</sup>Te suni súcuan núu iin rey quihīn de cuajnáhan de jíin inga

rey jeē véji siquī de, ¿á tu cánuú jeē xíhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji siquī de jíin ócō mil soldado? <sup>32</sup>Chi núu tú canda de, te níní jíicá gá véji inga rey, te tají de tēe cándiso jnīñu, cajnúhún de na vé cuní inga rey jeē cuáha de nuū, te jecuíñī-ni. <sup>33</sup>Te máá ró jijnáhan ró, suni súcuan cánuú jeē xíhna gā nacani ni rō cahnde ni rō stóo ró ndihí jeē névaha ró, chi núu tuú te ma cúu cuu ró ñayuu scuáha jíin rí.

### Jnūhun yátá síquī ñīī

(Mt. 5.13; Mr. 9.50)

<sup>34</sup>Te ñayuu cácanđije cácuu i nájñūhun ñīī. Vāha iyó ñīī, te núu ñīī ún na náa jeē uhvuá, ¿te ndese nduu uhvuá tucu? <sup>35</sup>Tuá cuajníñu cuítí, ni jeē chúhun ñayuu nuū ítu, ni jeē ndúu jēhen, chi máá cate íi-ni i. Tāca rōhó jeē jíni sōho, na chúsóhó ró. Achí yá.

### Jnūhun yátá síquī lanchi ní sana

(Mt. 18.10-14)

**15** Te tāca tēe cástútú xúhun renta jíin táca gá tēe cásaha cuēchi, ni quecoo de nuū Jesús jeē cuni sōho de jñūhun cáhán yā. <sup>2</sup>Te tāca tēe grupo fariseo jíin tēe cástéén tutu ley Yāa Dios, ni cacahān de síquī yā:

Tēe yáha jétáhú de tāca tēe cásaha cuēchi te yéji de jíin, áchí de.

<sup>3</sup>Te ni cahān yā jñūhun yátá yáha jíin de:

<sup>4</sup>¿Ndé ñin ró núu névaha ró ñin ciento lanchi, te núu scuíta ró ñin tí, te á tu stóo ró cúun xico xahūn

cuūn gā tí yucu, te quinanducú ró quítí ní sana ún ndé nanihīn rō tí?

<sup>5</sup>Te núu ni nanihīn rō tí, te coso sūcun ró tí, te cusīñ ni rō. <sup>6</sup>Te núu ni ndee rō vehe ró, te nastútú ró tācá amigo rō jíin ñáyuu yúcu yajni jíin ró, te cahān rō jíin i: Na cusīñ ni yō, chi ni nanihīn rī lanchi ri jeē ní sana. Achí rō. <sup>7</sup>Te cáhán rī jíin ró jeē suni súcuan cúu nde andiví. Chi cusīñ gā ni yā jíin ñin ñayuu iyó cuēchi núu nacani ni i jeē stóo i cuēchi i, vēsú jíin cúun xico xahūn cuūn ñayuu iyó ndāa jeē tuá jíni ñúhún nacani ni i.

### Jnūhun yátá síquī ñahan ní scuíta xūhún

<sup>8</sup>Te núu ñin ñahan névaha ña uxī peso cāa, te núu scuíta ña ñin, ¿á tu nastīñ ña lámpara te nastāa ña vehe, te nanducú yúcún ña nde nanihīn ña? <sup>9</sup>Te núu ni nanihīn ña, te nastútú ña tācá amiga ña jíin ñáyuu yúcu yajni jíin ña, te cahān ña jíin i: Na cusīñ ni yō, chi ni nanihīn rī xūhun jeē ni scuíta rí. Achí ña. <sup>10</sup>Te cáhán rī jíin ró jeē suni súcuan cusīñ ni tācá ndajéhé Yāa Dios síquī ñin ñayuu iyó cuēchi núu nacani ni i jeē stóo i cuēchi i. Achí yá.

### Jnūhun yátá síquī sūchi ní jéhēn jecó

<sup>11</sup>Te ni cahān gā yā:

Ñin tēe ni iyo uū sēhe yíí de. <sup>12</sup>Te tēe suchí gá ni cahān i jíin tátá i: Tátá, tahú sáva ní ndajñíñu ní, te cuáha ní sava cuu tahū ná, áchí i. Te ni tahú sáva de tahū ndíndúu i. <sup>13</sup>Te ni cuu jecu-ni quiví, te tēe suchí gá un ní stutú ndihí i ndajñíñu i. Te ni quenda i cuahān

i ñin ñuu jicá. Te yūcuan ní snáā i tahū i, chi ni jexin cāhá i. <sup>14</sup>Te ná ni ndihí ni jexin i, te ni quee ñin jnamā xeén ini ñuu ún, te ni quejéé cúmanī jeē caji i. <sup>15</sup>Yūcuán na te cuanducú jniñu i nuū ñin tēe ñuu ún. Te ni tají de i cuahān i rancho de jeē cóto i quínī de. <sup>16</sup>Te cúní i caji i vēsú soō ndúchi jeē cáyeji quínī ún, návāha ndutú chíji i. Te ni ñin ñayuu tú na vé jéhe nuū i. <sup>17</sup>Yūcuán na te ni quejéé i nácani ni i: Tāca mozo casájniñu vehe tátá rī, íyó cuéhē staā cáyeji i. Te ruhū chí jí rī sōco yāhá. <sup>18</sup>Na quínuhun rī nuū tátá rī, te cahān rī jíin de: Tátā, ni sáha ná cuéchi nuū Yaā Dios jíin núū maá ní. <sup>19</sup>Vijna te nasūu gá tēe vāha cúu ná jéē cónaní ná sēhe ní. Te cuāha ní jnúhun cuu ná nájnūhun ñin mozo ni, achi rī. <sup>20</sup>Yūcuán na te ni naquihin i ichi cuanuhun i vehe tátá i.

Te níiní jíca gá vēji i, te ni jito tátá i nuū i, te ni cundáhú ni de i. Te jíinu de cuajnahān de i, te ni nundee de sucūn i, te ni techūhú de i. <sup>21</sup>Yūcuán na te ni cahān i jíin de: Tátā, ni sáha ná cuéchi nuū Yaā Dios jíin núū maá ní. Vijna te nasūu gá tēe vāha cúu ná jéē cónaní ná sēhe ní. Achí i. <sup>22</sup>Te maá tátá i chi sa ni cahān de jíin táca mozo de: Cuáquihin sahma váha ga te chuhun ró i. Te chuhun ró ñin xehyu ndaha i, te chihi ró ndíjēn jehē i. <sup>23</sup>Te quiquihin ró becerro xéhen, te cahni rō tī na caji yō, chí sáha yó vico. <sup>24</sup>Chi sēhe yíí rí yáha, nájnūhun je ni jihí i, te ni natecu i. Chi tu ní jíin rī ndé chí ní jéhēn i, te ni ndee i, achí de. Te ni caquejéé de cásáha de vico.

<sup>25</sup>Te sūchi jévāha, íne i nde rancho, te vēndiji i, te ni cuyajni i yatā véhe. Te ni jini i jeē cúu yaa te cájita jéhé ñayuu. <sup>26</sup>Te ni cana i ñin mozo, te ni cajnúhún i na vé cúu jeē cúu. <sup>27</sup>Te ni cachi mozo un núu i: Ni ndee ñani rō, te tátá rō ni jehni de becerro xéhen, chí ni ndee vāha i nuū de, achí mozo. <sup>28</sup>Yūcuán na te ni quitī ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jíin i jeē na ndívi i. <sup>29</sup>Te ni cahān i jíin tátá i: Níní sáha ná jniñu ndácu ní, te tu cúnihni cuítī ni na núu ní. Te tu jéhe ní vēsú ñin lítú núu ná, jeē sáha ná vico caji na jíin táca amigo na. <sup>30</sup>Te ni ndee sēhe ní yáha jeē ni jéxín cāhá i xūhun ní jíin táca ñahan. Te ni jehni ní becerro xéhen caji i, achí i jíin tátá i. <sup>31</sup>Yūcuán na te ni cahān de jíin i: Séhē, róhó chí níiní ndéé ró jíin rí, te ndíhi jeē névāha rí chí suni cuenta maá ró cúu. <sup>32</sup>Te vijna chí íyó váha jeē sáha yó vico te cusíi ni yō. Chí ñani rō yāhá, nájnūhun ni jihí i, te ni natecu i. Chí tu ní jíin yō ndé chí ní jéhēn i, te ni ndee i, achí de. Achí yá.

#### Jnúhun yátá síquī mozo jeē ni stáhú de patrón de

**16** Te suni ni cahān Jesús jíin tēe cáscuáha jíin yá:

Ñin tēe cúcá ní íyo ñin mozo de jeē ndíso jniñu nuū táca gá mozo. Te ni cacahān jíin patrón un jéē mozo un snáā cāhá ndajniñu de. <sup>2</sup>Te ni cana de mozo un, te ni cahān de jíin: ¿Na jnúhun cúu yāha jéē nihín rī síquī rō? Nacuāha cuenta jniñu ndíso ró, chí ma cóndiso jniñu ga

rō nuū mozo rī. Achí de. <sup>3</sup>Yūcuán na te jéni ni maá de: ¿Ndesa sáha ri vijna? Chi patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chi cúcanu rī. <sup>4</sup>Núu súcuan te jíin rī ñin jeē sáha ri, návāha ñayuu cájeen nuū patrón rī, cuáha i vehe condee rī núu na quée quivī jeē quénehen de jniñu ri. <sup>5</sup>Te ni cana de ná ñin ná ñin tēe jeē cátaū nuū patrón de. Te ni cajñuhún de ñin: ¿Nasaa táú rō nuū patrón rī? <sup>6</sup>Te ni cahān tēe ún: ñin ciento barril aceite, achí de. Te ni cahān mozo un: Yāhá na cuáha ri lista rō, te cucōo yachī rō, te na sáha ró inga lista jeē uú xico uxī na, achí de. <sup>7</sup>Yūcuán na te ni cajñuhún de inga tēe: Te rōhó, ¿nasaa táú rō? Te tēe un ní cahān de: ñin ciento cajón trigo, achí de. Te ni cahān de jíin tēe ún: Yāhá na cuáha ri lista rō, te na sáha ró inga lista jeē cuún xico na, achí de. <sup>8</sup>Yūcuán na te patrón ni cahān de: Nacā jeē ndichí ní sáha tēe cúnéé un, achí de. Te cáhán rī jíin ró jeē ñayuu ñayīvi yáha, ndichí gá casáha i jeē quendōo vāha i nuū jnāhan i, vēsú ñayuu cácandíje nuū Yaā Dios.

<sup>9</sup>Núu súcuan te cáhán rī jíin ró jeē ndichí gá na sáha ró vēsú jeē ni sáha mozo ndichí un. Chi ini ñayīvi yáha nuū yíhi cuēchi, na sáha ró jniñu vāha jíin xúhun ró, cuáha ró núu ñayuu ndahú, návāha vēsú núu ni ndíhi xúhun ró ñayīvi yáha, te quivīcoo ró andiví núu coo vehe ró níí cáni.

<sup>10</sup>Tēe jeē squícu vāha jíin ñin jniñu lúlí-ni, suni squícu vāha de jíin jniñu cáhnu. Te tēe jeē stahú jíin ñin jniñu lúlí-ni, suni stáhú de

jíin jniñu cáhnu. <sup>11</sup>Núu súcuan te núu tu squícu vāha ró jíin xúhun jeē iyó ñayīvi yáha nuū yíhi cuēchi, te ma cuáha ya jeē vāha cuu ró níí cáni andiví. <sup>12</sup>Te núu tu squícu vāha ró jíin ndajniñu jeē ni jéhe núu ya nuū rō ñayīvi yáha, te ma cuáha ya tahū cuu ró níí cáni.

<sup>13</sup>Ni ñin mozo ma cúu cuajniñu de nuū uū patrón. Chi quitī ni de nuū ñin te coo manī de jíin inga, chí squícu vāha de nuū ñin te sájéé ni de nuū inga. Te suni súcuan ma cúu cuajniñu ró núu Yaā Dios te núu máni siquī xúhun ndíhvī ni rō, achí yá.

<sup>14</sup>Te tēe fariseo ni casácatā de nuū yā jeē ní cajini de tāca jñuhun cáhán yā, chi tēe cútóó xúhun cácuu de. <sup>15</sup>Te ni cahān yā jíin de:

Máá ró casáha ró jéé tēe ndaā cácuu ró núu ñayuu. Te Yaā Dios chí jíiní yā ndese cáa ini anuá rō. Chí jniñu cájeni ni ñayuu jeē jniñu jéhnu cúu, te nuū Yaā Dios chí jniñu néé cúu.

**Siquī ley Yaā Dios jíin  
síquī jeē ndácu ya jniñu**

<sup>16</sup>Nde ná tu quiji Juan tēe scuándute, te ni iyō ley jeē ni jéhe Yaā Dios nuū Moisés, te suni ni castéén tāca tēe cánacani jñuhun ya. Yūcuán na te ná ni quiji Juan, te ni quejéé jítē núu jñuhun vāha ndese ndácu Yaā Dios jniñu. Te tāca ñayuu nducú ndéyí i quivīcoo i ndaha ya.

<sup>17</sup>Te yíí gá cúu jeē náā ñin letra nuū tútu ley yā vēsú jeē náā andiví jíin ñayīví, chí squícu ndíhi jñuhun cáhán.

**Siquí jeē ma stóo jnáhan tēe jín  
ñahan**

(Mt. 19.1-12; Mr. 10.1-12)

<sup>18</sup>Núu iin tēe stóo de ñasihí de te quijnáhan de jín inga ñahan, núu súcuan te cásiquí ndéē de ña. Te núu iin tēe condeca de ñahan ní ndusín, suni cásiquí ndéē de ña, áchí yá.

**Jnūhun tēe cúcá jín Lázaro**

<sup>19</sup>Te ni cahān gā yā:

Ni iyo iin tēe cúcá, ní ñuhun de sahma lúu váha ndasí. Te ndiquiví ni iyo váha ndasí jéē ní yeji de. <sup>20</sup>Te suni ni iyo iin tēe ndáhú, nání de Lázaro, néne de yéhyí tēe cúcá un, te hí cáhnu de iin ndíhyi. <sup>21</sup>Te máni cúní de jeē ndutú chíji de jín stāa cuēchi jeē stívi tēe cúcá un. Te quécoo ina te cánayuu tí nuū ndíhyi de. <sup>22</sup>Te ni jihí tēe ndáhú un, te tēcá ndajéhé Yaā Dios cuangoo ya jín ánuá de nde andíví nuū néne Abraham. Te suni ni jihí tēe cúcá un, te ni quindūji de. <sup>23</sup>Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jín de. <sup>24</sup>Yūcuán na te ni cana cóho de: Tátā Abraham, cundáhú ni ni sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chi xeēn ndóho ná núu yáñuhūn yāhá. Achí de. <sup>25</sup>Te ni cahān Abraham jín de: Séhē, nucūhun ni rō jeē ni níhīn rō ndíhi jeē váha ná ni cotecu rō, te Lázaro chí sa suhva jnūndóho ni nihīn de. Te vijna je ni ndusí ni de yāhá, te róhó chí ndóho ró jínā. <sup>26</sup>Te suni

íyó iin jeē cunú téyí, íne mēhñu yó jijnáhan yó. Te ñayuu cáhiin yāhá, vēsú cácuini i yāha i jeē i nuū rō, te ma cúu. Te ni ma cúu yāha máá ró quijicoo ró yāha. Achí Abraham. <sup>27</sup>Yūcuán na te ni cahān tēe cúcá: Núu súcuan te cáhán ndahú ná jín ní, Tátā Abraham, tají ní Lázaro na quíhīn de vehe tátā na. <sup>28</sup>Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, áchí de. <sup>29</sup>Te ni cahān Abraham jín de: Je cánevāha i tutu jeē ní tee Moisés jín táca tēe ni canacani jnūhun Yaā Dios. Suu yūcuán na chúhun ni i, áchí Abraham. <sup>30</sup>Te ni cahān tucu tēe cúcá: Vēsú súcuan, Tátā Abraham, te núu iin ñayuu ni jihí quihīn nuū i, yūcuán na te nacani ni i jeē stóo i cuēchi i, áchí de. <sup>31</sup>Te ni cahān Abraham jín de: Núu tu chúhun ni i jnūhun ni nacani Moisés jín táca tēe ni canacani jnūhun Yaā Dios, suni ma candíje cuítí i núu natecu iin ndíyí quihīn nuū i, áchí de.

**Xeēn coo siquí ñayuu squívi jnáhan  
nuū cuéchi**

(Mt. 18.6-7, 21-22; Mr. 9.42)

**17** Te ni cahān Jesús jín tēe cáscuáha jín yá:

Máni íyó jéē nducú squívi ñayuu nuū cuéchi. Te nacā xeēn ndóho ñayuu jeē squívi jnáhan nuū cuéchi. <sup>2</sup>Vāha ga núu ni conuhnī iin yōso cáhnu sucūn i te quēe i chíji ndute mar, vēsú jeē squívi i iin sūchi lúlí yāha núu cuéchi. <sup>3</sup>Coto ma sáha ró súcuan jijnáhan ró. <sup>4</sup>Te núu jnáhan ró sáha de cuēchi siquí rō, te cahān rō nuū de. Te núu nacani ni

de, te cone cáhnu ni rō nuū de. <sup>4</sup>Te núu uxā jínu jeē ñin quivī sáha de cuēchi siquī rō, te núu uxā jínu nácani ni de te cahān de jíin ró jeē cone cáhnu ni rō chí ma sáha ga de, te cánuú cone cáhnu ni rō nuū de. Achí yá.

### Jeē yóhyo cújéhnu jñūhun cándíje

<sup>5</sup>Te tēe cácuu apóstol ni cacahān de jíin Jítoho yō:

Sáha ní jēe ñihin ga candíje ná jēe sáha Yaā Dios jeē cájicān na núu yā, achí de.

<sup>6</sup>Te ni cahān maá Jítoho yō jíin de:

Núu cácuu ró vēsū ñin tíhli-ni, nájnūhun ñin ndiquin mostaza jeē tíhli-ni cáa, te cuu cahān rō jeē núyūhndu yáha na quēnda te nucondichi nde nuū mar, te coo nájnūhun cahān rō.

### Jeē cánuú squícu vāha yó núu yā

<sup>7</sup>Nde ñin ró íyó mozo rō jeē jítu de chí ndíto de quiti ndéca ró, te núu ni najinū de vehe ró, te tu cáhán rō jíin de jeē cúcōo de caji de staā. <sup>8</sup>Chi sa suhva cáhán rō: Sáha ró ndeyu cuxini ri, te cani ró cohō ri. Te núu ni cuu ni yeji ri ni jili ri, yūcuán na te caji maá ró coho ró, cácahān rō. <sup>9</sup>Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chí jeē cánuú sáha de cúu. <sup>10</sup>Te suni súcuu maá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatáhú yá nuū ri, chí ni sáha ri máa-ni jeē cánuú sáha ri, achí rō. Achí yá.

### Jeē ní nasávāha ya uxī tēe ndóho cuehyī stehyú

<sup>11</sup>Te jíca Jesús ichi cuahān yā ñuu Jerusalén, te ni yáha ya cuahān yā

mēhñū región Samaria jíin Galilea.

<sup>12</sup>Te ni jinū yā ñin ñuu, te uxī tēe ndóho cuehyī stehyú ni quendacoo de vejnahan de ya, te jíca ní cajecuiñi de. <sup>13</sup>Te ni cacana jee de:

Jesús, Maestro, cundáhú ni ni sáña, áchí de jíjnáhan de.

<sup>14</sup>Te ni jito Jesús nuū de, te ni cahān yā jíin de:

Cuángoo te stéén rō maá ró nuū táca sūtū jeē ní canduvāha ró, áchí yá.

Te níní cuángoo de te ni canduvāha-ni de. <sup>15</sup>Yūcuán na te ñin-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de. <sup>16</sup>Te ni jecuiñi yití de nuū yā, te ni jequin de nuū de nde nuū ñūhun, te ni nacuatáhú de nuū yā. Te tēe Samaria cúu de. <sup>17</sup>Te ni cahān Jesús:

¿A násūú ndihúxí de ni canduvāha? Te ñin gā de, ¿naun tu ní cánandicó de nacuatáhú de? <sup>18</sup>¿A máñúhún-ni tēe ñuu jíca yáha cúu jeē ní nandicó de nacuatáhú de nuū Yaā Dios?

<sup>19</sup>Te ni cahān yā jíin tēe ún:

Ndocuiñi quinhun rō. Chi ni candíje ró jēe cuu nasávāha ri rohó, te jeē yúcuu ní nduvāha ró, áchí yá.

### Ndese coo quivī jeē ndíji ya ndacu ya jniñu

(Mt. 24.23-28, 36-41)

<sup>20</sup>Te tēe fariseo ni cacajnūhún de Jesús ndé quivī quejéé jēe ndacu Yaā Dios jniñu ini ñayiví. Te ni cahān yā jíin de:

Ma queé ndijin jeē ndacu Yaā Dios jniñu. <sup>21</sup>Ni ma cúu cahān ñayuu: Yáha íne ya ndacu ya jniñu, chí:

Yūcuan íne ya, achi i. Chi je ndácu Yaā Dios jniñu mēhñu ró jijnáhan ró. Achí yá.

<sup>22</sup>Yūcuán na te ni cahān yā jíin tēe cáscuáha jíin yá:

Quee tiempo jeē yóhyo cúu ni rō coto ró jeē ndíji ruhū, Yaā ní nduu tēe, te ma coto ró jijnáhan ró. <sup>23</sup>Te cahān ñayuu jíin ró: Yāha íne ya, chí: Yūcuan íne ya, achi i. Te ma quíngoo ró condēhe ró, ni ma cóndiquin rō i. <sup>24</sup>Chi nájnūhun sáha taja jeē ndíndēe ñin lado andíví te cúndijin nde inga lado, suni súcuan cuu quiví ndíji ruhū, Yaā ní nduu tēe, chi ndíhi ñayuu coto. <sup>25</sup>Te jíni ñúhún jéē xíhna gā ndoho xeēn rí, te ñayuu iyó vijna, squéhichí i ruhū. <sup>26</sup>Chi nájnūhun ni cuu quiví ni íyo Noé, suni súcuan cuu quiví ndíji ruhū, Yaā ní nduu tēe. <sup>27</sup>Chi quiví un ní cayejí i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quiví jeē ni quíví Noé ini barco cáhnu jeē naní arca. Te ni cuun saū xeēn, te ni ndaa ndute ni cajihí ndíhi i. <sup>28</sup>Te suni súcuan ni cuu quiví ni íyo Lot. Ni cayejí i, ni cajihí i, ni cajeen i, ni caxicó i, ni catajé i itu, ni cajeni i vehe. <sup>29</sup>Te quiví jeē ní quenda Lot ini ñuu Sodoma cuahān de, te ni cuun ñuhūn jíin azufre ichi ándíví, te ni snāā ndíhi ñayuu. <sup>30</sup>Te suni súcuan coo quiví jeē ndíji ruhū, Yaā ní nduu tēe.

<sup>31</sup>Te quiví ún te ñayuu cáhiin yatā véhe, te ndajníñu i ñúhun ini vehe, cáhán rí jíin i jeē ma ndívi i naquihin i, chí cánuú cunu yachí i jeē cácu i. Te suni súcuan ñayuu casájniñu nuū ítu, ma quínuhun i vehe i jeē quíhin i ndajníñu i. <sup>32</sup>Te

ncūhūn ni rō ndese ni ndoho ñasihí Lot jeē ni jíhi ña. <sup>33</sup>Te núu ndé ñáyuu cuní i cácu i nuū jnúndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni.

<sup>34</sup>Te cáhán rí jíin ró jeē quiví ndíji ri te quíxí uū tēe ñin jito jecúaā, te ñin de naquihin ri, te inga de ndōo, chí tu ní cándíje de. <sup>35</sup>Te coo uū ñahan jeē ndíco cáhnu, te ñin ña naquihin ri, te inga ña ndōo. <sup>36</sup>Te uū tēe sájniñu de nuū ítu, te ñin de naquihin ri, te inga de ndōo. Achí yá.

<sup>37</sup>Te jeē ní cajini de jnūhun yáha, te ni cacajnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jíin de:

Nájnūhun jeē cutútú téji ndé-ni cúu nuū catú quítí ní jíhi, suni súcuan coo tāca jéē ni cáhán rí ndé-ni cúu-ni nuū cáhiyo ñayuu.

### Jnūhun yatá síquí juez jíin ñahan viuda

**18** Te ni cahān yā ñin jnūhun yatá jíin de jeē cánuú jeē niní cácan tahu de, te ma ndínuu ni de jíin. <sup>2</sup>Te ni cahān yā:

Ni íyo ñin juez ini ñin ñuu. Te ni tu ndíso íyo de nuū Yaā Dios, ni tu yúhú de nuū ní ñin ñayuu. <sup>3</sup>Te suni ñuu un íyó ñin ñahan ní ndóo ndáhú. Te ñahan un jéhén-ni jéhén-ni ña nuū de, jícan ña jeē na sándaa de síquí ñin ñayuu jeē jito uhū i ña. <sup>4</sup>Te cuehē quiví tu ní cúní de sándaa de, te yūcuán na te ni jeni ni de: Vēsú tu ndíso íyo ri nuū Yaā Dios, ni tu yúhú rí



nuū ní iin ñayuu, <sup>5</sup>te ñahan viuda yáha, yōhyo stáhān ña ruhū, te jeē yúcuān na sándaā rī siquī ñayuu jeē jíto uhū i ña. Chi núu tuú, te quejéé rí jnaníní ni rī jeē quíji quíji ña. Achí de. Achí máá Jítoho yō.

<sup>6</sup>Te ni cahān gā yā:

Súcuān cúu jeē ni cáhān juez, tēe tú ndaā. <sup>7</sup>Te Yaā Dios, nasūu súcuān cúu ya, chi sándaā yā siquī jniñū ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jéé cájito uhū i. ¿Te á cuéé jnama ya i? <sup>8</sup>Cáhán rī jíin ró jeē yachī. Te quivī ndíji ruhū, Yaā ní nduu tēe, ¿á níhīn gā rī ñayuu cácañdije nihin ini ñayivf? Achí yá.

#### **Jnūhun yátá síquī tēe fariseo jíin tēe stútú xūhun renta**

<sup>9</sup>Te suni ni cahān yā jnūhun yátá yáha jíin jecu ñayuu jeē cájeni ni i jeē ñayuu ndaā cácuu i, te cájeni ni i jeē sava ga ñayuu tu cáhiyo ndaā:

<sup>10</sup>iin tēe fariseo cuahān de templo jeē cacān tahú de. Te iin tēe stútú xūhun renta suni cuacacān tahú de templo. <sup>11</sup>Te tēe fariseo, índichi de, te súcuān ni jicān tahú de: Tātā Yaā Dios, na cútahū na núu ní, chi tu cúu ná nájnūhun cándaā sava ga tēe, tēe cuíhná, tēe néé, tēe cásíquí ndéé jnáhan cácuu de. Ni tu cúu ná nájnūhun cáa tēe yúcuān jéé stutú xūhun renta jeē scāa ga de jíicān de nuū ñayuu. <sup>12</sup>Te uū jínu jeē semana iyó ndite ni na núu ní, te jéhe ná nuū ní iin iin siquī tāca úxī ndajniñū níhīn na, áchí de. <sup>13</sup>Te tēe stútú xūhun renta, ni jecuiñī jicá de nuū templo, ni tu ní chūndeyí ni de jeē ndonehen de nuū de, chi

sa suhva ni cani de yīqui jíicā de jeē cucuíhyá ni de. Te ni cahān de: Tātā Yaā Dios, cundáhú ni ni sáña, chi tēe iyó cuéchi cúu ná, áchí de. <sup>14</sup>Te cáhán rī jíin ró jeē tēe stútú xūhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajeñnu i máá i, sa ndululí i. Te ñayuu jeē sálulí i máá i, sa ndujéñnu i. Achí yá.

#### **Jeē ni jíicān tahú Jesús jehē sūchi lúli**

*(Mt. 19.13-15; Mr. 10.13-16)*

<sup>15</sup>Te ni quecoo ñayuu jíin sūchi lúli núu Jesús, jeē na sóo yá ndaha ya xini i. Te tēe cáscuáha un ní cajini de jeē súcuān cúu, te ni cacahān de nuū ñayuu vējicoo jíin i. <sup>16</sup>Te máá Jesús ni cana ya de, te ni cahān yā:

Cuāha jnūhun na quíjicoo sūchi lúli jíñā nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quivī ndaha Yaā Dios jeē ndacu ya jniñū nuū i. <sup>17</sup>Te jendaá cahán rī jíin ró, núu iin ñayuu tú cuatáhú i jeē ndácu Yaā Dios jniñū nuū i, nájnūhun jétáhú iin sūchi lúli, ma quivī cuiti i ndaha ya, áchí yá.

#### **Jnūhun tēe cúcá**

*(Mt. 19.16-30; Mr. 10.17-31)*

<sup>18</sup>Te iin tēe cújéñnu ni cajñuhún de ya:

Tēe vāha cúu ní Maestro. ¿Te na jniñū vāha sáha ná te nihīn tahú na cotecu na níí cáni andivf? Achí de.

<sup>19</sup>Te ni cahān Jesús jíin de:

¿Naun cáhán rō jeē tēe vāha cúu rí? Tú ni iin tēe vāha iyó, chi máá iin-ni Yaā Dios. <sup>20</sup>Je jíin rō tācá

jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyi. Ma sacuíhná ró. Ma sajnúhún ró. Cuatáhú ró nuū tatá rō nuū naná rō. Achí yá.

<sup>21</sup>Te ni cahān maá de:

Tācá jniñu yáha je ni squícu ná ndé ná lulí ná, achí de.

<sup>22</sup>Te Jesús ni jini ya jnūhun yáha, te ni cahān yā jíin de:

Īin na jniñu cúmani sáha ró núu súcuan. Xícō ndīhi jeē névāha ró, te cuāha ró núū ñáyuu ndahú. Te nde andívī cuāha ya jeē váha ndasí núū rō. Yūcuán na te quiji ró condiquīn rō ruhū, achí yá.

<sup>23</sup>Te ná ni jini sōho de jnūhun yáha, te yōhyo ni cucuíhyá ni de, chí cúcá ndasí de. <sup>24</sup>Te jíto Jesús jeē súcuan cucuíhyá ni de, te ni cahān yā:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de. <sup>25</sup>Yachī gā yāha ĩin camello yaū yutícuī vēsú jeē quívi ĩin ñáyuu cucá ndaha Yaā Dios jeē ndacu ya jniñu nuū i, achí yá.

<sup>26</sup>Te tēe ní cajini jnūhun yáha, ní cacahān de:

¿Ndé ñáyuu cúu jeē cácu núu súcuan? Achí de.

<sup>27</sup>Te ni cahān yā jíin de:

Ñáyuu chí ma cúu squívī i máá i ndaha Yaā Dios, te máá yá chí cuu sáha ya, achí yá.

<sup>28</sup>Yūcuán na te ni cahān Pedro:

Sāña jíjnáhan ná ní castóo ná ndīhi jeē cánevāha ná, te cándiquīn na níhín, achí de.

<sup>29</sup>Te máá yá ni cahān yā jíin de:

Jendaá cahán ri jíin ró jíjnáhan ró, núu na-ni ñáyuu stóo i vehe, chí tátá, chí ñani, chí ñasihí, chí

sehe, jeē siquí jeē scáca i jnūhun jeē ndacu Yaā Dios jniñu nuū ñáyuu, <sup>30</sup>núu súcuan te nanihīn cuehē gā i ini ñáyivi yáha, te tiempo quiji te cotecu i níí cáni, achí yá.

**Jeē ni cahān tucu ya jeē cúu yā**

(Mt. 20.17-19; Mr. 10.32-34)

<sup>31</sup>Te ni cana sīin ya ndihúxi uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndīhi jnūhun ndese ndoho ruhū, Yaā ní nduu tēe, nájñūhun ni catee tēe ni canacani jnūhun Yaā Dios nde jenahán. <sup>32</sup>Chí ñáyuu nastúu i ruhū nuū tēe nación Roma jeē cáyucú Jerusalén cándacu jniñu. Te tēe un sácatā de nuū rī, te cahān neé de nuū rī, te tesīhí de nuū rī. <sup>33</sup>Te cani de ruhū, te sáá te cahni de ruhū. Te nuū uní quivī te natecu rī. Achí yá.

<sup>34</sup>Te máá de tu ní cájecūhun cuiti ni de tāca jnūhun yáha. Chí jnūhun yíí cúu, te tu ní cúu jecūhun ni de jeē cahán yā.

**Jeē ní nasávāha ya ĩin tēe cuáá ñuu Jericó**

(Mt. 20.29-34; Mr. 10.46-52)

<sup>35</sup>Te ni cuyajni ya cuahān yā ñuu Jericó. Te ĩin tēe cuáá néne de yuhíchi, jícan de caridad. <sup>36</sup>Te ni jini sōho de jeē yáha cuehē ñáyuu cuangoo i, te ni cajñūhún de naun cuángoo i. <sup>37</sup>Te ni cacahān i jíin de jeē Jesús, tēe ñuu Nazaret, yáha ya cuahān yā. <sup>38</sup>Yūcuán na te ni cana jee de:

Jesús Sēhe yucūn David, cundáhú ni ní sáña, achí de.

<sup>39</sup>Te ñáyuu cuangoo ichi núu yá, ni cacahān i nuū de jeē na cási de

yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

<sup>40</sup>Yūcuán na te ni jecuiñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajñuhun yá de:

<sup>41</sup>¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tinūu ná cuní na, achí de.

<sup>42</sup>Te ni cahān Jesús jíin de:

Ndúndijin tinūu ró núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, achí yá.

<sup>43</sup>Te ni ndúndijin-ni tinūú de, te ni ndiquin de ya, te nácuatáhú de nuū Yaā Dios. Te ndíhi ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

### Jnūhun Zaqueo

**19** Te ni quivi Jesús ini ñuu Jericó, te ni yāha-ni ya cuahān yā. <sup>2</sup>Te yūcuan íyō ñin tēe cúcá nání de Zaqueo, te cújéhnū de nuū tēe cástítú xūhun renta. <sup>3</sup>Te cúni de coto de návāha cuni de ndé ñin cúu Jesús. Te tu ní cúu, chi cuehē ñayuu cuangoo i jíin yá, te ndiqui-ni cáa de. <sup>4</sup>Te jínu de ni cosnūú de. Te ni caa de xiní ñin nuyūhndú návāha coto de nuū yā, chi yūcuan yáha ya quihīn yā. <sup>5</sup>Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachí nuu ró, chi jíni ñúhún jēe ndóo ri vehe ró vijna, achí yá.

<sup>6</sup>Yūcuán na te ni cusii ni de, te yachí ni nanuu de, te ni jeca de ya cuahān de jíin yá vehe de. <sup>7</sup>Te ni cajito ñayuu jeē súcuan ni cuu, te ni cacahān i siqui yā jeē cuahān yā ndōo ya vehe ñin tēe sáha cuēchi.

<sup>8</sup>Yūcuán na te ni ndocuiñi Zaqueo, te ni cahān de jíin máá Jítoho yō:

Vijna te sava ndíhi ndajniñu ná chi cuāha ná núu ñayuu ndahú. Te núu ni scāa ga na ní jicān na xūhun nuū ñayuu, te nacuāha ná úní gā siqui naquihin i, achí de.

<sup>9</sup>Te ni cahān Jesús:

Vijna te vehe yáha je ni cācu ñin tēe jeē ma jnahnú ndetū de, chi ni candíje de nájñuhun ni candíje jíi de Abraham. <sup>10</sup>Chi ruhū, Yaā ní nduu tēe, ni quiji ri nducú rí ñayuu jeē jnahnú ndetū, te jnama ri i, achí yá.

### Jnūhun yátá siqui uxí mozo jíin xūhun

<sup>11</sup>Te nuū ñayuu ní cajini tāca jnūhun yáha, ní cahān gā Jesús ñin jnūhun yátá jēe steén yā ndese coo quiví ndíji ya. Chi je ni cuyajni ya ñuu Jerusalén, te cájeni ni i jeē vijna ñúhún quejéé jēe ndacu ya jniñu sáha Yaā Dios. <sup>12</sup>Te ni cahān yā:

Ñin tēe cújéhnū cuahān jicá de inga nación, návāha nihīn jniñu de cuu de rey, te ndiji de ndacu de jniñu. <sup>13</sup>Te nde ná tu quihin de, te ni cana de uxí mozo de, te nuū ñin ñin i ni jēhe de ñin xūhun jēe ndeé yahu ndasí. Te ni cahān de jíin i: Sájniñu ró jēe na ndúcuehē xūhun yáha jíjnáhan ró níni jēe quihín rí te ndee rí, achí de. <sup>14</sup>Te ñayuu nación de cáquití ni i nuū de, te

ni catají i jecu tēe cándiso jniñu cuangoo yatā de jeē cahān: Tu cánujnahan ni ñayuu nación na jéē cuáha ní jniñu nuū tēe yáha jéē cuu de rey nuū i, achí. <sup>15</sup>Te vēsú súcuan te ni nihīn jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quǐjicoo mozo jeē ni jéhe de xūhun núū, návāha na cúni de nasaa ni canihīn iin iin i siquī. <sup>16</sup>Te ni quee iin mozo un núū de, te ni cahān i: Iin xūhun jéē ni jéhe ní núū ná, ni nduu uxī, achí i. <sup>17</sup>Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jíin iin jniñu lúli-ni, te vijna te sáha ri jeē cujéhnu ró ndacu ró jniñu nuū uxí ñuu jniñi ri, achí de. <sup>18</sup>Te ni quee inga mozo, te ni cahān i: Iin xūhun jéē ni jéhe ní núū ná, ni nduu uhūn, achí i. <sup>19</sup>Te suni ni cahān de jíin mozo un: Róhó, cujéhnu ró ndacu ró jniñu nuū uhún ñuu jniñi ri, achí de. <sup>20</sup>Te ni quee inga mozo, ni cahān i: Yāha nácuāha ná xūhun ní, chi ni chuvāha ná ini iin pañuelo. <sup>21</sup>Chi ni yūhu ná nihín, chi tēe xeēn cúu ní. Chi cuehē gā nándacān ní vēsú jeē ni jéhe ní, te cuehē gā cuní ni vēsú jeē cúu sáha mozo ni, achí de. <sup>22</sup>Yūcuán na te ni cahān rey: Mozo neé cúu ró núu súcuan, te jíin jnūhun ni cahān rō te sándaā rī jeē iyó cuéchi ró jéē tu ní sájniñu ró jíin xūhun rí. Chi jéni ni rō jeē tēe xeēn cúu ri, te cuehē gā nándacān rī vēsú jeē ni jéhe ri, te cuehē gā cuní ri vēsú jeē cúu sáha mozo rī. <sup>23</sup>Núu súcuan ¿te naun tu ní chúne ró xūhun rí vēsú nuū banco? Te jeē ní ndee rī te naquihin ri xūhun rí nde jíin séhe xūhun núú.

Achí de. <sup>24</sup>Te ni cahān de jíin ñáyuu cáhiin yūcuán: Quende xūhun jíinā nuū i, te cuāha ró núū mozo jeē névāha uxī, achí de. <sup>25</sup>Te ñayuu un ní cacahān i jíin de: Te ndese, chi je névāha de uxī, achí i. <sup>26</sup>Te ni cahān tucu rey: Cáhán rī jíin ró jeē ñáyuu je névāha, sa quiji ga nuū i, te cone vāha cuehē i. Te ñayuu jeē tu névāha, sa cujiyo-ni vēsú jecu jeē névāha i. <sup>27</sup>Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihin de na quǐjicoo de yāhá. Te cahni rō de coto ri, achí de. Achí Jesús.

### Jeē ni quívi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

<sup>28</sup>Te nuū ní ndihi ni cahān yā jnūhun yáha, te ni jica ga yā cuahān yā ñuu Jerusalén. <sup>29</sup>Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de.

<sup>30</sup>Te achí yá jíin de:

Cuáhán ñuu lúli íne ichi núú. Te núu ni quívi ró, te nihīn rō iin burro núhni tī, jeē ní iin tēe ná tu coso de tī. Te ndají ró tī quiji ró jíin tī. <sup>31</sup>Te núu ndé iin cajnūhún naun cándají ró tī, te cahān rō jíin: Máá Jítoho yō jíni nūhún yá tī, achi rō. Achí yá.

<sup>32</sup>Te cuangoo tēe ni tají yá, te ni canihīn de tī nájnūhun ni cahān yā jíin de. <sup>33</sup>Te jeē cándají de tī, te ni cacahān jitoho tī jíin de:

¿Naun cándají ró burro ri? achí.

<sup>34</sup>Te ni cacahān de:

Máá Jítoho yō jíni nūhún yá tī.

<sup>35</sup>Te ni ndeco de jíin tī nuū Jesús. Te ni casoó de sahna de siquī tī, te

ni casáha de jeē ní jecosō yā siquī tī. <sup>36</sup>Te ná-ni cuahān yā, sáá cáscáá ñayuu sahma i ini ichi. <sup>37</sup>Te nuū ní cuyajni ya nuū cúun ichi yucu Olivos, te ndihī ñayuu cácanđíje jeē cándiquin i ya, ni caquejéé i cácusī ni i, te cácana jee i jeē yóhō vāha Yaā cúu Yaā Dios siquī táca jniñu jéhnū ni sáha ya ni cajito i. <sup>38</sup>Te áchí i:

Yóhō vāha Yaā cúu Rey jeē véji jíin jniñu máá Jítoho yō Yaā Dios. Te sáha ya jeē cóo manī yō jíin Yaā Dios andiví. Te yóhō cújéhnū Yaā Dios, achí i jíināhan i.

<sup>39</sup>Yūcuán na te jecu tēe fariseo cáhiin mēhñu ñáyuu cuehē ún, ní cacahān de jíin yá:

Maestro, cahān ni núu ñáyuu cándiquin nihín jéé na cási i yuhu i, áchí de.

<sup>40</sup>Te ni cahān Jesús:

Cáhán rī jíin ró jeē núu ñayuu yáha na cási i yuhu i, te tāca yúu chí cana jee, áchí yá.

<sup>41</sup>Te nuū ní cuyajni ya Jerusalén, te ni jito ya ñuu ún, te ni ndahyū yā siquī. <sup>42</sup>Te ni cahān yā:

Róhō ñáyuu Jerusalén, yóhō ni cuu ni rī jeē na jécūhun ni rō jeē cuu ndumanī rō jíin Yaā Dios sáha rī. Te siquī jeē tu cácanđíje ró, te vijna chí ma cúu ga jecūhun ni rō. <sup>43</sup>Chi quee quivī jeē coo jnūndóho, te ñayuu cájito uhū rohó, cuicó ndúu i ñuu rō, te casi cutú i jíin yúu, te tāca lado ndonda i siquī rō.

<sup>44</sup>Te ndihī vehe scótúú i, te cahni i róhō jíināhan ró. Te ma stóo i ni ñin vehe jeē cóso jnáhan ga yuū. Chi ni quiji rī nde nuū Yaā Dios jeē jnáma rī rohó, te tu ní cácanđíje ró. Achí yá.

### Jeē ní quenehen ya ñayuu ini templo

(Mt. 21.12-17; Mr. 11.15-19; Jn. 2.13-22)

<sup>45</sup>Te ni quivī ya ini templo cáhnu, te ni quejéé yá quenehen ya tāca ñáyuu cájeen quitī te cánaxico núu ñáyuu jeē socō i. <sup>46</sup>Te ni cahān yā jíin i:

Yósó núu tútu ii jeē cahán Yaā Dios: Vehe ri chí vehe nuū cájicān tahu cúu, áchí Yaā Dios. Te máá ró jíināhan ró, chí nájnūhun yaū cava ñacuīhna ní canasáha ró, áchí yá.

<sup>47</sup>Te ndiquivī ni steén yā jnūhun ini templo. Te sutū cácujehnū jíin tēe cástéén tutu ley Yaā Dios jíin tēe cácujehnū nuū ñáyuu ñuu ún, cánducú de modo ndese cahni de ya. <sup>48</sup>Te tu cánihin de modo sáha de, chí ndivii ñayuu yóhō cájetáhú i cájini nahín i jnūhun cáhán yā.

### Siquī jeē ndíso jniñu Jesús

(Mt. 21.23-27; Mr. 11.27-33)

**20** Te ñin quivī steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñayuu. Te ni quecoo sutū cácujehnū jíin tēe cástéén tutu ley Yaā Dios jíin táca tēe jéhnū cándacu jniñu. <sup>2</sup>Te ni cacahān de: Castūhún, ¿ndé ní nihin jniñu ró jéé sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

<sup>3</sup>Te ni cahān Jesús jíin de:

Suni ruhū cajnūhun rī rohó ñin jnūhun jíināhan ró. Castūhun núu rī: <sup>4</sup>¿Ndé ñin ni tee jniñu siquī Juan jeē ni scuándute de? ¿A Yaā Dios chí táca tēe? Achí yá.

<sup>5</sup>Yūcuán na te ni candajnūhun máá de:

¿Ndese cahān yō? Nūu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cácanđije ró de nūu súcuan?

<sup>6</sup>Te nūu cahān yō jeē ñáyuu ni catee jniñu un síquī de, te ndívii ñayuu cahni i yóhó jíin yúu, chi cácanđije i jeē tée ni nacani jñuhun Yaā Dios ni cuu ndije Juan, achí de cacahān maá de.

<sup>7</sup>Te ni cacahān de jeē tu cájini de ndé ñin ni tee jniñu síquī Juan jeē ni scuándute de. <sup>8</sup>Yūcuán na te ni cahān Jesús:

Ni ruhū, suni ma cáchi rī nuū rō ndé ñin ni tee jniñu síquī rī sáha ri jniñu yáha, achí yá.

#### **Jñuhun yátá síquī tēe néé cáśájniñu nuū uva**

(Mt. 21.33-44; Mr. 12.1-11)

<sup>9</sup>Te ni quejéé Jesús cahān yā jñuhun yátá yáha jíin ñáyuu ún:

ñin tēe ni nachuhun de cuehē uva nuū ññuhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahān de inga ñuu. <sup>10</sup>Te maá tiempo ndutútú uva, te ni tají de ñin mozo cuahān nuū tēe cáśájniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i súcuan-ni. <sup>11</sup>Te tēe chíí uva ni tají tucu de inga mozo cuahān. Te tēe cáśájniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i súcuan-ni. <sup>12</sup>Te tēe chíí uva ni tají tucu de inga mozo cuahān. Te tēe cáśájniñu ún, suni ni castújí de mozo un, te ni cascúnu de i.

<sup>13</sup>Yūcuán na te ni cahān tēe chíí uva: ¿Ndese sáha ri? Na tájí rí sēhe ri jeē maní ri jíin, chi sanaa te nūu ni cajito de i te coo yáñuhūn de nuū i. Achí de. <sup>14</sup>Te tēe cáśájniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu maá yó, achí. <sup>15</sup>Te ni caquenehen de i inga lado, te ni cajehni de i, achí yá.

Te ni cajñuhun yá de:

Nūu súcuan ¿te ndese sáha tēe chíí uva jíin tēe cáśájniñu ún? <sup>16</sup>Ndiji de te cahni de tēe un jíjnáhan, te cuāha de ññuhun cáá uva un nūu inga sava tēe sájniñu nuū, achí yá.

Te jeē ní cajini ñayuu jñuhun yáha, te ni cacahān i:

Aī, nūu ma cóo cuítí súcuan víi, achí i.

<sup>17</sup>Te ndéhé yá nuū i jíjnáhan i, te ni cahān yā:

Nūu súcuan ¿te á cájecūhun ni rō jñuhun yáha jéé yosó nūu tútu iī jeē cúu ri nájñuhun ñin yuū? Chi achí tutu:

Yuū jeē ní casquéhichī tēe cájeni vehe,

yuū yáha nduu jeē quítuu vehe.

Achí. <sup>18</sup>Te ñayuu tu cácanđije, ndoho i nájñuhun ndóho ñayuu jeē cotúu síquī yuū te jnáhnú i. Te quiví sándaā Yaā Dios cuēchi, te ñayuu tu cácanđije, ndoho i nájñuhun ndóho ñayuu jeē nínga yuū síquī i te cundihi i sáha. Achí yá.

#### **Síquī xúhun renta**

(Mt. 21.45-46; 22.15-22; Mr. 12.12-17)

<sup>19</sup>Yūcuán na te sutū cácujuhnu jíin tēe cástéén tutu ley Yaā Dios,

ni cacuni de jni de ya maá hora un. Chi ni cajecūhun ni de jeē siquī maá de cúu jñuhun yátá ní cahān yā siquī tēe cásajniñu nuū uva jíin tēe cájeni vehe. Te tu ní cúu, chí cáyūhú de jeē quitī ni ñayuu.

<sup>20</sup>Yūcuán na te ni catajī de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sáha de jeē cahán yā iin jñuhun jeē nihín de cuēchi siquī yā, te quindecá de ya nuū tēe cúu gobernador. <sup>21</sup>Te ni cacahān de:

Maestro, cájini na jēe cahán vāha ní, te stēén ndaā ní. Te tu sáha ní cuenta ndese cúu iin iin ñayuu, chí inuú-ni sáha ní jíin i. Te stēén ndaā ní ndese squícu ñayuu nuū Yaā Dios. <sup>22</sup>Núu súcuan te cachi ní: ¿A íyo vāha jeē chúnaa yō renta nuū rey nación Roma jeē jñá nación yō, chí tuú? áchí de.

<sup>23</sup>Te ni jini yā jeē cáculi de stáhú de ya, te ni cahān yā jíin de:

¿Najehē cájito ndee rō ruhū?

<sup>24</sup>Stēén iin xūhún na cóto ri. ¿Nde iin nuū cúu jeē ndeé nuū xūhun yáha, te ndé síhví cúu jeē ndeé yāhá? áchí yá.

Te ni cacahān de jíin yá:

Nuū jíin síhví rey un cúu, áchí de.

<sup>25</sup>Yūcuán na te ni cahān yā jíin de:

Núu súcuan te nacuāha ró núu rey un jēe yíhi cuenta nuū de, te nacuāha ró núu Yaā Dios tāca jēe yíhi cuenta nuū maá yá, áchí yá.

<sup>26</sup>Te tāca tēe ún tu ní cúu nihín de cuēchi siquī yā jíin ni iin jñuhun cáhán yā, cájito jíinúu ñayuu. Chi sa ni canaa ni de jeē ndichí ní stió cuñí yā jñuhun nuū de, te tuá na vé ni cacahān de.

### Jeē ní cacajñuhún de siquī jeē nátecu ndīyi

(Mt. 22.23-33; Mr. 12.18-27)

<sup>27</sup>Yūcuán na te jecu tēe grupo saduceo ni quecoo de nuū yā. Te tēe un cacahān jeē tu nátecu cuiti ndīyi. Te ni cacahān de jíin yá:

<sup>28</sup>Maestro, Moisés ni tee de nuū tútu jeē cánevāha yó: Núu iin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñí i nuū ndíyi ñani de, áchí tutu. <sup>29</sup>Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihí de, te tú sēhe de ní íyo. <sup>30</sup>Te tēe uū ni naquihin de ña, te suni ni jihí de, te tú na sēhe de ní íyo. <sup>31</sup>Te tēe uní ni naquihin de ña. Te suni súcuan ndihúxá de ni condeca de ña, te ni cajihí ndihi de, te ni iin de tú sēhe de ní íyo. <sup>32</sup>Te jeē sándihí te suni ni jihí ñahan ún. <sup>33</sup>Núu súcuan te núu na nátecu de jíináhan de quiví nátecu ndīyi, ¿te ndé iin de cuu ña ñasihí de? Chi ndihúxá de ni condeca de ña. Achí de jíináhan de.

<sup>34</sup>Yūcuán na te ni cahān yā jíin de:

Ñayiví yáha chí cáquijnáhan tēe jíin ñahan. <sup>35</sup>Te ñayuu vāha jeē natecu i quivícoo i andiví, ma quijnáhan ga i yūcuán, chí tuá na jñuhun quijnáhan tēe jíin ñahan coo. <sup>36</sup>Ni ma cúu cuiti gā i, chí coo i nájñuhun ndajéhé Yaā Dios. Te sēhe Yaā Dios cuu i, chí je ni canatecu i. <sup>37</sup>Te suni máá Moisés cáhán de jeē nátecu ndīyi, chí ni tee de nuū tútu ndese ni cahān

yā jíin de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jíin Isaac jíin Jacob. <sup>38</sup>Te jeē ni cáhān de súcuan cúu jeē ní cachi de jeē cátecu tāca ndíyí. Chi vēsú je ni cajihí i, te cátecu i nuū iyó máá yá, chi cúu ya Yaā sáha jeē técu ñayuu níí cáni. Achí yá jíin de.

<sup>39</sup>Te jecu tēe cástéén tutu ley Yaā Dios ni cacahān de:

Váha ni cahān ní Maestro.

<sup>40</sup>Te tuá ni cáchundeyí ni de cajñuhún de ya.

### Siquí jeē cúu Cristo sēhe yucūn

#### David

(Mt. 22.41-46; Mr. 12.35-37)

<sup>41</sup>Te ni cahān yā jíin de jíināhan de:

¿Ndese cúu jeē cácahān ñayuu jeē Cristo cúu sēhe yucūn David?

<sup>42</sup>Chi máá David suhva ni cahān de jñuhun ya nuū tútu Salmo:

Máá Jítóho yō Yaā Dios suhva ni cahān yā jíin Jítóho rī, Yaā quiji:

Cucōo ró lado váha ri nuū cujéhnu ró,

<sup>43</sup>te na sáha ri jeē quende rō poder tāca jēe cájito uhū rohó. Achí Yaā Dios. Achí David. <sup>44</sup>Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

### Jeē ni cáhān yā jeē iyó cuéchi de jíināhan de

(Mt. 23.1-36; Mr. 12.38-40; Lc. 11.37-54)

<sup>45</sup>Te ni cahān yā jíin tēe cáscuáha jíin yá, te suni ni cajini sōho ndíhi ñayuu:

<sup>46</sup>Coto má cándíje ró táca tēe cástéén tutu ley. Chi cácusíi ni de cáñuhun de sahma cáni jeē steén jeē cujéhnu de, cájica cuu de jíin. Te cánujnahan ni de jeē cahán yíñúhún ñayuu jíin de nuū yáhu. Te cánujnahan ni de cucōo de nuū silla yíñúhún gá ini vehe íi sinagoga, jíin silla yíñúhún gá nuū víco cáyeji ñayuu. <sup>47</sup>Te cáquende de vehe ñahan ní caquendōo ndáhú. Te nahán cájicān tahú de návāha cani ni ñayuu jeē tú na cuéchi de. Tēe yáha jíināhan de chi xeēn gā ndoho de castigo. Achí yá.

### Jeē ni sócō ñahan viuda xuhún

(Mr. 12.41-44)

**21** Te ná ni iyo ya ini templo, te jíto ya nuū ñayuu cucá jēe cáchuhun i cuehē xuhún ini tāca yéjñū nuū cásocō i. <sup>2</sup>Te suni ni jito ya nuū ññahan viuda jeē ndóho ndáhú, te ni chuhun ña uū centavo lulí ini yejñū ún. <sup>3</sup>Te ni cahān yā:

Jendaá cahán rī jíin ró jeē cuehē gá cúu jeē ni sócō ñahan viuda ndahú yáha, vēsú jeē ní casocō tāca gá ñayuu. <sup>4</sup>Chi tācá i ni casocō i jeē ni ndóo siquí xuhun cuéhē i. Te ñahan yáha, vēsú ndahú ndóho ña, te ni chuhun ndíhi ña jeē cótecu ña. Achí yá jíin de.

### Jeē ní cachi yā jeē náā templo

(Mt. 24.1-2; Mr. 13.1-2)

<sup>5</sup>Te sava de ni cacahān de jeē luu cáa templo cáhnu, chi ni cuvāha jíin táca yúu luu jíin táca jēe ní casocō ñayuu. Yūcuán na te ni cahān yā:



<sup>6</sup>Ndihí jeē cájito ró yáha, quee quiví jeē ma cóso jnáhan ga ni iin yuū, chí ndihí jnanū, achí yá.

**Na seña coo nuū cuácuyajni ndihí ñayiví**

(Mt. 24.3-28; Mr. 13.3-23)

<sup>7</sup>Te ni cacajñuhún de ya:

Maestro, ¿ndé quíví coo tāca jéē ní cachi ní jéē coo? ¿Te na seña coo nuū cuácuyajni squícu tāca jéē ni cáhān ní? áchí de.

<sup>8</sup>Te ni cahān yā:

Coto ró jéē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quiví ndihí ñayiví, achí de. Te ma cóndiquín rō de. <sup>9</sup>Te núu nihín rō jñuhun jeē tāca lado iyó guerra te cándonda ñayuu siquī tohō, te ma yūhu ró, chí cánúu jéē xihna gā coo súcuan, te ni ma jinú yachí quiví ndihí ñayiví. Achí yá.

<sup>10</sup>Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan. <sup>11</sup>Te cháha chúcuan jñāa téyí, te coo jnamā jíin cuéhyí xeēn. Te coo seña jéhu ichi ándiví jéē yūhú ndasí ñayuu coto i.

<sup>12</sup>Te nde ná tu coo tācá jniñu yáha, te coto xeēn i róhó, te jniñ i róhó. Te quindeca i sava ró tāca vehe i sinagoga jeē cahán i cuēchi siquī rō. Te chune i sava ró vecāa. Te quindeca i sava ró núu tāca rey jíin núu tācá gobernador, te cahān i cuēchi siquī rō jeē siquí jeē cácandíje ró rúhū. <sup>13</sup>Te jeē súcuan coo, te cuitē núu ga jñuhun ri, chí nacani ndaā rō nuū de jíjñáhan de. <sup>14</sup>Núu súcuan te cundaā ni rō jeē

ma nácani ni rō xihna gā ndese stío cuíñí rō nuū de te cācu ró. <sup>15</sup>Chi ruhū cuāha ri jñuhun ndíchí cahān rō, návāha ñayuu jeē cájito uhū rohó, ma cúndehyí i jíin ró ni ma cúu cahān i siquī rō. <sup>16</sup>Te nde tatá rō, naná rō, ñani rō, jnáhan ró, jíin amigo rō, nastúu i róhó núu ñayuu xeēn. Te cahni i sava ró. <sup>17</sup>Te tāca ñayuu chí quití ni i nuū rō jeē siquí ruhū. <sup>18</sup>Te ni iin ixi xíní rō jíjñáhan ró ma náā, chí coto ya rohó. <sup>19</sup>Te núu cuiñí nihín ró jíin jñuhun ri, te cotecu rō níí cáni.

<sup>20</sup>Te núu ni cajito ró jéē ní cajicó ndúu soldado ñuu Jerusalén, te na jécūhun ni rō jeē jé yajni naa ñuu ún. <sup>21</sup>Yūcuán na te ñayuu cáyucú región Judea, na cúnu i caa i yucu quingoo i. Te ñayuu cáyucú Jerusalén, na quéndacoo i quingoo i. Te ñayuu cáhiin nde rancho, ma nándicó i ñuu ún. <sup>22</sup>Chi tāca quíví un cuāha Yaā Dios castigo nuū ñayuu jeē siquí cuéchi i, návāha squícu tāca jñuhun jeē yosó núu tútu. <sup>23</sup>Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihín ña cunu yachí ña. Chí yōhyo xeēn coo jñundóho ini ñayiví, te quiji castigo xeēn siquí ñayuu yáha. <sup>24</sup>Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nihín i jniñu nuū ñayuu ñuu Jerusalén, nde jinu tiempo jeē jéhe Yaā Dios jñuhun ndacu i jniñu.

**Ndese coo quiví ndiji Yaā ní nduu tēe**

(Mt. 24.29-35, 42-44; Mr. 13.24-37)

<sup>25</sup>Yūcuán na te coo seña nuū níāndii jíin núu yoó jíin núu quími.

Te ini ñayiví te quiji jnündóho xeēn siquī ñáyuu táca nación. Te cunéé ni i, te yūhú i jeē nñhin xeēn mar te ndóna xeēn ndute mar vēji nuū ñúhun. <sup>26</sup>Te cuu sōo sava ñayuu jeē cáyūhú i cándetu i táca jnündóho quiji siquī ñayiví. Te táca jéé iin andiví chi quisi i. <sup>27</sup>Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu cuyéhnu ri. <sup>28</sup>Te núu ni quejéé táca jniñu yáha, te ndeyí coo ni rō, te cocunuū rō andiví, chi je yajni jnama ya rohó. Achí yá jíin de jíjnáhan de.

<sup>29</sup>Te suni ni cahān yā jnūhun yátá yáha:

Condēhe jíjnáhan ró ndese sáha nundēhe higo jíin táca gá yujnu.

<sup>30</sup>Núu cájito ró jéé ní quejéé náne numa yújnu ún, te cájini rō jeē je yajni coo tiempo jihní. <sup>31</sup>Te suni súcuan núu ni cajito ró jéé ní quejéé cúu táca jniñu jeē ni cáhān rī, yūcuán na te na jécūhun ni rō jeē ní cuyajni quiví ndacu Yaā Dios jniñu ini ñayiví.

<sup>32</sup>Jendaá cahán rī jíin ró jeē ma cúu ndíhi ñayuu tiempo un, chi nde squícu ndíhi jniñu ún. <sup>33</sup>Andiví jíin ñáyiví chi naa, te táca jnúhun cáhān rī chi ma náā, chi ndíhi squícu.

<sup>34</sup>Te coto ma stívi ró maá ró jijnáhan ró jéé sáha ró táca cuéchi, jíin jéé najini ró, jíin jéé cujneñu ró jíin táca ndajniñu cotecu rō, návāha tú sanaa ni rō te quee quiví un siquī rō. <sup>35</sup>Chi nájnūhun jeē núu iin trampa, súcuan quee jnündóho siquī ñáyuu cáyūcu ní cáhnu ñayiví.

<sup>36</sup>Núu súcuan te ndito coo ni rō, te níní cácan tahú rō, návāha cuu

cācu ró núu táca jnündóho jeē quíji ún, te cuu cuiñi ró núu ruhū, Yaā ní nduu tēe. Achí yá.

<sup>37</sup>Te ndiquiví steén yā jnūhun ini templo, te ndijnahan jecuáa jéndoō ya nde yucu jeē naní Olivos. <sup>38</sup>Te táca jénéhen quécoo ñayuu nuū yā ini templo jeē cúni sōho i jnūhun steén yā.

### Jeē ní casquijnáhan de jnūhun jniñ de Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

**22** Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. <sup>2</sup>Te sutū cácujeñu jíin tée cástéén tutu ley, ni canducú yuhu de modo cahni de Jesús, chi cáyūhú de jeē quítī ni ñayuu.

<sup>3</sup>Te ni quiví Satanás ini anuá Judas jeē nastúu de ya. Te suni nání de Iscariote, te cúu de iin jnáhan jeē ndihúxí uū tēe apóstol. <sup>4</sup>Te ni jehēn de ni candajnūhún de jíin táca sūtū cácujeñu jíin tée cándiso jniñu ini templo, núu ndese nastúu de ya nuū tée un jíjnáhan. <sup>5</sup>Te tēe un ní cacusiñi ni de, te ni cajejnūhun de jeē cuáha de xūhun núu Judas. <sup>6</sup>Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

### Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup>Te ni quee maá quiví vico jeē cáyeji ñayuu pan jeē tú na levadura yíhi, te suni quiví un cájehni i londe nájnūhun ni ndacu Yaā Dios jniñu jeē sáha i vico pascua un.

<sup>8</sup>Te Jesús ni tají yá Pedro jíin Juan quingoo de, te achí yá jíin de:

Cuángoo te sátühva ró jéé cuxíni yó vico pascua, achí yá.

<sup>9</sup>Te ni cacajnuhún de ya:

¿Ndé nuū cuní ni jéé quisátühva ná? achí de.

<sup>10</sup>Te ni cahān yā jíin de:

Cuángoo ŋuu yūcuán, te núu ni quīvicoo ró te najnáhan ró jíin iin tēe ndíso quīyi ndute. Te condiquin ró de quihin ró jíin de nde vehe nuū ndívi de. <sup>11</sup>Te cahān ró jíin tēe chíi vehe ún: Achí máa Maestro: ¿Ndé iin cúu cuarto vehe ní cuāha núu ní nuū cuxíni ya vico pascua jíin tēe cáscuāha jíin yá, achi rō. <sup>12</sup>Yūcuán na te stéén de iin cuarto cáhnu nde xinī véhe jeē je iyó túhva, te yūcuan sátühva ró jéé cuxíni yó, achí yá.

<sup>13</sup>Te cuángoo de, te ni canihin de nájnūhun ni cahān yā. Te ni casátühva de jeē cuxíni ya vico pascua.

<sup>14</sup>Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tēe cácuu apóstol. <sup>15</sup>Te ni cahān yā jíin de:

Yōhyo ni cuu ni rī cuxíni ri jíin ró jijnáhan ró vico pascua yáha, vijna nde ná tu cuu rī. <sup>16</sup>Chi cáhán rī jíin ró jeē ma cáji cuiti gā rī vico pascua, chi nde quiji quivī ndacu Yāa Dios jniñu nñ ñayiví, te sáa te caji tucu ri, achí yá.

<sup>17</sup>Te ni quihin ya iin copa ndūxi uva, te ni nacuatáhú yá, te ni cahān yā:

Quihin copa yáha, te coho ró jíin jnáhan ró. <sup>18</sup>Chi cáhán rī jíin ró jeē ndé vijna te ma cóho ga rī ndūxi uva, chi nde quiji quivī ndacu Yāa

Dios jniñu nñ ñayiví, te sáa te coho tucu ri. Achí yá.

<sup>19</sup>Te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū de jijnáhan de. Te ni cahān yā:

Yāha cúu yiqui cúnu rī jeē socō rī jeē chunaa rī cuēchi ró jijnáhan ró. Te níní caji rō súcuan jeē cáñuhun ni rō ruhū jeē ni jíhī rī jehē rō. Achí yá.

<sup>20</sup>Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuēchi ró jijnáhan ró.

<sup>21</sup>Te vijna chi tēe nastúu ruhū, néne de jíin rī nuū mesa yáha.

<sup>22</sup>Chi ruhū, Yāa ní nduu tēe, jendaá cúu jeē quihín rī cuu rī nájnūhun je ni sándaā Yāa Dios jeē súcuan coo. Te nacā xeēn ndoho tēe jeē nastúu ruhū, achí yá.

<sup>23</sup>Yūcuán na te ni caquejéé de cácajnūhun jnáhan de ndé iin de cúu jeē nastúu de ya.

#### Jeē ní cacahān de siquī ndé iin de cújéhnu ga

<sup>24</sup>Yūcuán na te yōhyo ni cacahān de siquī ndé iin de cújéhnu ga nuū jnáhan de. <sup>25</sup>Te ni cahān Jesús jíin de:

Rey tēcá nación chi cándacu nihin de jniñu nuū ñayuu cájni de, te cácahān i jeē tēe cásaaha vāha cúu jeē cácujeñnu nuū i. <sup>26</sup>Te róho jijnáhan ró, ma cóo ró súcuan. Chi núu ndé iin ró cújéhnu ga, te sa nasáha lulí ró maá ró. Te núu ndé iin ró ndacu jniñu, te sa nasáha ró máa ró tēe jéjníñu nuū jnáhan.

<sup>27</sup>¿Te ndé iin cúu jeē cujéhnú ga, á tée yéji nuū mesa, chí tée jéni cohō? ¿A násūu tée jeē yéji nuū mesa cúu jeē cujéhnú ga? Te ruhū nasūu súcuan cúu ri, chí ni nasáha ri maá rí nájnūhun tēe jéjníñu nuū rō, chí vēji ri sáha ri jeē nihín tahu rō.

<sup>28</sup>Te maá ró cácuu tēe jeē niní cáhiin jíin rí tāca quívī jeē ndóho ri jnūndóho. <sup>29</sup>Núu súcuan te nájnūhun ni sáha Tátá rī jeē ndácu ri jniñu, suni súcuan sáha ri jeē ndacu ró jniñu jíjnáhan ró. <sup>30</sup>Te caji rō coho ró jíin rí ini ñuu nuū ndacu ri jniñu. Te cucōo ró iin iin mesa jeē sándaā rō jniñu ndihúxí uū yucūn Israel. Achí yá.

### Jeē ní cachi yā jeē yūhu Pedro cahān de jeē jiní de ya

(Mt. 26.31-35; Mr. 14.27-31; Jn. 13.36-38)

<sup>31</sup>Te suni ni cahān maá Jítoho yō jíin Simón Pedro:

Simón, cuni sōho ró, chí ni jicān Satanás rohó jíjnáhan ró jéē coto ndee rohó nájnūhun jeē síjin trigo, te stúu ndé iin ró cácuu nájnūhun paja jeē nayūhu ró, te ndé iin ró cácuu nájnūhun trigo jeē candíje nihin ró. <sup>32</sup>Te ni jicān tahu rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéē íje tāca jnáhan ró jíin jnūhun ri. Achí yá.

<sup>33</sup>Te ni cahān de jíin yá:

Je íyó túhva ná quíhīn na jíin ní vecāa te vēsú na cuu na jíin ní, achí de.

<sup>34</sup>Te ni cahān yā:

Pedro, cáhán rī jíin ró jeē nde ná tu cana líhli vijna, te yūhu ró jeē jniñi ñayuu rohó, te unī jínu cahān rō jeē tu jíin rō ruhū, achí yá.

### Jeē ní cuyajni coto ya jnūndóho

<sup>35</sup>Yūcuán na te ni cajnúhun yá de jíjnáhan de:

Ná ni tají rí rohó ní jengoo ró jéē tu ní cóndiso ró ñunu ni yijni xūhún ni ndijēn, ¿te á ní íyo iin jeē ní cumanī nuū rō? Achí yá.

Te ni cacahān de:

Tú ni iin ní cúmanī.

<sup>36</sup>Te ni cahān yā:

Nde vijna sa cáhán rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de maá de, na xíco de ticāchí de te na cuáan de. <sup>37</sup>Chi cáhán rī jíin ró jeē quee quívī ndoho yó jnūndóho, chí cánuú squícu jnūhun yáha jéē cahān nuū tútu síquī rī: Sáha ñayuu jíin yá nájnūhun cásáha i jíin tēe sáha cuēchi xeēn, achí tutu. Chi tāca jnūhun un jéē yosó cáhán síquī rī, chí squícu nahín, achí yá.

<sup>38</sup>Yūcuán na te ni cacahān de:

Yāha íyó úu espada, achí de.

Te ni cahān yā jíin de:

Jíin jéē yáha-ni, achí yá.

### Jeē ni jicān tahu yā nuū huerto Getsemaní

(Mt. 26.36-46; Mr. 14.32-42)

<sup>39</sup>Te ni quenda ya cuahān yā yucu Olivos nájnūhun sáha sáha ya. Te tēe cáscuáha jíin yá ni candiquin de ya cuangoo de jíin yá. <sup>40</sup>Te nuū ni jínū yā yūcuán, te ni cahān yā jíin de:

Cacān tahu rō jíjnáhan ró jéē chindéē ñáhán yá rohó jéē ma sáha ró cuéchi núu coto ndee jeneé rohó, achí yá.

<sup>41</sup>Te ni jica ya jecu, cūhva jeē jicá jíinú yuū jeē squíin. Te ni jecuññi yití yá, te suhva ni jicān tahu yá:

<sup>42</sup>Tátā, núu cúní ni te tejiyo ní jnúndóho yáha jéē ma quíji síquī ná. Te nasūu jéē cuní maá ná, chí jeē cuní maá ní na cóo, áchí yá.

<sup>43</sup>Te ni cane iin ndajéhé andiví núu yā, te ni jēhe fuerza nuū yā.

<sup>44</sup>Te cúcuíhyá ndasí ni yā jeē quiji jnúndóho síquī yā, te ni nducú ndéyí gá yā ni jicān tahú yā. Te ni cane jnañū yā, te too nuū ññhun nájññhun yúyú náhnu niññ.

<sup>45</sup>Te ná ni ndocuiññ yā jeē ni jicān tahú yā, te ni ndee yā nuū tée cáscuáha jíin yá. Te ni jito ya jeē cáquixí de, chí tuá cáhiyo ndeyí ni de cacān tahú de jeē cácuquíhyá ndasí ni de. <sup>46</sup>Te ni cahān yā jíin de:

¿Naun cáquixí rō? Ndonga te cacān tahú rō jeē chindéé ñāhān yá rohó jéē ma sáha ró cuéchi jeē cóto ndee jeneé rohó. Achí yá.

### Jeē ní cajññ de Jesús

(Mt. 26.47-56; Mr. 14.43-50; Jn. 18.2-11)

<sup>47</sup>Te sá cáhān gā yā súcuan, te ni quecoo cuehē ñayuu. Te tēe nání Judas, iin jñāhan jeē uxí uū tēe scuáha jíin yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. <sup>48</sup>Te ni cahān Jesús jíin de:

Judas, ¿á jíin jéē téchūhu ró ruhū cúu jeē nastúu ró rúhū, Yaā ní nduu tēe? Achí yá.

<sup>49</sup>Te tēe cáhiin jíin yá, ni cajito de jeē ní quejéé cúu, te ni cacajññhún de ya:

¿A ndonga ná jíināhan ná síquī de jíin espada? áchí de.

<sup>50</sup>Te iin de ni stují de mozo sutū cujéhnu ga, chí ni jehnde de sōho lado váha. <sup>51</sup>Te ni cahān Jesús:

Siáá, na jécuiññ, achí yá.

Te ni tee ya ndaha ya sōho mozo un, te ni nasávāha ya de. <sup>52</sup>Te ni cahān yā jíin sutū cácujeñnu jíin tēe cándiso jñññ ini templo jíin táca tēe jéñnu jeē ní quecoo de jeē jññ de ya:

¿Te va tēe cuíhná cúu ri jeē véjicoo ró jíin espada jíin yujnu jeē jññ ró rúhū jeē súcuan? <sup>53</sup>Tāca quíiví ni ine ri jíin ró jíināhan ró ini templo cáhnu, te tu ní cájññ ró rúhū. Te vijna te ni quee hora jeē jññ ró rúhū jíin jéē sáha ró táca jñññ jeē ndácu jeneé jéē ndee núu néē. Achí yá.

### Jeē ní cachi Pedro jeē tu jíin de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup>Te ni cajññ de ya cuango de jíin yá vehe sutū cujéhnu ga. Te Pedro chí jícá-ni ndíquín de ya. <sup>55</sup>Te táca policía ni cascáyú de ññhūn ini patio, te ni condúu de yuññhún un cáyucú de. Te suni ni cucōo Pedro jíin de. <sup>56</sup>Te iin ñāhan jéjñññ ini vehe un, ní jito ña nuū de jeē néne de yuññhún. Te ni jito vāha ña nuū de, te ni cahān ña:

Tēe yáha suni ni jica de jíin tēe ún, áchí ña.

<sup>57</sup>Te máa de tu ní cáchi de, chí ni cahān de:

Tu jíin rí tēe ún, áchí de.

<sup>58</sup>Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jñāhan táca tēe un cúu ró, áchí.

Te ni cahān Pedro:

Nasūu cúu ri, hombre, achí de.

<sup>59</sup>Te ni cuu nájññhun iin hora gā, te ni cahān ñññ inga de:

Jendaá ndije jeē tée yáha ní jica de jíin tée ún, chí suni tée región Galilea cúu de, áchí de.

<sup>60</sup>Te ni cahān Pedro:

Hombre, tu jíin rī na jñuhun cáhān rō.

Te sá súcuan cáhān gā de, te ni cana-ni líhli. <sup>61</sup>Yūcuán na te ni ndió cóto máá Jítoho yō, te ni jito ya nuū Pedro. Te ni nucūhun ni de jñuhun ni cahān yā jíin de: Nde ná tu cana líhli, te yūhu ró te cahān rō unī jíinu jeē tu jíin rō ruhū. <sup>62</sup>Te ni quenda de cuahān de, te yōhyo ni ndahyū de jeē ní cachi de jeē tu jíin de ya.

#### Jeē ní casacatā de nuū yā

(Mt. 26.67-68; Mr. 14.65)

<sup>63</sup>Te tāca tée cándito Jesús, ni casacatā de nuū yā, te ni cacani de ya. <sup>64</sup>Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñin cúu jeē ní cani rōhó, áchí de.

<sup>65</sup>Te cuehē gā jñuhun súcuan ni cacahān neé de jíin yā.

#### Jeē ní indichi Jesús nuū junta tēe cácujuhnu ga

(Mt. 26.59-66; Mr. 14.55-64; Jn. 18.19-24)

<sup>66</sup>Te jeē ní cundijin, te ni candutútú tāca tée jéhnú cándacu jniñu nuū ñayuu hebreo, jíin sūtū cácujuhnu, jíin tée cástéén tutu ley Yaā Dios. Te cuangoo de jíin yá nuū junta tēe cácujuhnu ga, te yūcuan ní cajñuhún de ya:

<sup>67</sup>Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jíin de:

Vēsú na cáhān rī jeē suu ri cúu, te ni ma candíje cuítī rō. <sup>68</sup>Te suni

núu cajñuhun máá rí rohó jíjnāhan ró, te suni ma stió cuíñí rō nuū rī, ni ma siaá rō ruhū. <sup>69</sup>Te ruhū, Yaā ní nduu tēe, tāca quívi jeē quíji conene ri lado yáha máá Yaā iyó poder, achí yá.

<sup>70</sup>Yūcuán na te ndihi de ni cajñuhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnuhun cácahān rō, achí yá.

<sup>71</sup>Yūcuán na te ni cacahān de:

¿Na testigo gā jíiní ñuhún yó núu súcuan? Chí ni cajini sōho yó jíin yuhu máá de jeē cahān ndevāha de jeē cúu de Sēhe Yaā Dios. Achí de jíjnāhan de.

#### Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Jn. 18.28-38)

**23** Yūcuán na te ni candociññí ndihi de, te cuangoo de jíin yá nuū Pilato. <sup>2</sup>Te yūcuan ní caquejéé de cácahān de cuēchi siquī yā:

Ni canihīn na tēe yáha jēe stóna de ñayuu siquī tohō. Te cáhān de jeē tú vāha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jíjnāhan de.

<sup>3</sup>Yūcuán na te Pilato ni cajñuhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnuhun cáhān rō, achí yá.

<sup>4</sup>Te ni cahān Pilato jíin sūtū cácujuhnu jíin ñayuu cuehē ún:

Tú ni ìn jnūhun stívi cáhán tēe yáha jéē nihín rí cuēchi siquī de, áchí de.

<sup>5</sup>Te máá de víhyá gā ni cacahān de:

Tēe yáha stónnda ndasí de ñayuu siquī tohō jíin jnūhun stéén de ní Judea. Chi ni quejéé de stéén de nde Galilea, te vijna te nde yáha, áchí de.

### Jeē ní indichi Jesús nuū Herodes

<sup>6</sup>Te nuū ní jini sōho Pilato jeē Galilea cácahān, te ni cajnūhún de ñayuu núu tēe región Galilea cúu ya. <sup>7</sup>Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jíin yá nuū Herodes, tēe cúu gobernador Galilea. Chi quivī ún suni íne Herodes ñuu Jerusalén. <sup>8</sup>Te nuū ní jito de nuū Jesús, te yōhyo ni cusīi ni de, chi je ni cuu cuehē tiempo jeē cuní de coto de nuū yā. Chi ni nihín de jnūhun ya, te ñūhun ni de jeē sáha ya ìn jniñu jéhnu coto de. <sup>9</sup>Te ni cajnūhún de ya cuehē jnūhun, te tu ní stífo cuíñf yā ni ìn jnūhun nuū de. <sup>10</sup>Te suni cáhiin táca sūtū cácujuhnu jíin tēe cástéén tutu ley, te nihin ni cacahān de cuēchi siquī yā. <sup>11</sup>Yūcuán na te Herodes jíin táca soldado de ni cacahān neé de jíin yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quínundeca de ya nuū Pilato. <sup>12</sup>Te máá quivī un ní candumaní jnáhan Pilato jíin Herodes, chi ichi yátá ni caquití jnáhan ni de.

### Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

<sup>13</sup>Yūcuán na te ni cana Pilato táca sūtū cácujuhnu jíin táca tēe

cándiso jniñu jíin táca gá ñayuu, ni candutútú. <sup>14</sup>Te ni cahān de:

Ni caquindeca ró tēe yáha núu rí, jeē cácahān rō jeē stónnda de ñayuu siquī tohō. Te je ni stichí rí de, ni cajito jínúu rō. Te tu ní nihín rí ni ìn cuēchi siquī de nájñuhun jeē cácahān rō. <sup>15</sup>Te ni Herodes, tu ní nihín de, chi ni natají tucu de tēe yáha núu rí. Te tú cuití ni ìn cuēchi ní sáha de jeē cúu de. <sup>16</sup>Núu súcuan te na cuáha ri castigo de, te siáá rí de quihín de, áchí Pilato.

<sup>17</sup>Te íyó costumbre jeē tēcá vico pascua siaá Pilato ìn preso jeē cuní ñayuu. <sup>18</sup>Te ñayuu cuehē ún, ìnuú-ni ni cacana jee i:

Na cúu tēe jíiná, te siáá ní Barrabás, áchí i.

<sup>19</sup>Te Barrabás íne de vecāa siquī jeē ni stónnda de ñayuu siquī tohō ìni ñuu ún, te ni jehni de ndīyí.

<sup>20</sup>Te Pilato cuní de siáá de Jesús, te ni cahān tucu de jíin ñayuu. <sup>21</sup>Te máá i víhyá gā ni cacana jee i:

Cata caa ní de jicā cruz, na cúu de, áchí i.

<sup>22</sup>Te ni cahān tucu de jíin i vuelta uní:

¿Na cuēchi ni sáha de núu súcuan? Tu ní nihín cuití rí ni ìn cuēchi siquī de jeē cúu de. Núu súcuan te na cuáha ri castigo de, te siáá rí de quihín de, áchí Pilato.

<sup>23</sup>Te víhyá gā ni cacana jee ñayuu un, ní cacahān nihin i jeē na cúu yā jicā cruz. Te máá i jíin táca sūtū cácujuhnu, ni cacana jee ndasí i.

Te ni cacundeyí i ni cascāhān i Pilato jeē na cúu yā. <sup>24</sup>Yūcuán na te ni ndacu Pilato jniñu jeē na cóo nájñuhun cáconi i. <sup>25</sup>Te ni siaá de tēe jeē ní cajicān i, tēe jeē íne vecāa

jeē ni stón̄da de ñayuu siquī tohō te ni jehni de ndīyī. Te ni jēhe de jñūhun jeē na cúu Jesús nájñūhun cácu ni i.

**Jeē ní cacata caa de ya jicā cruz**

(Mt. 27.32-44; Mr. 15.21-32; Jn. 19.17-27)

<sup>26</sup>Te cuangoo tācá soldado jíin yá jeē cahni de ya jicā cruz. Te ni canihīn de iin tēe ñuu Cirene, nání de Simón, vendiji de jeē ni jēhēn de rancho. Te ni catejñīnu de tēe un jēē cóndiso de cruz yā quihīn de yatā yā.

<sup>27</sup>Te cuehē ndasī ñáyuu ndíquín i yatā yā cuangoo i. Te suni cuehē ñahan cuangoo ña, te cándahyū cohō ña jeē cácuuíhyá ni ña jehē yā. <sup>28</sup>Te ni ndiō cóto Jesús nuū ña, te ni cahān yā:

Róhō ñahan Jerusalén jijnáhan ró, ma ndahyú rō jehē rī, chi sa suhva ndahyū rō jehē maá ró jíin jēhē sēhe ró jíjnáhan i. <sup>29</sup>Chi quee quivī jeē coo jñūndóho xeēn siquī rō, te cahān rō: Yōhyo ndetū tācá ñahan nómá, jíin jēē tu ní scácu sēhe, jíin jēē tu ní cóndeca yiquín, chi tú sēhe ña jeē jnahuhū ni ña jeē ndóho i, achi rō jijnáhan ró. <sup>30</sup>Quivī ún te quejéé ñáyuu cahān i jíin táca yucu: Cotúu síquī rī jijnáhan ri návāha cuu rī. Te suni jíin táca loma: Casi síquī rī jijnáhan ri, achi i. <sup>31</sup>Chi núu casáha xeēn i jíin rúhū jeē tú na cuēchi rī, te nagā ni cuu jeē ma cóo xeēn siquī ndīhi ñayuu chí íyó cuēchi i. Achí yá.

<sup>32</sup>Te suni cuangoo de jíin úu tēe ni casáha cuēchi xeēn, jeē suni cuu de jíin yá. <sup>33</sup>Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni

ni cacata caa de ndíndúú tēe ni casáha cuēchi xeēn un núu uū gā cruz, iin de lado váha ya, te inga de lado jecó yá. <sup>34</sup>Te níní jēē súcuan cúu, te ni cahān Jesús:

Tātā, cone cáhnu ni ni núu de jíjnáhan de, chí tu cájini de na vé casáha de, áchí yá.

Te soldado un ní casáha de sorteo jeē siquī ndese nihīn iin de sahma ya. <sup>35</sup>Te cáhiin ñayuu yūcuan, cájito i nuū yā. Te suni nde tēe cándiso jñīnu, cácahān catá de cájito de ya:

Núu inga ñayuu ni jnama de, te na jnáma de máá de vijna, te núu ndaā jeē Cristo jeē ní nacāji Yaā Dios cúu de, áchí.

<sup>36</sup>Te tācá soldado suni ni casácatā de nuū yā, chí ni quecoo de nde nuū yā, te ni cajēhe de vinagre iyá cohō ya. <sup>37</sup>Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

<sup>38</sup>Te suni ni íyo jñūhun jeē ndeé xinī cruz yā jeē cahán na siquī ni jíhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

<sup>39</sup>Te iin jeē ndíndúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndíndúú rí, achí de.

<sup>40</sup>Te inga de ni cahān de nuū jnáhan de:

¿A tu yúhú ró Yaā Dios naún? Chi inuú cándoho yó jíin Yaā yáha. <sup>41</sup>Te máá yó chí vetū-ni cándoho yó, chí yāha cánihīn yō castigo siquī jñīnu neé ní casáha yó. Te Yaā yáha chí tú ni iin cuēchi ní sáha ya, achí de.



<sup>42</sup>Te ni cahān de jíin yá:

Jesús, nucūhun ni ni sáña jéē  
quéjéé ní ndacu ní jniñu, áchí de.

<sup>43</sup>Yūcuán na te ni cahān Jesús jíin  
de:

Jendaá cahán rī jíin ró jeē víjna te  
condee rō jíin rí nuū jardín andiví,  
áchí yá.

### Jeē ni jihī Jesús

(Mt. 27.45-56; Mr. 15.33-41; Jn. 19.28-30)

<sup>44</sup>Te nuū ní cuu nájnūhun cahuxī  
uū, te ni cunee ní cáhnu nde  
cahuni. <sup>45</sup>Te ni cujnúú níandii. Te  
sahma ndíta caa jeē ndihyú cuarto  
iī ini templo cáhnu, ni ndatā-ni  
sava sava. <sup>46</sup>Yūcuán na te ni cana  
jee Jesús:

Tátā, naquihin ní ánuá na, áchí  
yá.

Te súcuan ni cahān yā, te ni  
jihī-ni ya.

<sup>47</sup>Te tēe nación Roma jeē cúu  
capitán ni jito de jeē súcuan ni cuu,  
te ni cahān de jeē yóhoyo cújéhnu  
Yaā Dios, te áchí de:

Jendaá ndije jeē tēe tú na cuēchi  
cúu tēe yáha, áchí de.

<sup>48</sup>Te ndivii ñayuu cáhiin yūcuan  
ní cajito i tāca jéē ní cuu, te cácani  
i yīqui jícā i jeē cájnahuhū ni i, te  
ni nandió cóo i cuanungoo i. <sup>49</sup>Te  
tāca ñayuu cájini jnāhan jíin yá,  
jíin tāca ñahan Galilea jeē ní cajica  
ña jíin yá, cáhiin jícā ña cájito ña  
tāca jeē ní cuu.

### Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

<sup>50</sup>Te ni iyo iin tēe vāha tēe ndaā,  
nání de José. Te tēe ñuu Arimatea  
ndañúú Judea cúu de. Te cúu de  
jnāhan tāca tēe hebreo cácujuhnu

ga jeē casáha junta. <sup>51</sup>Te ñúhun  
ni de jeē quiji quiví jeē ndacu Yaā  
Dios jniñu, te suni tu ní nújnahan  
ni de jeē ní casándaā junta un jéē  
cúu Jesús. <sup>52</sup>Te tēe un ní jehēn de  
nuū Pilato, ni jicān de yīqui cúñu  
Jesús. <sup>53</sup>Te ni snúu de ya jicā cruz,  
te ni chusúcún de ya iin sahma  
cuitá. Te ni chindūji de ya ini iin  
yaū jeē ní caan jicā iin cava, nuū ná  
tu quindūji ndīyi. <sup>54</sup>Te quiví un cúu  
quiví casátūhva ñayuu, chí jehíni  
un quéjéé quiví ndétátú.

<sup>55</sup>Te ñahan ní quijicoo jíin yá nde  
Galilea, ni jengoo ña jíin José, te ni  
cajito vāha ña yaū ún, jíin ndese ni  
cachindūji de ya. <sup>56</sup>Te cuanungoo  
ña vehe ña, te ni casátūhva ña tācá  
perfume jíin aceite yucū jeén asīn.  
Te ni candetátú ña quiví ndétátú,  
nájnūhun ndácu ley Yaā Dios jniñu.

### Jeē ní natecu Jesús

(Mt. 28.1-10; Mr. 16.1-8; Jn. 20.1-10)

**24** Te jenéhen ndasí quíví  
domingo, te ni jinūcoo tucu  
ñahan un núu ní yindūji Jesús, te  
cándahá ña tācá perfume jíin aceite  
ni casátūhva ña. Te suni cuanungoo  
sava ga ñahan jíin ña. <sup>2</sup>Te nuū ni  
jínūcoo ña, te ni cajito ña jeē ní  
cujiyu yuū ndihyú yuyáú ndīyi. <sup>3</sup>Te  
ni quivícoo ña yaū ún, te tuá yīqui  
cúñu Jitoho yō Jesús ni cájito ña. <sup>4</sup>Te  
ni cacunéé ni ña cájito ña jeē tuá  
ndīyi. Sáá te ni cajito ña uū ndajéhé  
Yaā Dios jeē cáa nájnūhun tēe, cáhiin  
ya xiin ña, te cáñūhun ya sahma  
ndíndéé. <sup>5</sup>Te yōhoyo ni cayūhú ña, te  
ni cajexin ña nuū ña nde nuū ñúhun.  
Te ni cacahān ndajéhé un jíin ña:  
¿Naun sa nuū cáyindūji ndīyi  
cánanducú ró Yaā técu? <sup>6</sup>Tuá

yā yāhá, chi je ni natecu yā. Te nucuñun ni rō ndese ni cahān yā jíin ró ná íne ga yā región Galilea. <sup>7</sup>Chi ni cachi ya jeē maá yá, Yaā ní nduu tēe, cánuú natūu ya nuū tāca tēe cáhiyo cuēchi, jeē jni de ya cahni de ya jicā cruz, te nuū uní quivī te natecu yā. Achí ndajéhé un.

<sup>8</sup>Yūcuán na te ni canucūhun ni ña tāca jnūhun ni cahān Jesús. <sup>9</sup>Te ni quendacoo ña nuū ní yindūji ya, te cuanungoo ña. Te ni canacani ña tāca jnūhun yáha núu ndihúxí ñin apóstol jíin núu tāca gá de. <sup>10</sup>Te ñahan ní canacani jnūhun yáha núu tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. <sup>11</sup>Te tācá apóstol chi cájeni ni de jeē jnūhun cánéé cáñúú cácahān ña, te tu ní cácanđíje de.

<sup>12</sup>Te vēsú súcuán, te Pedro ni quenda de, te jínu de cuacondēhé de nuū ní yindūji ya. Te ni jito nihni de ini yaū, te ni jito de jeē sahna cuitá un cáyūcu máá na. Te cuanuhun de vehe de, te nahān náā ni de jeē ní jito de jeē tuá yā.

### Jeē ní ndajñūhun yá jíin úu de ichi cuahán Emaús

(Mr. 16.12-13)

<sup>13</sup>Te suu quivī un cuángoo uū jnáhan de ñin ñuu naní Emaús, jeē jicá nájnūhun uxí ñin kilómetro jíin ñuu Jerusalén. <sup>14</sup>Te cándajñūhún de siquī tācá jniñu jeē ní cuu ún. <sup>15</sup>Te níiní cándajñūhún de te cácajnūhun jnáhan de, te máá Jesús ni cuyajni ya yatā de, te jica ya cuahān yā jíin de. <sup>16</sup>Te ni sáha jíin de jeē tu ní cánacuni de ya, vēsú cájito de nuū yā. <sup>17</sup>Te ni cajñūhun yá de:

¿Na jnūhun cándajñūhun ró cájica ró? ¿Te najehē cácuquíhyá ni rō? Achí yá.

<sup>18</sup>Te ñin de jeē naní Cleofas ni cahān de jíin yá:

Ndihí cuití ñayuu cájini i tācá jniñu ní cuu ini ñuu Jerusalén tāca quivī yáha. ¿Te á máñúhún-ni níhín cúu jeē ní quee ní ñuu un jéé tu jíin ni na vé ni cuu? Achí de.

<sup>19</sup>Te ni cajñūhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jnūhun Yaā Dios. Te jíin poder Yaā Dios ni sáha ya tācá jniñu jéhnu te ni nacani ya jnūhun, jito jíinúu Yaā Dios jíin tāca ñayuu. <sup>20</sup>Te sutū cácuájéhnu jíin tēe cándiso jniñu nuū ná, ni canastúu de ya nuū tāca tēe Roma, te tēe un ní casándaā de jeē cúu yā jicā cruz. <sup>21</sup>Te máá ná ní cañūhun ni na jéé maá yá jnama ya nación na Israel nuū ñayuu Roma nuú. Te siquī tācá jniñu yáha, te ni cane ñnga jnūhun. Chi vijna je íyó úní quivī jeē ní cuu ún. <sup>22</sup>Te sava ñahan cájini jnáhan ná jíin, ni canacani ña ñin jnūhun jeē yóhoyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndīyí ún. <sup>23</sup>Te tuá ni cájito ña yiquí cúnu yā. Te ni ndecoo ña nuū na jíin náhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. <sup>24</sup>Te ni jengoo sava jnáhan ná ndé yaū ndīyí ún, te ni cajito de jeē súcuán íyó, nájnūhun ni cacahān ñahan ún, te tu ní cájito cuití de nuū yā.

<sup>25</sup>Yūcuán na te ni cahān maá yá jíin de:

Tēe tu cájecūhun cuiti ni cácuu ró. Yōhyo uhū cācandíje ró táca jnúhun Cristo ni cacahān tēe ni canacani jnúhun Yaā Dios nde jenahán. <sup>26</sup>¿Te á tu súcuan ní jíni ñúhún ndoho Cristo táca jnúndóho yáha, te sáá te quinhun yā nuū lúu cujéhu ya? Achí yá.

<sup>27</sup>Te ni nacani cájí yá táca jnúhun jeē yosó nuū tútu ii jeē cahán siquī maá yá. Te ni quejéé yá jíin jnúhun ni tee Moisés, te ni cahān gā yā táca jnúhun jeē ní catee tēe ni canacani jnúhun ya nde jenahán.

<sup>28</sup>Te nuū ni jínūcoo de ñuu nuū cuángoo de ún, te Jesús ni sáha ya jeē cáca ga yā quihīn yā. <sup>29</sup>Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quīvi ya jeē quéndōo ya jíin de. <sup>30</sup>Te nuū ní cucōo ya mesa jeē cáji yā jíin de jíjnáhan de, te ni quihīn ya staā, te ni jicān tahú yā, te ni tahú cuéchí yá, te ni jēhe ya nuū de. <sup>31</sup>Te jeē sáha ya súcuan, te nájnūhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā. <sup>32</sup>Te ni cacahān maá de:

Jendaá jeē yóhyo ni cacusiī ni yō ná ni nacani ya jnúhun nuū yō ichi ún te ni castūhun cájí yá jnúhun cáhán tutu ii. Achí de.

<sup>33</sup>Yūcuán na te yachī ni canaquihīn de ichi, ni canandicó de cuanungoo de ñuu Jerusalén. Te ni canajnáhan de jíin ndihúxí iin ga apóstol, cáyūcu tútú de jíin sava ga jnáhan de. <sup>34</sup>Te ni cacahān tēe cáyūcu tútú un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíjnáhan de.

<sup>35</sup>Yūcuán na te ndindúú tēe un ní canacani de jnúhun ndese ni najnáhan ya jíin de ichi, jíin ndese ni canacuni de ya ná ni tahú cuéchí yá staā.

**Jeē ní nane ya nuū tēe cáscuáha jíin yá**

(Mt. 28.16-20; Mr. 16.14-18; Jn. 20.19-23)

<sup>36</sup>Te sá cacahān gā de táca jnúhun yáha, te ni jecuiñī-ni Jesús mēhñú de jíjnáhan de. Te ni cahān yā jíin de:

Ndeyí sñ coo ni rō jijnáhan ró, áchí yá.

<sup>37</sup>Te ni candacoto iyo de, ni cayūhú ndasí de, chi ni cajeni ni de jeē iin ánuá cúu ya. <sup>38</sup>Te ni cahān yā jíin de:

¿Naun cáyūhu ró, te naun cájeni siquí ni rō súcuan? <sup>39</sup>Condēhē ndaha ri jíin jéhē rī, te cuni rō jeē maá rí cúu. Jñi ruhū te cuni rō, chi iin ánuá tu névaha cūñu ni yiqui nájnūhun cájito ró jéé névaha máá rí, achí yá.

<sup>40</sup>Te jeē ni cáhān yā súcuan, te ni steén yā ndaha ya jehē yā nuū ni yíhi ndūyu cāa. <sup>41</sup>Te yōhyo ni cacusiī ni de, te cánaa ni de. Te vésú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? áchí yá.

<sup>42</sup>Yūcuán na te ni cajēhe de iin pedazo chācá ní tau nuū yā, jíin iin pedazo ñahmā ndūxi yocō. <sup>43</sup>Te ni quihīn ya, te ni yeji yā nuū de

jíjnáhan de. <sup>44</sup>Te ni cahān yā jíin de:

Tāca jēē ní cuu jíin rí cúu jeē ni cáhān rī ná ni ine ri jíin ró jíjnáhan ró ndé saá, jeē cánuú squícu tāca jnūhun ri jeē yosó núū tútu ley Moisés, jíin núū tācá tutu tēe ni canacani jnūhun Yaā Dios, jíin núū tútu salmo, achí yá.

<sup>45</sup>Te ni nune ya jeē níjnūnī de, návāha cuu jecūhun ni de tāca jēē cahán tutu iī. <sup>46</sup>Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quivī natecu rī. <sup>47</sup>Te cuitē núu jnūhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihīn nuū ñayuu tācá nación. <sup>48</sup>Te máá ró cácuu tēe nacani jnūhun tācá jniñu ní cajito ró. <sup>49</sup>Te tají rí Espíritu

Santo quiji ya nuū rō jíjnáhan ró, nájnūhun ni jejnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quíji nde andiví. Achí yá.

**Jeē ní ndaa ya cuanuhun yā andiví**

*(Mr. 16.19-20)*

<sup>50</sup>Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndindúú ndaha ya, te ni jicān tahu yā jehē de. <sup>51</sup>Te níní jícán tahu yā jehē de, te ni cujiyo-ni ya nuū de, ni ndaa ya cuanuhun yā andiví. <sup>52</sup>Te máá de ni cachiñúhún de ya. Te sáá te cuanungoo de ñuu Jerusalén, te yōhyo cácusīi ni de. <sup>53</sup>Te níní cáhiin de ini templo cáhnu, cánacuatáhú de nuū Yaā Dios. Te ni cuu. Amén.